

國學基  
本叢書景

文集

四

書叢本基學國

集 文 景

(四)

撰 祁 宋

行發館書印務商

# 景文集卷六十

## 誌銘

### 高觀文墓誌銘

至和二年秋八月甲寅。觀文殿學士、兼翰林侍讀學士、尚書左丞、同羣牧制置使高公。薨于京師之第。享年五十有九。既聞。上震悼。趣輦降酌其寢。既還。明日。罷紫宸朝。出尚書右僕射制書告柩。賵幣賻金系于庭。大常攷行。謚曰文莊。以冬十月己酉。克葬公于開封府開封縣襄清鄉之原。前此。門人河東裴煜。騰狀來中山。取文誌隧。予與公游也。舊誼不得讓。哭寢門已。次其梗概曰。公諱若訥。字敏之。生十歲而孤。侍母夫人客汲郡。生事日狹。取粗完。卽已。惟縱嗜于學。性警銳。過目輒記。自周漢迄茲。數千載。救革質文。娓娓能言之。天聖初。以鄉貢牒詣有司。聲光闖焉。一日出諸儒上。方天子亦禮部取士。于是中山劉公筠。大哀英才。得二百人。多海內選。公在第四。調彰德節度府推官。改著作佐郎。再遷太常博士。歷三縣。以辨最稱。臺御史薦爲監察裏行。就改主客員外。進殿中。遷右司諫。直史館。起居舍人。留知諫院。換刑部員外郎。知侍御史雜事。于是數見上。言得失。蜀賈拔外戚得郎官。知蔡州。公劾賤丈夫乾沒財利。不宜以私謁汙二千石。內侍省大中人怙恩。聲焰震赫。人爭媚附。公斥言其尤。卽日外遷。有詔累黍定尺。檢制樂律。法不合。

爭論連年。公獨以漢世貨泉度寸。定古尺。示諸朝。議者服其密。嘗言中書樞密院所與一統類。美風俗。今奏事雖立。不改刻。遽罷。不能究熟。萬幾宜復古。坐而論道。使人自竭。帝聽其言。擢天章閣待制。益親近。轉禮部郎中。出爲河東都轉運使。召還。丁母夫人憂。號訴願盡三年。國朝兩省內外制而上有故者。卒哭輒奪哀。有不獲命。慘袍幙到朝就職。自公得請復。遂著行服。令詔給實俸。終喪。逮除。盡還舊官。拜龍圖閣直學士。史館修撰。以吏部郎中進。諫議大夫。權御史中丞。慶歷七年春。小旱。上憂甚。引公問洪範。雨暘所以致休咎者。公推原五事以對。其議閎深博衍。上嗟嘆之。後三日。引拜公樞密副使。見便坐。上戒以和。公頓首言。和無莫濟者。有如樂焉。音異。乃諧。若可否出一。是同也。同則生黨。時大臣執議見遷。故公謝及之。由是見謂爲長者。天下無事。常宿屯三陲。募兵不止。度支財益絀。公議一切停募。料冗士以蘇調給之。殘詔可。康定時。西鄙騷釋。東南多盜。始置宣毅兵州。悉有之。扞鎮方夏。士旣飽衣食。不事。悍不可制。公曰。是本欲制賊。今反自賊。何賴爲。建擇精銳者。團籍北遷。以補戍人。守臣爭言。士素驕。驟遣必亂。公固謂朝家威令整嚴。等輩孰敢。旣徙。無一士干法。以工部侍郎參知政事。後二歲。由戶部侍郎。檢校太傅。爲樞密使。儂蠻襲邕州。殺守將。公曰。南海可虞也。或謂未然。閱旬。賊剽十餘州。乘流下番禺。入其外郭。南軍不習鬪。部校爭長。連戰輒北。賊遂張。嘯亡命數萬。嶺南大瘡。公謂當遣貴賢將節度諸部。以番落千騎怖之。可禽也。會天臣馳往斬敗。將鼓而南。賊盡銳薄前軍。顧騎出其後。驚以爲神。遂大敗。南事平。帝議策勳。公欲讓功。

臣。使得其處。卽辭位。章五上。拒不省。公請愈牢。帝重違。又以公次當得宰相。雖解機務。猶以學士籍留自近。公喜曰。天下士不吾責已。公節分崖然。不與俗流。至浮屠神仙陰陽怪譎事。弗語也。在禁中論得失。無少回撓。及建白裁處。皆深自匿。令出。反從人問所以然。故獻納之益。初祕弗得詳。久知乃十一二。常謂承平久。吏忽事厯。必峻法治之。謂管夷吾韓非責名實。賞信罰必。術最近。與儒家相輔。長利可興云。公之次行軍。約束敕。白罷內降封拜。外戚不可輔政。皆著後法。執官尹不建節。謂貝丘將屈賊自容。卒論死。諫止數赦。蓋畧施行所謂者。輔政七年。潔畏自將。和傳內外。謀議有不盡如素。或蘊諸內。綽然尙有餘。然未嘗以不如素自解。亦不以有餘矜諸人。故仕雖貴。忌者不媚。已去位。間者不容讐。沒而士君子泣相弔也。公善觀書。反復研討。必得其意。乃置。不誕漫莽鹵。貯之胷中。所學遽而該。殆不可及。所著文章二十卷。善文辭者貴之。公累官攝領難悉著。撮其顯者。待制時。假節京西。爲安撫使。在臺兼理檢使。知貢舉。再使契丹。一知審刑院。一領吏部銓。三班院。各再侍經筵。二特召進讀者。一爵開國公。階光祿大夫。勳上柱國。邑二千八百。實戶六百。功號自推忠佐理。換推誠保德。大較如此。曾祖諱某。贈累太師。祖諱某。仕爲崇儀使。考某。官右侍禁。竝贈大師。中書令兼尙書令。考封祁國公。曾妣王夫人。祖妣馬夫人。妣閻夫人。啓魏晉秦三國。爲太夫人。公娶太原王氏。封某國夫人。生五男子。曰彥輔。東頭供奉官。曰保衡。曰安石。曰吉甫。大理評事。曰元規。太常太祝。初。公在慶歷時。葬二令君子。開封縣之吹臺鄉。地稍瘠。公恨之。將改卜。及是。諸孤遷。

二令君樞輿僕射同整。以昭穆爲位。公志也。凡人見今世傑才卓行。其于奔走嚮服。猶未聞。如古人之賢。何歟。不得見而愈貴也。使千歲後視今爲古。予知有藉公風烈者。長想太息。恨不得操鞭箠。從公後以快其慕。爲果不疑。銘曰。

高氏自渤海。徙占河東。爲榆次人。世潛德弗融。久乃發祥。逮公大昌。以孤童奉母。羈旅京輔。軋出陋貧。化爲偉人。由御史諫官。健健敷言。事有固爭。不市直取名。我完吾履。弗援弗倚。一辭寤主。直都貴位。惜俗凌遲。令敝法刑。遂弛必衰。或悼後艱。自公佐王。輔乾爲剛。不假借賞刑。以新故章。引薦俊良。惟力孜孜。斯謀斯猷。外莫聞知。澹于榮寵。峻節是甘。去位甚易。如肩釋擔。邇英之游。惟經術是毗。巷無密輪。奧無媵桂。誰市其門。誰侈而室。聞公之風。可以自律。初秦國多疾。公自調治。方劑天悟。親嚮壽祺。公之屬疾。自診不可治。召見諸子。遺訓愈厲。歿無以私。敢丐諸天子。天子賢之。嗟我師臣。顯卒光哀。滂漏厥恩。予聞于古。曰仁者壽。公不六十。斯言叵究。有宰臯如。有樹岑如。公安是居。千載不渝。

宋府君墓誌銘

余四世祖在晚唐時。以御史中丞失官。始籍雍丘。旣歿。葬總亭下。子孫留不去。益大。列東西南北四院。以昭穆別之。遂爲開封冠姓。入國朝。宦學數十人。比宋之顯者。虞部員外郎諱文蔚。字公炳。治春秋擢第。歷八官七遷。皆以最聞。以大理寺丞爲中江時。狂人乘官吏大集。走呼曰。賊至矣。蜀人喜亂易搖。皆相怖亡。

匿。君叱左右縛笞之。以令市人。衆不敢動。里閭德之。爲立生祠。以郎守歸州。戊卒謀劫庫兵叛。君先期收之。探治根窟。威振一方。君爲政。緩急方畧。類若此。以殿中丞監京師稅院。再歲。羨九萬緡。常賞忤執政意。不行。亦不自白其勞。爲人綆固慎畏。不通親友餉謝。仕三十年。黻黷益修。未嘗對公門免冠謝咎。家無十金產。每一官罷。輒襆被去。甘足貧槁。澹如也。以老得謝。壽七十有二。服五品。勳十二轉。履尙潔完。蓋古所謂善人者耶。仲尼曰。善人吾不得見之矣。如君之亡。世學仲尼者。且恨不得見。況我昆弟宗族間乎。君娶陳馬邢三姓。邢封樂壽縣君。後君十九年終。三子。翺。翺。君之老。推恩于翺。得試將作監主簿。累調觀察。府推官。有吏才。敏而文。偃蹇寡合。故仕未甚顯。然趣遠行嚴。使有合于時。願必大其宗。翺。翺皆向學。翺侍親。再割肉于股。以愈親疾。鄉人孝之初。故塋狹。無餘位。故翺等更卜臨黃之原。吉。以皇祐二年十一月戊申。葬君及三夫人。北望先隴。六里而嬴。尙成君之志耶。曾祖範。爲內兵主簿。祖鼐。爲孝感令。考在恭。爲長州主簿。贈比部郎中。母黨夫人。贈馮翊縣太君。銘曰。

有行而純。有吏而循。我于吾宗。實見其人。秉義知退。以歿元身。安宅鄉塋。永慶後昆。

### 故吳興居士吳君墓誌銘

昔太伯延州之興。本諸禮讓。流風餘教。染其深迹。後之苗裔。雖在畎畝。咸能整飭。表率雅俗。豈前人之遺烈耶。居士某諱。字子玉。吳興故鄆人。曾大父當錢氏之霸。相與隱晦。然齒于里。皆丈人行也。居士生國初。

建隆間。長則天下甫定。人去湯火。俗識籩豆。常喟然有志于學。振起門業。會閔凶所遭。族大爲諉。急于營。卹已而不果。方事之隙。猶佔簡畢。故于經史。泛通章句。處州黨。持門戶。伏臘支計。內外仰給。鳴鳩之施。莫不均壹。鄉人之善者。服其行。悍者。假其風。飲人專以和。存物先諸惠。故門內外無間言。里中號爲有恩。子曰。施于有政。是亦爲政。斯近之矣。所居美田宅。佳山水。持老子知足之計。常守雌靜。他日子。姝十數。當就外傳。自恨官學不究。無所成名。出其家書。付之肄業。立學舍。延儒衣。督勸其勤。常自噢嘆。景祐初。若子若。姝遂登厥科。今位諸朝。如其本心。惠訓使然。居士以慶歷丁亥正月二日卒。初不甚疾。了無怛化。治命歸骨。附于先隴。諸子奉遺意。卜其年九日甲子。葬于某鄉某里。秩于其祖之側。娶沈氏。先居士二十歲而亡。悼及賢和。卒不復娶。子五人。長曰隣幾。次慎幾。早卒。次曰惟幾。次知幾。任大理寺丞。嘗領安仁長。遷秩殿中丞。聞訃。不拜。次曰慮幾。隣幾而降。率端良友悌。保家之令。子曾識寺丞君。端粹開敏。可謂佳器。及銜恤。在疚。濱于焦毀。匍匐流涕。來訴窮罰。且言日月之定。託銘諸竊。惟純孝之志。難以辭拒。因約其先行。以表諸後昆。銘曰。

履道之吉。易稱幽人。國風之樂。迺在衡門。十室至細。忠信所存。彼善居士。結髮修身。志便休閒。行成州里。能睦諸嫗。善教厥子。起家班朝。光明之始。惠訓則然。積慶宜爾。七十黃髮。啟手歸全。治命有付。葬祔其先。故彰遺里。美哉山川。吳氏有後。存子孫焉。



楊太尉墓誌銘

慶歷二年契丹闢差人來請。設言造端。謀寒先盟。南竝盧龍塞。陰徂邊隙。上方視圖。按鎖曰。中山博陵。襟東空道。天下勁兵處。須貴重宿將。以張吾軍。于時河陽三城節度使楊公崇勳守淮陽。其三月召還。既見上。數請問陳方畧。願先顏行。乘北方盛秋。有詔仍舊節。復拜同中書門下平章事。部署真定州兩路馬步軍。卽判定州公事。至則飭部隊。習馳射。敕甲休士。堅壘養威。本法設張。伍符叶修。由是幹皮鞅。鞞備于行。渠荅羅闖。給于守。技擊跳盪。奮于屯。長城巨防。隱若萬里。其五月。移判成德軍。兼高陽門都部署。于是河北兵皆屬。會朝廷以不戰屈敵。其秋。麾下兵罷。十二月。改判鄭州。前此公告足。整頗害良行。當緩急。不敢爲解。至是以疾自上。乞致所事。還私門。詔授左衛上將軍。聽謝。明年。拜太子太保。全食其俸。五年後。五月己酉。薨于清平坊第之正寢。享年七十一。上聞訃。悼痛。再不視朝。以太尉冊書告于楨。內司竇臨問其家。錄孤歸賻。治命不敢當。鴻臚葬。有司諡曰恭毅。嗚呼。逢聖于始。顯庸于中。奉身于終。綴榮于哀。其所以載侯表世家者。幾何公之比。公字寶臣。本宏農著姓。後子孫有入燕薊者。因土斷。爲薊人。曾王父方道。終後唐涿州刺史。王父守斌。及太祖時。爲龍捷指揮使。父全美。爲太宗倚信。終殿前指揮使。左班都知。比三世皆材。當大有爲。而不克顯。蓋蒔祥播慶。逮公而獲歟。公貴。竝贈太師中書令。祖室鄂國公。禰室齊國公。曾王妣竇氏。王妣孫氏。妣王氏。啓楚韓秦三國爲夫人。公年十一。父任東班承旨。真宗在東宮。以夙敏得侍。

賜名。且敦勸他日。謂左右曰。聞若等嗜學。吾授若書。衆皆頓首謝。于是令太子太保致仕張耆爲學長。公與故宣徽南院使夏守斌爲學察。餘比諸生。以授孝經論語詩賦雜家。自是通古兵法書術。知前世興亡事甚悉。眞宗踐阼。累遷內殿崇班。由供備庫副使三遷至東入作使。國朝翰林司掌湯液果醢之奉。乘輿宴羣臣者。在殿中尤親近。羣牧司領內外國馬。時出人而蕃息之。是最要劇。樞密承旨所以總郡曹署。二令地逼勢牽。人憚居之。銀臺通四方章奏。襃積不時。上吏易竝緣爲姦。公始以尙衣庫使領翰林司。供事以辦。又爲羣牧都監。以西上閣門使爲羣牧副司。驕訓以詳。以左武衛大將軍恩州刺史充樞密都承旨。參穆基命。改左驍衛大將軍。又提舉樞密院通進銀臺司公事。程無留書。搢紳由是知公材無不可施。毅然有大臣望。拭目觀矣。俄遷英州防禦使。侍衛親軍馬軍都虞候。并代州馬步軍副都部署。未行。留爲客省使。仍防禦使。授領三班院皇城司兼閣門四方館事。章聖倦勤。皇太子參視朝政。會用事貴人怙權。甚間。畏大臣不附。欲專樹所私。密計諗公。公亟道不可。彼業已露。愈欲脅持。公因羸服夜過樞密使第。白發其謀。明日。樞密院以急變聞。帝命曹瑋與公收按首謀。窮治支黨。斬翼獫牙。宮隣以安。旋授鄧州觀察使。牢讓不拜。詔但易桂州。復轉內客省使兼羣牧使。上旣纂承。以彰德軍節度觀察留後知陳州。歲中。卽除殿前都虞候。副真定路馬步軍部署。召爲侍衛親軍馬軍副都指揮使。以振武軍節度爲殿前副都指揮使。久之。換節鎮南軍。凡天下拳勇適悍材官。步則拔距蹶張。騎則跌後揜前。悉集京師。日閱而歲擇之。

得隸侍衛軍。武力之右卓異者。升爲殿前軍。內參屯廬。則巖廊期門。出陪營衛。則曠騎羽林。所以權中制外。厭亂萌。搃闕亢。自候奄而上。皆慎將徹侯爲之。公之扈寢弋。總離衛。前後十年爲國爪牙。其見信于上如此。以職勞改宣徽南院使。兼樞密副使。明道初。寢宮考室。以丞相爲修大內使。公爲之副。揆景僭功。指期落成。天扶神尊。萬楹有煥。又改節山南東道。上與明肅皇太后嘗曰。先帝稱楊某忠孝亮直。可任大事。卽以樞密使印命之。公自以得君逢時。底裏無所隱。晝日萬幾。處可于前。天子器之。號爲稱職。歲餘。以三城師節兼丞相秩。復治于陳。仇家上書追寃前坐。釋憾于公。乃罷丞相印綬。徙知壽毫兩州。還爲宛丘公。爲人方重有威。城府開爽。論議常傾座中。事先帝有雅舊。故敢面觸廷諍。候人利病。及政可否。必爲上言之。多所開順。近臣見時不用兵。建言可駕廢馬取羸。以濟國。公執奏曰。當承平時。無所事騎。然自昔忘戰者危。不備者不可以師。帝然之。由是議格。王均亂益州。公乘驛受諸將所奏事。真宗再自將。幸河北。詔公走僂道入屯壁。以密旨諭帥臣。論功爲多。又率兵守澶淵浮橋。時邊民之南。項背係道。公選善游數十工。設濟全渡。多不可勝計。其仁愛根于心。寧勉爲哉。壽春多高貲大豪。囊橐老奸。持吏二千石長短。公下車。擿其無狀。逮繫論報。隸身徙家窟穴。破平。治爲東方最善待士。不倨貴。與游皆長者。鉅人屬吏。或材言之。朝不進不已。其不材亦務全安之。乏者周窮者振。專務飲德不伐。嗜唐白居易詩。比次後先。號白氏編年。自爲題辭。傳于世。七歲時。兩足痺不仁。有異僧過門。嘆曰。奇童也。爲出肘後藥。傅其處。數日。趨戲如常。家。

人具百金爲僧謝。訪之卒不獲。福胙憑厚。蓋若神所相云。凡累食戶萬四千二百。實四千五百。階勳極品。檢校八遷至太尉。傅本郡開國公。功臣。在禁衛時。忠果雄勇。推誠宣力。在機近時。推忠協謀。同德守正。佐理守藩。則推誠保德。崇仁忠亮。守正翊戴。數之繁縟。稱是任用。初公罷常山。親吏得罪。監司深文。諉公。故菟裘之還。褻寵未極。久之。直公無罪。遂有儲保之命。方公護諸將。連兵數十萬。壓趙睨燕。幹不庭方。敵人恟疑。虛喝不敢進。其倚任何如。乃今以刀筆曲折。誣欺取勝。吏之文致。誠可畏已。賴上廓度寬仁。卹往厚亡。進退之交。無毛髮可間。聖主之保功臣。自有體哉。公娶三夫人。曰王氏。未及封。姚氏。芮城郡君。田氏。京兆郡夫人。子十二人。宗讓。內藏庫使。宗詡。故右班殿直。宗說。西京作坊副使兼閣門通事舍人。宗誨。內殿承制。宗識。故內殿崇班。宗謹。宗誘。內殿崇班。宗諤。宗誼。東頭供奉官。宗諫。故東頭供奉官。宗詰。東頭供奉官。最幼。早夭。家老洎諸孤。以爲春秋諸侯。葬不過五月。用奔走藏事。以仲秋壬申得吉卜。克葬。公子開封府祥符縣鄧公鄉公家原。從齊公塋。穆位。舉三夫人。耐焉。弗慢而壞。故禮周。必信而誠。故情稱。既又巧文譏美。孝子之事終焉。銘曰。

太尉之貴。發自孤童。給事儲邸。允顯有庸。天飛雲從。化爲元功。累光疊華。遂都貴官。邇臣逞憾。相軋以權。先事發機。敗踵不旋。乃總營衛。乃建節牙。克冠天樞。肆勤王家。將印相印。于藩有華。遼人搶攘。陰撼侯疆。公在河朔。盡護戎防。上言北諂。潰其肺腸。事寧兵解。公則引年。帝惟念功。式遏儉言。東宮一品。寵靈益宣。

彼仁與賢。天畀耆壽。胡不留屏。偃然西首。廢朝追悼。飾終則厚。鄧鄉鮮原。昭穆同阡。降魄于此。可作無年。萬有陵岸。不朽斯傳。

胡府君墓誌銘

案胡府君名銑

子友安定胡所。以誠信克葬其考妣。及狀行與世。使來請銘。噫。孝乎哉。加于人一等矣。且子視府君丈人行也。故不得辭而銘之。子爲兒時。從先公牛馬走。及見與府君游甚勤。居常銜盃酒。語仁義。譽品賢。不肖道詩書前言。生民病利。袞袞纒纒。然皆可覆記。府君魁岸人也。進退安重。頗樂易。善談笑。視操如表。和氣溢焉。發于眉宇。臨政敏銳。如庖操刀。雖髓髓大輒。迎擊則斷。少通陽秋三家。及旣第。七調吏部銓。自縣尉止節度府判官。所至常用風績聞。佐真定時。羣囚結大辟。府君適從外還。擿其寃。尋與府中執爭。已而果不死。寇丞相萊公。張丞相鄧公。數稱其材。按部使者見之。必加禮。退心任其能。言于朝。然卒不得踐丹塗。澤魚班。近天子之光。老爲諸侯上介。傳曰。樂只君子。福祿申之。如府君可謂君子者。何其福祿不申耶。听爲光祿寺丞。開府兵曹參軍。余之女弟實歸之。抱瑜襲瑾。有待而發。子三人。仲弓。叔倫。季康。皆粹秀韶警。鸞鷟驥子。蓋府君之德。其收報者在子若孫歟。初。瀛州府君旣倦游。居無定貫。故三代未葬。听也。奔問諸卜。得汝州郟城縣鈞臺鄉之原最吉。又卜甲申歲秋九月庚申。亦最吉。則自曾門而下。穴位有差。終前人之志。舉三夫人合于府君之墓。予辱于府君游舊矣。其才且劭。得周知之。故銘于埏。銘曰。

可必者我。不必者天。志與運違。固有以然。沒于己巳。葬于甲申。有穆有昭。相望于原。吁嗟若人。裕後以仁。孝子令孫。祀以永存。

皇姪孫右衛率府率夫人錢氏墓誌銘

夫人姓錢氏。系出彭城。曾祖諱延正。以武力奮爲左金吾衛將軍。祖諱守榮。以謹敏進。終內園使。考諱允德。材裕世濟。止內殿崇班。慶祥下鍾。爲令男。爲賢女。果不誣已。惟夫人生而恂淑。幼而純靜。德容充裕。內親黨間推之。善女工。剪製之事。頗留心毫翰。洞曉音律。絲門閨之懿。預藩房之選。景祐丙子仲秋。歸于率府世昌郎吳豔王之曾孫也。人對中禁。錫以冠帔。以藩戚信厚。而永其輔佐。以族系高顯。而承其祭祀。家道甚肥。閨範甚修。使率府有令譽。綽綽公族間。抑夫人之助歟。慶歷元年十二月十三日。感疾而終。一男曰令襄。太子右率府副率。在涪灘孟夏癸卯。葬于河南府永安塋。禮也。嗚呼。夫人始于髻稚。忘慢戲之容。逮于笄總。致雍和之美。歸于邸第。杜驕盈之色。以夫人之淑範。不可以不識。是以追琢介石。納諸壙云。銘曰。

於穆夫人。令儀溫溫。嬪于密戚。生此德門。履道以謙。處貴以約。遠歎藏舟。靡聞勿樂。楚挽酸咽。虞歌涕洟。脩短奄忽。逝者如斯。崇岡美楨。厚窀幽泉。淑柔之譽。垂厥永年。

隴西郡君李氏墓誌銘

慶歷元年。翰林學士太原王拱辰。以著令白于朝。得隴西郡追君其母李氏夫人。明年。以丙寅制書。改陳留郡。又明年。翰林授右諫議大夫。權御史中丞。歲次甲申。卜兆于開封府尉氏縣蔣成鄉之原。秋九月庚申。奉夫人柩合諸王考。贈尙書兵部員外郎府君之葬。李氏自成紀來山東。世牒湮放。夫人之先。更爲開封府陳留人。數世隱居。母曰時夫人。夫人性靜淑。不媚刻。德行嚴。舉有儀。孀事時夫人也。以孝稱。歸兵部也。以順稱。兵部故大家尊貴。姻婭數十姓。愛恤饋餉。歲時無虛。夫人以恩意接之。親疎咸有節適。皆喜曰。婦當得此。春秋烝薦。必自執其勞。肴潔于筵。酒香于罍。禮以順迪。無神恫戚。兵部晚節官不進。貲產益空。夫人謹視用度。均一甘苦。兵部以清白聞。由是待夫人始終如賓。授諸子孝經古詩方田之數。逮其就學。皆未勞而習。教諸婦以箴。悅盟總。鱗甲之事。俾之居室。皆弗違。而婉少悟。佛誦多薰。祓誦經。率一月常十齋。前夫人趙氏有一女。夫人啾愛等己生。至女不自意爲前夫人子。生十男二女。中丞卽第八子。天聖八年。與多士試于廷。天子擢爲第一。于是搢紳之言榮且慶者。舉歸夫人。或祭酒祝延爲夫人壽。方將裂脂田。賁榆章。盛茵鼎之養。借山河之老子堂侍壽母。婦闔庇賢姑。九年。遘疾不瘳。壽止五十三。後二年。兵部又卽世。中丞旣畢喪。則自書殿入詞垣。躋玉堂。數進見。言天下事。幅臆感慨。朝咨其忠。議可計行。其道光明。諸昆踵仕。綏纓交照。然而其心忱焉。悼報之弗逮。終天之亟也。惟斯文叙實。可圖不朽。中丞乃泣狀先懿。授予爲銘。前此歐陽永叔識兵部之誕。其言世德備矣。故予敍夫人內也。畧而行也。詳所以申足其

辭以慰棘心霜露之歎云。

誰如夫人有子皆才兮。誰如中丞方顯而養兮。吾親不待。鍾于永懷兮。大郡疏封。上施窀穸兮。蓬池之西。隧而及泉兮。雙靈同穴。安斯萬年兮。

故贈太師章公夫人追封鄧國太夫人張氏墓誌銘

夫人張氏。自遠祖去清河適南服。歷世土斷。爲建州建安著姓。大父諱元吉。遭閩土僭霸。以鄉里士望被私署。烈考諱仁肅。事南唐李氏。累遷至檢校水部員外郎。夫人卽水部之長女。生而殊稟。幼而明悟。旣笄而四德備。未結縭而六姻是式。武寧章府君諱兔。稔譽柔嫻。合姓焉。夫人移其孝以安舅姑。移其友以和娣姒。勤身以助宗事。盡愛以綏族屬。合幽嫻靜婉之操。以輔佐君子。席慶靈光厚之烈。以克生良嗣。故府君繇鄉彥請舉。揚聲俊域。一子。今戶部侍郎同中書門下平章事得象。以民宗碩望。顯相王室。雖章氏之興。理非一緒。而刑家由臬之訓。實夫人是基。丞相七歲。弄翰閣。諸辭律。十二。衣逢掖。與家尊聯名貢牒。傷鋒國器。場中震動。當時父子俱冠汝南之品。先君無祿早世。夫人茹未亡之痛。教忠勉學。更絜慈壺。咸平中。丞相由進士高第。褫巾服政。發舒賢業。寢華朝紱。綱繆二紀。代極言訪對之遇。流根滲澤。在亡均寵。繇是禰室累追贈至尙書左丞。夫人自南陽縣累易封至永嘉郡太君。丞相在禁林。年踰知命。夫人華髮康豫。含飴弄孫。累茵高堂。享滑甘顏色之養。深慈篤孝。相爲慶社。湯沐榮衍。朝倫聳慕。若其咨訓圖史。審言



敬越。組紉箴繹之細。鮮脯芼滫之法。莫不造詣精極。垂爲家範。雅喜賓集。每子舍盍簪置酒。必躬飭構御。盡籩羞豆實之品。調烹牒切。畢景無倦。早探釋部。居常薰祇。高情了識。絕死生之怖。明道壬申歲春二月辛酉。以壽終于京師里第。春秋八十。順機趨寂。舉無怛化。旋殯于薦嚴佛寺。後五年。丞相由翰林學士承旨同知樞密院。又一歲。升變槐路。俄服華袞。從陽郊之報。是三者。天子皆詔有司。以降名極品寵靈先服。左丞由太保太傅。遂至帝師。永嘉自安平郡進。躋榮國鄧國。竝爲太夫人。初。先公歸全。卽葬本郡。夫人實有治命曰。魂氣無不之也。奚必同穴而謂之歸耶。丞相永懷緒音。昊天罔極。虔詢善蔡。始得許州陽翟之三封原。惟吉卜。又得寶元己卯孟冬之乙酉辰。與姓合。乃備厭車靈輜。奉尊柩于新城。從吉道也。丞相以任國之重。下得申私恩。謁常告題旌之引。乃服總經。哭祖于都門之外。遂勅家丞宗老相仲子約之。以克終襄事。大懼聖善之懿。弗永于將來。有命論次。以期陵谷。銘曰。

懿懿鄧國。惟嬪之則。配賢生才。變我皇極。基母德兮。帝欽四鄰。錫命顯親。重封象服。恤典明縉。成于仁兮。合葬非古。心晉有緒。頴曲輔邦。鈞臺故里。安吉所兮。

南陽郡君李氏墓誌銘

夫人姓李氏。系出隴西。太子右贊善大夫惟良之女。武勝軍節度使英國公至之孫。叢光累祥。克誕令淑。家人嗇腐之法。女功織紉之事。耳濡目染。有如天成。旣笄。今左千牛衛大將軍宗立委禽焉。二姓綴歡。三

商有行。于是奉蒸嘗焉。以恭接姆妣焉。以和鳴鳩。一其仁。采蘋謹其職。以將軍之貴。詔拜南陽郡君。方賦脂田。膺象服。飾魚軒之華。佶照玉珈之煌煌。降疾無瘳。享年三十有四。以慶歷三年七月。殯奉先僧舍。明年夏四月。鴻臚奉詔。將柩而西。癸卯克葬河南永安之西原。子四人。仲舒、仲琳、仲曉、仲偲。竝太子右內率府副率。嗚呼。老宜偕而將軍悼之。慈可恃而率府喪之。天之弗庸。悲夫。銘曰。

永照西園圖厥域。史臣作銘鏤幽石。魂兮有知此惟宅。

# 景文集卷六十一

## 行狀

### 李郡王行狀

李用和字審禮年六十三郡王本隴西冠姓世系數徙邢公自餘杭北還遂籍祥符爲土著王卽章懿皇后母弟性審謹慥慥自將少爲魏王彭城劉美所識且與王有裏表故任爲三班奉職試劇有能三遷右侍禁俄兼開門祇候爲開封府考城縣兵馬都監明道元年章懿皇后崩詔王會喪京師已葬轉禮賓副使俄持節勞賜西平王德明奉使有指是歲大營宮室王分護塗填宮城遷正使兼領皇城司明年改葬懿后詔王佐經總哀恪誠盡故陵地卑不能無沮洳上怒有司謀始不謹欲薄責其由命王按視王畏得罪者衆委曲申理由是稍解主者皆釋不誅九月改崇儀使兼賀州刺史領介兵千騎護梓宮而西上嘉王之勤錫慰係道十月復土明年二月詔王乘傳行后陵還拜寧州刺史是冬改澤州團練使四年進慶州防禦使歲中爲鄜州觀察使竝仍皇城司王有風力部分嚴整其條約典舊無一日不討于官帝益親任之寶元二年以觀察印充殿前都虞侯又兼鄜延路駐泊馬步軍副都部署未行加拜永清軍節度觀察留後其秋換眞定府定州路副部署八月赴屯王下車曉勅軍伍習戰陣扶惰勉勤營和士威又悉所

賜具醪餼。日月享宴。訖無留費。明年擢侍衛親軍副都指揮使。更爲兵馬都部署。十二月召還。慶歷元年。徙帥馬軍。明年拜建武軍節度。進領殿前副都指揮使。此三帥府分提天下兵。以衛天子。鎮方夏者。居則持卸杖侍楯下。出則導乘輿夾馳離衛具。所以親近倚愛莫二。王徧歷之。出入六年。不懈而虔。未嘗有過。後因請見。自陳多病。願解近職。還私門。上亦以王戚最尊。且春秋高。宜見優禮。不當猶以職事嬰之。乃以建武節檢校太傅。進爲宣徽北院使。逾月。改彰德軍節度。同中書門下平章事。不欲王遠去。故留爲景靈官使。王旣位顯。務閒。常闔門移告。八年十月。上親臨問。賜銀五千兩。王頓首讓。不許。月餘。有瘰。勉入謁。十一月。進檢校太尉兼侍中。仍彰德節度。王小心簡素。雖以元舅之重。在百官諸侯上。未嘗招賓客爲赫赫聲勢。有所薦引。皆長厚知名士。不殖貲產。不侈居廡。膳不重肴。室無焯龜。廢無粟駒。四方餉遺。一不納。在朝廷兢兢。入私門申申。雖子弟皆奉承修飭。恥爲執袴近習事。初。王未有第。上以芳林園假之。王固辭。不敢處。乃假今第。景祐中。天子再郊。皆爲大內居守。其見信于上如此。皇祐二年秋七月。疾革。乘輿卽見臥內。王治家素不爲後計。上哀之。賜銀三千兩。以所居長爲王第。斥官邸無慮數千萬。直俾之。得永收其入。二子一孫未仕者。悉給廩錢。中子西上。開門副使珣。上嘗許爲開門使。至是拜牀下。欲王及見之。甲辰。乃薨。上卽日臨弔。爲慟。賻贈加等。以太師中書令隴西郡王制書告于柩。特詔罷五日朝。發哀苑次。王諸子中。璋。珣。瑋。先顯。璋爲神龍衛四廂都指揮使。眉州防禦使。瑋選尙福康公主。主待年。前拜爲濱州刺史。駙

馬都尉皆忠力靜畏。雖微蔭籍。猶能以才自奮于時也。自古外家負貴近。出入禁省。非縱擊險謁。卽貪墨不終。故嬰蚡以通輕俠亡。陰寶以奢狀敗。若郡王據肺腑之地。可以市權。可以干恩。否則狗馬射獵。鐘鼓女伎。以窮玩好。今乃畏漸防微。反若韋布儒者。無秋毫之咎。撓朝廷法。可謂外戚之賢家。三事之哲老歟。詩稱令終者。善其終也。若王非耶。今葬有日。史臣被詔。次王行實。敢告有司。請循謚法。謹狀。

### 孫僕射行狀

孫奭。字宗古。年七十二歲。公之先本樂安望姓。後子孫有徙占博平者。墳墓託焉。遂爲博平人。公幼好書術。不事產利。夙儒大原王徹以五經教授。其徒數百人。公往從之游。及徹卒。有從公質正謬惑者。公厚謝未答。久之。爲言其意。義據深切。人人厭服。于是徹門下生悉從公以終業。故其鄉之粹然仁者愛之。其里之劃然暴者畏之。會州將少文。憎忌儒服。公不見禮。遷至汶上。樂其風土。遂貫籍焉。頃之。吏上計文。卽偕西遣。端拱二年。擢九經高第。釋褐主莒縣之簿。代還。上言願以本經試。最有司言學有師法。于是以廷尉平直。太學爲講員。太宗幸上庠。詔說尙書說命三篇。動容稱善。且嘆曰。天以良弼賚商。朕顧不得若人耶。因賜公緋衣銀魚。用是明年。切免大丞相。以郊禮。及眞宗嗣位。再除至殿中丞。又侍講于諸侯王邸。賜三品服。會丁內憂。敦嘗還職。是正七經義疏。以勞再遷尙書屯田員外。他日。帝命執政諭公曰。朕悉爾懿行。今欲改任他官。具以情上。公卽對。君行制。臣行義。量能授官。君也。食焉罔避。臣也。又敢擇官以好王誅。對

奏天子納焉。罷宮職。以都官判太常禮院。國子監。司農寺。先是五郊從祀。神無席尊。無籩。七廟時饗。獻神。嘒福互用。一散尊。豆無三甑。登歌不以雍徹。冬至攝祀上帝。外陔止十七祠。饗先農。乃在祈穀之前。釋菜不備三獻。公建言。獨恭不裕。專非則薄。卹祀媚神。稱而後宜。有詔從焉。自是器備樂完。天壇釀食六百八十有九。祀農更用辛後吉亥。國學獻事不攝祠官。重矣。與諸儒分集冊府元龜。帝將東巡狩。攬瑞命。建元封。命公乘驛至塞下。諭契丹所以告成之意。俄假節以金紫。卽王庭賜其君長。廟飲策勳。敍轉職方。帝察公守正持重。小心謹密。練達光明。才任公卿。明年除工部郎中。充龍圖閣待制。判登聞鼓院。以汾陰。詔書改兵部。始封瘞。二禮希闕。于代刺取屬岡。公皆參焉。尋介偕帝奉冊使還。與文元晁公等同主貢條。又知通進銀臺司。門下封駁事。兼三班院。時眞宗已封禪。則西至葵上。明接萬靈于殊庭。大抵名山神靈之封。皆望幸矣。六年。遂下詔用開元故事。款瀨鄉。奉太清之祠。公上疏引唐明皇以爲言。天子雖喜其意。然謂稽古擇善。何常之執。更爲解疑論。以示羣臣。始尙書公年耆德茂。重去鄉梓。公至是。上言不勝父子之情。願歸田里。盡溫清之報。詔不許。又奏願守一郡。以便瞻省。制可之。乃守高密。居部二年。拜左諫議大夫。罷待制之職。還臺。糾察在京刑獄。祥符之降也。始名天慶。先天降聖。爲盛節。詔天下飭齋合燕。費且不貲。公建言宜罷。以省浮用。書奏不報。未幾。出知河陽。天禧末。縣官度用財力。稍稍減郡國祠醮。終如公言。郊祀恩。改給事中。公連年自表。以尙書公年九十。按禮家不從政。據令。許解官待養。帝覽奏歎息。詔丞相府曰。

孫某或請急過家及欲近郡則聽之乃就徙兗州明年改元乾興真宗之後元也其三月今上卽位例遷工部侍郎八月驛召公還拜翰林侍講學士俄知審官院仍判國子監復知通進封駁事兼羣牧使會修先朝實錄以公有胥臣多聞羊舌肸春秋之習命參其典領尙書公寢病也朝廷知公孝特許乘傳視疾再宿至汶上實錄成就遷刑部及尙書公齊終公號慕耀毀尋詔奪服公固願終喪上命貴臣敦諭公不得已還都復舊官頃之兼判太常寺及禮院再知審官院以久次授兵部權吏部流內銓又兼龍圖閣學士質茶轉貨法久而敝計臣欲捷囊橐權浮淫實繁參定以興長利初公之勸講也不避亂亡臨文未始爲諱有可以規益順諷者必諄諄爲上言之掇五經之切治道者爲經典徽言五十卷奏御繪無逸篇爲圖願置使坐爲位空觀省之助時母闈輔政五日一御事公因言古之帝王朝朝暮夕未有曠日不朝者也陛下春秋鼎盛宜日御前殿見羣臣發揚健粹覽照治本而上方奉養長樂故謙讓未遑也于是公年七十因請問祈致所事上章者三皇帝與莊獻太后特御承明殿存諭數四公頓首且言勸導無狀以暮日希遠途恐不能自還無以塞責乞全首領爲陛下之賜因泣數行下上亦惻然猶詔公與今龍圖閣學士馮公元講老子三章又命今禮部尙書晏公殊讀唐史是日各賜帛二百匹後數日制詔報公果不得謝更求近郡上乃從焉改工部尙書以本職復爲兗州且命須小會畢乃得辭待禮復數月請行數矣乃晏于大清樓樂園上出御飛白書宰府樞臣大字軸各一學士以下小字軸各二惟公與文元大小兼賜

焉。朝廷榮之。竝詔賦詩述所以優待師臣之意。明日詣承明謝。且陳將奉違帷幄。上亟命取老子講如前章。旣罷。仍有具衣釘帶材馬之錫。及治行也。又宴瑞聖園。就賜御製詩一章。復詔近臣爲詩以餞。議者謂漢疏受。桓榮。赫烜寵光不克過之。明年耕藉。改禮部。公爲政多惠利。嘗奏復濟瀆故道。濶其鍾水。濟鄆之田。微公其魚。所至興儒學教導。不純用法律。有足大者。事皆責丞史掾屬。總綱目而已。人皆宜之。不見爲治之迹。明年以病自乞。上知不可奪。乃聽。遷太子少傅歸老。夏五月疾篤。戊子移居正寢。命子孫曰。明日禺中吾當逝矣。且吾在仕途四十年。訖無悔尤。乃今奉遺體終牖下。君子其以我爲知命。口占遺奏。正不以家事爲言。又謂子瑜曰。逮吾屬纊。當無內姬妾。獨若與孫在。庶不死于婦人之手。己丑如期而薨。訃聞。天子廢朝震悼。以左僕射策書驛告其第。延其賞于子及孫二人焉。贈贈稱之士之仁且賢者。莫不相弔。徽數令名。泊終竝榮。夫人天水趙氏。以平原郡追啓湯沐。三子曰瑤。仕歷司虞。止員外。曰琪。止衛尉丞。曰瑜。今爲殿中丞。公于學無不該總。精力彊記。絕人遠甚。以爲禮莫大于祭。故受詔次宋輿以來郊廟容典。爲崇禮錄。祭莫尊于天。故本其六名。實則一帝。是康成排王肅。彷彿千載。貫諸儒之論。爲南郊奏樂莫盛于雅。故哀羽萬同律。爲樂記圖。孝莫重乎喪。故援古塞違。爲五服制度。五經之學。章句數十萬。後生佔畢。厭苦其說。故作五經節解。刪去盈辭。又請以劉昭後漢志裨范史之闕。尙書釋古文以檢攷今文。謂孟子附聖立書。莊周根道德之論。律有學科。宜竝刊布。又同定論語爾雅義疏。皆鏤槧垂久。唐明皇刪定月令。



自竄新意。其事淺而不篤。公乞復康成舊註。還其篇次。議雖中格。禮家駭之。在內閣也。真宗賜歌詩俾之。次韻。公屢辭。不聽。乃有賡載集。資質詳審。進止如有寸尺。無僂言邊色。接誘士類。侃侃如也。或以奇衰。愧之。則玉色山立。不得而撓。然志尙隱約。器服塵素。不徼福于神。不愧辭于人。善推己以恕物。不格物以己長。讓夷損怨。稱爲長者。尙書公之疾革也。公舐潔其面。以代頹御。未始就子舍。褫衣帶。養者以爲難。安車之還也。日延鄉老道。舊爲樂。先時。邑子或從公家。宰貸息錢。濟劑券紛紜。酒酣。公命折而焚之。凡散數百萬。其推穀士。不進不止。成就諸儒甚衆。而馮公元諫議大夫。孔公道輔。先顯。公爲內閣。馮甫從。初命入太學。不十年。抗尚憑。侍金華。與公同列云。至于日月獻納。便宜施行者。存于有司。伏青規。祕阜囊。則詭辭焚。橐外無知者。嗚呼。公有黃中通理之才。服勞累聖。發舒事業。旣光大矣。第不登三事。養九德。寧天齋。公纊而不使盡耶。將人匱公。賜而弗及庇耶。知與不知。咸爲公恨。卜竊有日。節惠茲在。敢摭雅行。告于有司。謹狀。

### 楊太尉行狀

楊崇勳。字寶臣。年七十。公之曾高。燕薊人也。家習武經。世封勇爵。暨先正令公。事太宗皇帝。親信甚篤。謹幹見稱。濟美流芳。至公而盛。公氣貌溫偉。志懷沈毅。由弱齡而遇主。逮晚節而還政。休有令聞。譜牒存焉。公年十一。以父故。補東班承旨。時真宗皇帝方居潛邸。須忠實聰悟者以充左右。公與李永力同日中選。

特賜今諱。至道三年三月，太宗上僊，眞皇纘極。公授右侍禁。咸平元年二月，改西頭供奉官。七月，充寄班祇候。三年春，均寇乘間，益部罹患。命公馳傳，被受公事。四年正月，賊平，授內殿崇班。銀青光祿大夫，檢校國子祭酒，兼御史大夫，騎都尉。五年，加檢校右散騎常侍，封王城縣開國男，食邑三百戶。景德元年八月，授供備庫副使。二年冬，加檢校左散騎常侍，進封開國子。十二月，授香藥庫使。四年春，駕幸西洛，恭款諸陵。命公爲行宮四面同巡檢。大中祥符元年正月，進封宏農郡開國侯，食邑五百戶。十二月，升功日觀。熙事旣成，授東八作使，加食邑三百戶。三年，順祀蒲中，精禋臚上，回鑾衛闕，推恩綿宇，授尙衣庫使，差勾當翰林司。六年，天子按蹕渦曲，恭款道宗，又命公爲行宮四面巡檢。七年六月，充羣牧都監。十二月，授西上開門使，羣牧副使。天禧元年二月，旅款羣眞，對越世廟，嚴祀云畢，恩章載舉，加檢校工部尙書，上輕車都尉，食邑三百戶。十月，授依前檢校工部尙書，左武衛大將軍，使持節，節恩州諸軍事，恩州刺史，充樞密都承旨，兼羣牧副使。尋差提舉點檢樞密院通進銀臺司公事。且國家設鴻樞銀臺之司，素稱繁鞅，自公之兼幹也，日無留事。時稱得人。三年十二月，授檢校刑部尙書，左驍衛大將軍，上柱國，食邑三百戶。四年二月，授英州防禦使，充侍衛親軍，馬軍都虞侯，并代州管內馬步軍副都部署。卽日改授客省使，依前英州防禦使，兼羣牧副使，勾當三班院皇城司，兼管勾開門四方館公事。眞宗皇帝初以兵寄之重，無甚并代。公旣受帝命，以潛邸心膂之臣，公實一二焉。故左右侍對，必藉其良。卽日故有典客之拜。庶令日侍軒陛，用

爲腹心。時今上方正重明之位。實居繼照之盛。有皇城司聯事者。周懷政竊構邪黨。將危大智。陰謀已成。兇言遽露。公盡忠是務。密疏其由。逆豎就擒。禁闈不擾。非先帝知公之忠厚。置公于左右。則何以得兇悖彰敗。宗社延永。故獎詔溫密。增秩優隆。八月。以功授鄧州管内觀察使。金紫光祿大夫。檢校司空。使持節。鄧州諸軍事。鄧州刺史。兼御史大夫。上柱國。宏農郡開國公。食邑二千八百戶。公屢陳讓奏。冀寢恩章。尋改桂州觀察使。充內客省使兼羣牧使。乾興元年。加食邑七百戶。會上出震居尊。慶澤流布。加檢校司徒。彰德軍節度觀察留後。食邑五百戶。食實封二百戶。三月。差知陳州軍州。兼管内堤堰橋道勸農使。十二月。除殿前都虞侯。充真定府真州等路馬步軍都部署。天聖二年二月。敕差權定州軍州事。二月。召還。授侍衛親軍馬軍副都指揮使。加食邑五百戶。食實封二百戶。三年十月。授殿前都指揮使。振武軍節度勝州觀察處置等使。加食邑七百戶。食實封二百戶。十一月。加食邑五百戶。食實封二百戶。賜忠果雄勇功臣。五年十二月。侍祠圓丘。迴輿廣內。加食邑七百戶。食實封三百戶。加忠果雄勇宣力功臣。七年九月。加檢校太保。充鎮南軍節度洪州管内觀察處置等使。依舊殿前副都指揮使。加食邑七百戶。食實封二百戶。八年十二月。加食邑七百戶。食實封三百戶。加忠果雄勇推誠宣力功臣。十年八月。授宣徽南院使。兼樞密副使。定武軍節度定州管内觀察處置等使。加食邑七百戶。食實封三百戶。改賜推忠協謀同德佐理功臣。蓋公之總禁旅也。前後十稔。軍政日新。宸眷彌渥。朝議惟允。迺有是拜。以旌其能。是月。命公充修

葺大內副使公督茲大役。曾不愆素。落成之日。賞典遂舉。明道元年十一月。授檢校太尉。山南東道節度襄陽管內觀察處置等使。依前宣徽南院使兼樞密副使。加食邑七百戶。食實封三百戶。賜推忠協謀同德守正佐理功臣公。簾前曲謝莊獻皇太后。諭以先帝言楊崇勳忠直。堪于大用。十二月。授樞密使。二年正月。加光祿大夫。食邑一千戶。食實封四百戶。十月。授同中書門下平章事。充河陽三城節度孟州管內觀察處置等使。判陳州軍州兼管內堤堰橋道勸農使。加食邑五百戶。食實封二百戶。賜推誠保德崇仁忠亮翊戴功臣。景祐元年八月。罷中書門下平章事。依前河陽三城節度使知壽州。以懷政仲弟累陳雪奏故也。二年十一月。加特進。食邑七百戶。食實封三百戶。十二月。移知亳州。蕃錫之目。倍越常鈞。仍給帑金以增公費。五年四月。移知陳州。時元昊大爲邊梗。公屢貢囊封。罄陳方略。上以公先朝心膂。多所采納。以手詔嘉獎。練將之盛。實有力焉。寶元元年十二月。加開府儀同三司。食邑七百戶。食實封三百戶。慶歷元年十二月。加食邑七百戶。食實封三百戶。賜推誠保德崇仁忠亮守正翊戴功臣。二年三月。上以夏寇未息。朔人頗駭。敵衆恃強。寢違誓約。驛詔歸闕。召對之日。上曰。以卿諳練師律。素推威望。付以兵寄。屬于老成。迺授公同中書門下平章事。依前河陽三城節度使。判定州兼眞定府定州等路駐泊馬步軍都部署。下車之日。朔人聿寧。講練周嚴。器甲精設。北鄙傳聞。族衆驚懾。十二月。以諸羌納款。二邊徹警。移判鄭州。公夙有末疾。艱于起居。因抗疏引年。乞骸歸第。上優詔從之。三年五月。授依前檢校太尉。左衛上將軍。

致仕。四年十二月，加食邑七百戶，食實封三百戶。改太子太保致仕。以五年閏五月二十四日，疾終於清平坊之私第。上聞訃，惻悼，亟選中貴人監護葬事。諸孤以公當屬纊之辰，有厚葬之戒，由是泣懇，獲寢其命。翌日，遣內司賓至第恤問，厚加賻賜，特輟視朝二日，仍贈太尉。某月某日，葬于祥符縣鄧公鄉公家原。祔于先塋。公凡三娶，始嫡夫人王氏，次娶夫人姚氏，次娶夫人田氏，皆先公而亡。男十二人，長宗讓，崇儀使。次宗詡，右班殿直。早亡。次宗說，開門通事舍人。次宗誨，內殿承制。次宗識，內殿崇班。早亡。次宗謹，內殿崇班。次宗諤，東頭供奉官。次宗誘，內殿崇班。次宗誼，東頭供奉官。次宗諫，東頭供奉官。早亡。次宗詰，東頭供奉官。次未名而夭。公凡五加功臣，至推誠保德崇仁忠亮守正翊戴，系階至開府儀同三司。勳至上柱國。爵至開國公。食邑一萬四千二百戶，食實封四千五百戶。公才謀周遠，器識宏敏，生而羈孤，幼而惠悟，嘗私嘆曰：若目不識字，手不解書，至于成立，何顏自處？由此勵志向學，勤求師友。一日，公與張侍中耆輩侍立次，真宗皇帝謂曰：知汝等好學文字，若能如此，吾當親爲教授。公等對曰：實有志矣。乃謝于庭下。自茲命張侍中爲學長，張景宗觀察爲副學長。公與夏太尉守贇爲學察，安團練守中而下爲學生矣。帝授以孝經論語詩賦，又教以虞世南字法。公自此旁通經史，周知韜略，附雲龍之會，親日月之光，備四方之驅策，受四聖之簡注，戎夷之納款也。則七命爲館伴副使，郊祀之展采也。則屢擢爲行宮巡檢。其或風聞利病，時政闕失，莫不便殿請封，論列移晷。故相國王沂公、呂許公，深相器重。公六藝之學，射御尤精。每信

使通歡射圃錫宴。上必命公陪。其引滿中的。邊庭歎伏。至今稱之。公乘馬政之年。會有上言者。願以廢駟市。取其直以資國困。宰弼將從其說。公耳聞矣。心畫素周。獨于當宁之前語以忘戰之理。帝深稱賞其言。遂寢。其不畏彊禦。面折廷諍。率多如此。咸平景德中。敵騎南牧。宸輿北征。常委公傳令邊帥。協謀禦寇。公乃戴星將命。間道徒步。達于諸壘。諭以機事。涉茲危阻。人推其功。又命公固守澶淵鉅梁。時朔方之民。攜老扶幼。晝夜南渡。恐在其後。公繇是求善涉者數十輩。預防其溺。迺有墜河流而得拯者。不可勝紀。公七歲時。已失姑妣。伯氏撫鞠。而得其所。無何。腰足中寒。以至不舉。雖勤詢醫劑。且久而罔驗。一旦。有高僧自至其家。迺曰。公曰。斯奇童也。而有斯疾也。于懷中出圭角之藥。傅之苦所。涉數日間。公蹶然下榻。趨走如昨。後訪其僧。了不可得。故公喜蓄方書。用施湯劑。垂死之疾。獲生者衆。部下官屬有亡歿者。公悉以俸金備其襄事。孤遺還鄉。道塗獲濟。其行陰惠也。又如斯。公家有藏書。積萬餘卷。修職之外。研味忘倦。尤嗜白翰林集。公因詮次樂天自未三十歲至七十五所著歌詩。凡八十一篇。目之曰。白氏編年集。公自製序。手寫其集。傳諸好事。公凡歷四鎮。所至之邦。祇率教條。勤訪民隱。壽春富庶。號爲難理。有積年狡訟。前後不斷。公躬加裁決。共稱平允。曹事清簡。吏民宜之。公寬中而多恕。在貴而能降。言不妄發。談必諧理。奉身以約。撫族以睦。親屬孤露。必加周恤。朋執故舊。不忘平生。歷事三朝。踐揚二府。名遂身退。善始令終。若匪負不世之才。遇非常之主。明誠事國。純仁保位。其孰能至於此乎。方就遠而從吉。宜攷行而易名。敢述令猷。

用資清議謹狀。

石少師行狀

公諱中立字表臣年十三居僕射喪毀而慕僕射有功于太宗朝數欲倚爲相會薨甚悼痛詔公自褐衣爲西頭供奉官方功臣子飾輿馬衣服相夸詡公獨折節從儒者游稱道六經百家之言年十八獻文于朝換光祿寺丞賜銀緋三邊殿中丞推家貲與諸父一不靳愛後姻屬相閱恨更引公爲證公辭不答遂以孝讓聞眞宗咸平三年以本官直集賢院與號略楊億中山劉筠穎川陳越成紀李宗諤相厚善億工文章采緝閎肆彙類古今氣象魁然如貞元元和以此倡天下而爲之師公與劉陳數公推轂趣和之旣乃大變景德祥符間號令彬彬謂之爾雅而五代之氣盡矣朝廷有所論議公與諸公未嘗不在善讐書不妄下朱墨凡祕書更公手者皆爲善本改祠部員外郎判三司理欠憑由案進刑部賜金紫以兵部爲鹽鐵判官以禮部郎中判南曹移戶部勾院上卽位遷戶部充史館修撰糾察在京刑獄初公與并肩踵武者後往往至達官或且物故公獨巍然與新進治作文書無纖芥舛望士論高之天聖四年始以吏部郎中知制誥俄知禮部貢舉歷判集賢知審官院爲契丹國信使坐舉官不以狀罷修撰糾察司數月復糾察轉右諫議大夫給事中知通進銀臺司門下封駁事景祐元年爲翰林學士判祕閣轉禮部侍郎加承旨兼龍圖閣學士半年擢拜參知政事公于臺閣舊章多所練達性慎密爲上言天下事旣出未嘗顯

斥臧否。不多取名。故稱爲長者。明年。以戶部侍郎罷爲資政殿學士。判尙書省。久之。轉大學士。遷吏部。兼提舉祥源觀。慶歷四年。致所事于天子。除太子少傅。聽謝。皇祐元年。轉少師。某年八月某日。薨。享年七十八。贈太子太傅。公精識遠照。盡性命之理。故未嘗問通塞久遠。所至樂善下賢。雖非輩行。猶與之鈞。當功名之地。人取我否。不爲人所媚嫉。夫怨悔不加諸己。雖哲人猶病之。歷二十官。五學士。皆久次。平除晚節。乃參機務。其恬于進取。不靳黨助。如此。初。家產歲入百萬錢。公旣好賓客。諸有名士與之游。盡取爲酒食費。略盡。稍稍廢減。亦不增殖。末年所入歲纔二十萬。捐館之日。家人不能庀喪具。當公之病。天子憫其貧。賜銀三百兩。蓋古人所謂清者。如公等非耶。公之子國子博士從簡。以哀死。苦次。亦世服名教者。今葬日薄。禮有易名。用哀遺懿。上之有司。謹狀。



# 景文集卷六十二

## 行狀

張尙書行狀〔案〕狀在天禧四年。祁時年二十四。尙未登第。疑屬代作。

張詠字復之。年七十。惟公稟尊嚴之氣。凝隱正之量。粵在鞞鼎。不偕兒曹。嶷然志嚮。高自標置。始就外傅。卽覽羣經。書必味于義根。學乃知于言選。家貧無以本業。往往手疏墳史。每有屬綴。輒據庭樹。槁枝而暝。苟不終篇。未嘗就舍。礫若多節。默表大廈之材。居然晚器。弗示良工之璞。太原王搏名知人。見公。憮然異之。獨謂公曰。唐魏文公本生此鄉。故老有言。後五百年。復出一佳士。元精回復。祭酒當之矣。公謝不敢當。與國四年。始游鄴下。與故上谷寇公準推轂引重。時屬鄉里。命秀方國試言。府將雅欽公名。議爲舉首。夙儒張覃者。悃悃有行。疏略少文。公卽以檄謁府。盛稱其長。覃終得薦。公爲之下。藁茅有吉。爵砥相先。讓夷之風。一變河朔。明年。進士及第。釋褐大理評事。知鄂州崇陽。尤厲風節。大江之南。民裕文敝。囚以手而上。下獄爲人而重輕。公廉知其狀。痛繩以法。精力于職。擿伏如神。洗其鏽薄。鎮之忠厚。吏樂其職。多一笑而歸休。民協攸居。或減年而從役。就改將作監丞。著作佐郎。解秩。授太子中允。關掌麟州軍事。夏臺弗靖。西戎方強。公繕起亭障。精明烽火。坐贊叔敖秉羽之策。多參嫫姚穿域之樂。伐謀取勝。四鄙以安。端拱紀元。

天田躬耕。轉祕書丞。明年充禮部考試官。已事。復倅相州。一懼之年。宜爲親解。百斤之贖。終以懇辭。乞董濮上市征。以便迎養。詔可其奏。月餘。召賜五品服。知浚儀縣。俄爲荆湖北路轉運使。事不諉上。世咨其清。劾罷太守姦賊疲悞者十數。悉條所部廢格抗敵者百餘事。稜威所振。吏皆股栗。察廉使上其理狀。纘書褒美。三年。遷太常。爲郎中。再旬。乘驛赴覲。加錫金紫。翌日。遷虞部。爲郎中。再旬。授樞密直學士。賜錢五十萬。判銀臺通進司門下封駁事。兼三班院。河東大將張永德小校犯法。因笞而死。詔按其罪。公卽封還制書。白上曰。永德爲獮牙爪。居天下勁兵處。若以一部曲摧辱主帥。臣恐下有輕上之心。上不納。因不關銀臺而下書譴讓。未幾。果有營兵脅訟軍侯者。公復爭前事。上輒優容謝之。會賊順緣間。坤維搖亂。偏師數萬。鼓行而西。太宗以爲潢池弄赤子之兵。荆棘生大軍之後。疇咨上輔。崇簡守臣。參預武功。蘇易簡白上曰。某甫可屬大事。當一面。若奉將威命。降諭劇賊。陛下高枕永無西顧之憂矣。乃命公知益州。揆日占謝。賜白金一百四十斤。鴻卿出郊。不復內御。子顏引道。初無辨嚴。朝家方以大師未集。留之半歲。公潛簿所賜。上還長府。其秋。遂詔赴部。公終不復言。至道二年。改兵部。猶爲郎中。會丁新昌郡太夫人之喪。恩詔奪服。陽秋之義。不以家事爲辭。禮經所執。亦推順變之大。真考嗣歷。邇臣均需。卽拜諫議大夫。歸朝。還給事中。戶部使七旬。拜御史中丞。咸平二年。知貢舉。杜絕書謁。時稱得人。夏。改工部侍郎。知杭州。五年。移京兆。明年。轉刑部。復爲樞密直學士。再知益州。尋加吏部。猶爲侍郎。景德三年。罷歸。領三班。登聞檢院。奉朝請。

先時生瘍于腦。至是弗損。歸家第。賜環中造適。移狀言上。酷請外藩。尋知金陵。兼江南安撫使。岱宗成禮。改尙書右丞。昇入。以秩滿願留。卽拜工部。汾雁飲至。又進禮部。皆爲尙書。疾劇還臺。求訪高手。游刻需頭之奏。願遂角巾之游。魏舒之先行後言。人無知其去位。平津之何恙不已。詔益勉于存神。依違半年。必于得謝。上不獲已。出公知陳州。以大中祥符八年八月一日。齊終于理下。享年七十。嗚呼。景命弗究。宗工其萎。如仁均哀。殲我何贖。邦人改祠而爲諱。道路舉音以過喪。真宗聞訃震嗟。追贈尙書左僕射。以天禧四年十一月二十七日。權窳于陳州宛丘縣孝悌鄉謝村焉。從宜也。公始娶夫人唐氏。卒。繼室以太原郡夫人王氏。卽河陽節度使顯之女。允執婦道。以佐君子。後公三年而歿。子從質。以父任累遷至衛尉丞。居公之喪一月。以毀而夭。女一人。適故內相王公禹偁子嘉祐。母弟說。以公延賞。今爲虞部員外郎。孫四人。曰約。曰綜。曰綽。曰紳。咸以忠厚世其家。公階至正奉大夫。勳上柱國。爵開國公。食封戶三千七百。實戶四百。其大較也。公姿宇爽邁。謀謨沈敏。道駕俗表。氣籠霄極。任節俠。已然諾。不窳不樞。如玉如瑩。修詞立誠。博見強志。鄙書兼兩。賓蓋成陰。佐郡被邊。遭時右武。八螳封而試馬。回策若縈。張狸步以射侯。舍矢如破。總物纖密。紀人遠甚。及司封駁。則詳言粹議。有任隗之沈正。總臺憲。則摧紆觸佞。有傅咸之剛簡。治益部也。宿師屯結。縣官乏食。椽史博手。狂狡啟心。公乃賤售盆鹽。翔貴困米。貿遷鍾豆。諷告鄉縣。民或妄言沮公。公斬之以徇。自是見糧大集。戰士倍氣矣。自不逞挺亂。重城晏閉。主帥王繼恩。上官正。頓師入保。埋根不

進坐失脫免之。拒居若賈胡之留。公以爲將不親行。衆不可使。乃勸正自當一隊。以賈羣勇。正許諾。行有日矣。公慮其不進。於是椎牛宿帳。具出餞之禮。中坐酒酣。親舉屬軍尉曰。爾曹俱有親弱在東。蒙國厚恩。恐無以塞責。此行當直擣寇壘。盡其醜類。平定之日。東向以報。日見朝廷舉萬年之觴。豈不快耶。若猶老師逸囚。疲民曠日。卽此地還爲汝死處也。正由此東行。梁入詭道兼進。殊死鏖戰。盡俘凱旋。公乃出車勞勩。縱金大會。以次論獲。先命行賞。皆伏公氣決。不敢迎視。繼恩帳下卒。緹城夜逸。吏執以告。公惡與繼恩不協。卽命執投晉井。一府無知者。先時劫掠之際。誣染尤衆。脅從有狀。歸訴無階。各保營壁。共懷猜貳。公以爲鹿不擇音。旣亡生路。蟲入其腹。懼益厲階。亟下移符。鐫說魁宿。宥其枝黨。縱歸田里。譬以大恩。訖無敢桀。及再任也。屬六羸南牧。靈旗薄伐。公慮遠夷爲變。欲出奇以勝之。因取盜賊之尤無狀者。磔死于市。凜然人望。遂臻靖嘉。每吏牘便文久不得判。公率爾署決。人皆厭伏。罰旣值罪。按無度情。蜀中喜事者論次其詞。總爲誠民集。鏤墨傳布。雖張敞之爲京兆。時時越法縱舍。黃霸之守潁川。人人咸知上意。無以過之。牧餘杭也。遭民洊饑。方蜡不啓。稻蟹無種。原田若藝。民挾鹽利。以冒公禁者。日數百輩。公一切笞遣。不徇蘇法。邏戍入啓曰。法亂如是。人將安禁。公勞之曰。餘杭十萬戶。饑者七八。弗挾鹽利。無復生意。若暴禁之。彼將圓視衡擊。以擾居者。則爲禍大矣。爾曹第忍之。俟其歲定。則大守復以三尺律從事矣。是年雖歉。人無泛命者。(案)文翰類選作從命。富家子與婿分財不協。詣府廷辨。壻曰。彼先子有治命。壻七子三。因出遺札。子

不能舉其契。公索酒酹地曰：彼父智人也。當死之日，子方冲孺，託養于壻。苟子有七分之約，則亦死于壻手矣。今當七分歸子，三分歸壻。于是二人號慟，以爲神明。公之操決，率類是也。原其遇二聖也，以功名自任，故力與命偕，顯八座也。以方格見信，故言與行危。本乎直清，貫以忠恕，無乞靈徼福，無人非鬼責。履重剛不險，臨大節不奪。葵藿弗采于猛獸，山川寧舍于駢角。若夫安世之恨謝，翁歸之滅私，大有之文明，小雅之愷悌，公皆兼有其美。惜其未極柄用，遽愆賤理。上欲以爲相者數矣，天之不憖也。悲夫！公雅好著文，深切警邁，以不偶俗尙，自號乖崖。公尤善詩筆，必覈情理，故重次辭能詩。序之曰：放言旣奇，意在言外。議者以公自道也。生平論著，仲氏誄集之成十卷，以行于代。內外婦之日，無摺膺之妾，無雜弔之賓。終齊事而乃暝，取禪書而頌德。漢廷諸老，恨王駿之不侯，天下之人，爲隴西而流涕。斯非遺愛遺直，立功立言之極歟。敢摭令猷，以須史闕。謹狀。

### 馮侍講行狀

馮元，字道宗，年六十三。公之先平始人。四代祖官廣州。唐末，關輔亂，不敢歸，而劉氏據南海，僑斷士人。故三世食其祿。太祖定交廣，公之禰本劉氏，曰：御國除始爲王官，授保章正。老病免，遂占數都內。公少嗜學，保章君不欲公疇其業，使從故僕射孫宣公授五經大義。又友博士崔頤正，逮冠，彊立博覽。外嘵嘵若不足，中敏力甚。自經典故訓，祖襲師承，穿穴荏楹，皆能駕其說，浸弄翰爲詞章。默而有沈鬱之思，出入服襲。

衣習矩步。如大賓祭。鄉人化其謹。至以俚語諺之。不妄交游。惟樂安孫質、吳陸參、譙夏侯圭、相友善。三人皆直諒而材。故號四友。家貧。盛冬無薪燎。夜輒市瓶酒。與圭對經研推。一再酌以自溫。或達旦不眠。真宗大中祥符元年。由進士調臨江縣尉。再其罷。會講員缺。詔令集吏能明經。得自言試可。公往應令。時諫議大夫謝泌領選。精果有風鑿。見公儒者。嘻笑曰。吾聞古治一經至皓首。生能盡善也耶。對曰。達者以一貫之可矣。謝奇其對。因挾精義疑晦者。廷問參詰。公條陳詳諳。言簡氣愿。謝抵掌嗟伏。即日聞上。授國子監直講。由是名震京師。公卿大夫家爭欲屈公授道者。久之。遷廷尉平。又兼崇文院檢討。其八年。程覆俊選。公待詔殿中。帝讀易至泰卦。命說其義。公既道繇象云云。因本君臣感會所以輔相材成者。帝悅。賜五品服。稍親近之。禁中建龍闕閣。皮藏祕冊。置學士待制等員。爲搢紳譽處。時帝用尙書工部郎中李虛己。兵部員外郎李行簡待制。是時。公仕資淺。故以太子中允直閣事。閣蓋由公始。數召入。與二李賜清問。說易盡上下經。帝嘗稱公誦說通而不泥。言外自有餘趣。非專門一經士也。俄改三品服。天禧元年。以諫議大夫假節使契丹。還。遷太常丞。兼判禮院。吏部南曹。先是。今上在儲闈。帝欲得肅艾長者。使之勸學。訪于宰相。時太尉文正王公以公對。或者謂公年差少。罷不用。更用博陵崔遵度。四年。遵度卒。帝即擢公左正言。兼太子右諭德。代其任。他職如舊。初。文正聞公名而未之識。一日。召至第。先使諸子質經義。密視其人。淹粹亮格。乃自見之。授以老子。他日。令詣府。與執政衆試。已而爲帝言數矣。故公之顯。文正力焉。公由孤生。

挾儒術進。出入十餘年。銷玉華綏。與諸儒獻歌頌。數得進見兩宮。所以褒禮。賜予尤渥。便蕃光明。爲時宗國器。當世休之。今上嗣位。改尙書工部員外郎。升爲直學士。兼侍講。未幾。孫宣公亦入露門。執經遞進。公得孫同列。以爲寵。孫得公。亦自以知人爲多。兩人提衡諷導。上益嚮學。俄兼會靈觀副使。知通進銀臺司。兼門下封駁事。天聖元年。判登聞檢院。明年。判國子監。三年。改禮部郎中。五年。同知貢舉。時天下偕計參倍。公協力程綜。片善必錄。雖鈞捶臬平。不訂其公。未幾。正爲學士。當是時。天子念先帝盛烈。裁定信書。爲一王言。故貳卿中山劉公筠。今資政殿學士常山宋公綬。丞相潁川陳公。同領史事。已而丞相爲開封府。浩穰劇三輔。乃罷史官諸公。亟以公請。詔從之。書閱兩朝。論次筆削者衆。至是。褒懲謹嚴。近古風烈矣。其十一月。燎祭南郊。爲鹵簿使。七年。召入翰林爲學士。凡三禁職。皆天下選。而公兼有。且優爲之。又判尙書都省。俄爲三班院。歲餘。改吏部郎中。八年。以國書成。進諫議大夫。充史館修撰。九年。爲吏部流內銓。兼羣牧使。明道元年十月。旣考室。謝享宗廟。又爲鹵簿使。以赦令例遷給事中。明年。耕籍田。使任如廟禮。俄爲莊獻莊懿二太后園陵鹵簿使。前此莊懿之未祔也。塌都城右郊。公嘗假鴻臚護其葬。及梓宮之遷。斥土沮溼。近戚詆公監視亡狀。十月。解翰林學士及侍講二職。出守河陽。辭得見上。但頓首引咎。自請治郡。滿三年。奉計以報。會太學官屬叩丞相府留公。柄臣悔。欲弗遣。公固願行。到部。以清靜稱。不作條教。今左僕射王沂公自洛帥入覲。爲上言。馮某東朝雋老。不宜以纖介棄外。上亦意合。卽日馳傳召公。景祐二年春。

二月。至自河陽。改禮部侍郎兼翰林侍講學士兼知審官院。復判大常禮院。國子監。公既還朝。自以羽翼舊人。身託勸講。宜出入諷議。不苟默而已。乃獻金華五箴。弼違告猷。詞兼婉切。上納其戒。優詔答之。會上留意雅樂。閱經文殘缺。規創大典。夏四月。詔公領修樂書。俄復爲南郊鹵簿使。管祥源觀事。明年七月。書成。上號其書爲景祐廣樂記。特還戶部。賞勞也。公素有蹠齧。不堪趨拜。四年春。病寢劇。告未滿三月。會小瘳。公自力造朝。未幾。病復甚。氣上逆。害言語。後四月戊戌。終于正寢。上聞訃。震悼。以本曹尙書告其柩。賻錢三十萬緡。百匹。糲米。牢具。稱之。愍贈之所以優加。君臣之際深矣。公之配夫人周氏。封臨汝郡。無息。以兄之子大理評事諱爲嗣。公歿。夫人命諱以衰經。卽次于殯。東會詔到門。問公親屬。夫人卽表公遺命。詔可。擢諱衛尉寺丞。諱子二人。釋褐。竝爲將作監主簿。卹孤厚終之恩。乃如是。是其德已侈大哉。公自襁巾至捐館。進階及勳各六詔。爵五封。戶五加。而再實其食。如今署焉。志閒素恬。于仕進。無表襮之飾。雖當路諸公。牽賀弔一與衆往。異時不造也。門無雜賓。惟經生朔望承問。及搢紳道義交數人而已。接士以禮。雖新進後出。與之鈞。終日談便。惟謹。無虛言惰色。是以受詔八主戎客于都亭館。由慎恪以得之。不呼僧及道士。嘗執親喪。自括髮至祥練。皆按禮變服。未始爲世之所爲齋薦者。惟卒哭後。遇祭日。與數門生誦說孝經而已。罕語浮屠氏。亦不誦言排訾之。薰蒿禳祓。可以動氣。箴者皆不動。近不問家產增狹。晝治官事。夜還讀書。誓御亦簡其面。故能多識博練。自臺閣文書。故新品式。叢夥紛龐。有所咨訪者。咸能記之。太學。



楚關容臺三局。閱二十年仍其任。本公不愆不忘故也。尤精易及揚雄方部學。初公七歲。母夫人令授易。是夕夢公吞紺蓮。夫人旦而撫公曰。兒善讀此。後必貴顯。真宗果以識拔。晚年愈刻志。率三日一讀。又欲爲子雲諸首作章句。且患宋衷陸績范叔明宋惟幹漫漶舛馳。思盡黜之。最後得唐王涯註。以爲差近。先作釋文一語。欲遂因王說而補正之。亦終不果。公嘗預注先帝集。同修鹵簿記。校後漢志孟子及律并義疏。采獲是正。多得其真。同修玉牒。分撰國朝會要。未克就。生平著述無編次。家人搜摭。得數百篇。精緻平粹。及在禁署。益邇雅。務爲溫純。而采加焉。居三城。作詩百餘章。推己指物。曠而不怨。有雅人餘風。性寬厚多恕。當官下。未嘗以罪平鑄吏。吏亦畏其明而安其仁。樂道人之善。好與人爲善。每議事。不肯自意出。大者薦之二府。小者與其屬聯請。類多不可紀。公一無建白者。其遠名若此。然內剛有守。不流于衆。初善音者。取上黨黍。縱累爲尺。因裁十二律以獻。遂改大樂鐘石以合其私。老師宿工皆首鼠不敢議。後有建言其非者。上未有以決。遣中人卽太常下舍問公。新樂以縱黍定尺。寧有非耶。公卽擿班固律歷志唐令兩說付中人。因對古者橫黍度寸。今以縱亂橫。其法非是。中人馳入。明日上坐邇英閣。語公曰。向攷正大樂。患其寢高而急。今也下而緩。二者一得其中。失在律。卿言是矣。因出橫黍新尺示羣臣。比縱尺差二寸一分而弱。以校衡斗皆不讎。當是時。微公言。幾無發其謬者。假有之。果且不能取信于上。傳曰。仁人之言。固溥而利。歟。公前歿三日。屬于一二僚。執曰。吾仕願素足。今無一私以干縣官。惟是窳窳累諸君。已而得遣。

禮之文。諄諄納忠。訖無他語。用是中外尤痛惜之。公友隴西李公叔。勅故吏相讓以終事。嗚呼。公有王佐之才。不自顯。雖持囊珥筆。在省戶。爲名命。訓辭所出。裁十二三。使公當其時。稍自崖異。不難于進。益發素蘊。幸而十四五。且次人衡弼。不爲婆婆連蹇如今。章章矣。雖然。命有屈于公。公無不慊于道。使素概清埃。奮厲無窮。薄夫敦。夸夫懼。百世之後。呻簡想風者。以輩魯臧文仲。漢賈誼。董仲舒。此彼相易。寧自失得間耶。祁曩以胄筵儀範。刊綴音典。皆爲公屬。及此緒訓。又參聞之。故公治行之全。頗獲詳究。今日月有期。官在三品。法當得諡。謹用第述。上于有司。節惠受名。請遵故實。謹狀。

荆南府君行狀

(案)范鎮撰宋祁神道碑。中丞名紳。乾封令名騏。霍丘令名耀。荆南推官名玘。

宋氏本廣平望族。代有冠冕。中葉避地。始來浚都通州。府君事唐昭宗。位至御史中丞。坐法貶州司馬。子孫蕃衍。爲東畿著姓。乾封府君事後唐。歷晉漢。多爲劇邑。清尚素節。鄉品亡二。霍丘府君弱冠秀發。通王霸之術。是時諸侯據藩岳。招豪英。因感艱運。濡足當世。由是連應滄魏。究冀之辟。周世宗用兵淮上。鋪敦采入。府君自田里獻書。行在陳滅吳之策。世宗奇其材。拜真令。隨王師東下。而安輯之。淮人忘亡。遭內憂去官。宋受禪。銓符追集。調蔡州團練判官。謝病不行。俄而易簣。年四十八。先府君蚤孤。事母賈夫人至謹。諸兄以宦學。遠或千里。近或數年。乃還。惟府君朝夕瞻省。以孝聞邑中。里人邢敦。盤桓遯世。罕通謝問。獨以府君爲益者之友。治春秋三家。長左氏。賈夫人之喪。毀瘠如禮。年四十。親友勸以仕。始游京師。太宗端

拱二年明經及第。爲寧州襄樂主簿。時四方饑道數棘。外臺鄭文寶檄府君行部中。董索輸護。如令而辨。大見褒識。代還調江州司理參軍。慨然歎曰。是不足爲仁耶。位無大小。顧力行何如耳。因精思于訊鞠。爰書之間。屬邑尉邢積捕疑盜數十人。鍛錮周密。移之郡獄。太守李朝以證左明具。卽俾論死。府君疑有枉狀。因微挺囚械。物色以問之。囚對不讎。乃自白于朝。朝弗察。府君卽申牒。大獄四十日。所以防冤誣。盡情實。今旬甲未浹。不敢如教。朝大怒。居數日。鄰州獲真盜。自首于官。傳檄株送。朝執書。慙且駭。曰。掾其神乎。州界有行商。部輜重。夜徑澤中。將宿佛祠。值姦人前殺羣僧。廷內狼籍。商人入寺。蹀其血。乃覺。因輕騎。避去。曉逢邏者。見衣履有汗。執以爲賊。傳攷數獄。商遂自誣。府君以爲是輩操奇贏。舉千百計。胡怨而蹈死耶。因屏左右。誑以好語。商恐懼。辭卒不變。府君猶卻其獄。夜據案寐。恍惚若有人乘馬至廳事。自稱鄭使者。呼曰。誤矣。府君警寤。遽召侍卒。緩其繫。盡取成臈焚之。左右雜然謂不可。遲明。有姓鄭者詣官告其謀。盡獲支黨。商乃免。其慎諦精感如此。前後閱郡將數人。其間侍中文懿。馮公尤所欽待。殿省丞呂奉天峭刻臨州。少所推薦。器府君仁隱材幹。凡再加保述。居官八年。弗得代。時故貳卿文定趙公。以美俗使江表。廉其淹恤疾置。言狀。是冬集吏部。復掾常州。三考皆最。掌獄凡十年。所蔽數千。無一誣誘者。每有重辟。必持案諗囚。爾罪應死。盡召家人。使之相見。飭鬻衽席。時其早晏。未始妄加撈掠。須其情究意訖。然後行決。囚皆叩額感泣。旣誅。又爲人設一僧。使誦經懺罪。自是州人習聞之。其後囚每伏法。卒呼曰。若物化有知。

當爲宋府君作狗馬價厚德九江毗陵二郡父老至今能言之俄爲光州錄事參軍安州應山令江陵府從事府君謙謹修潔廉靜樂道薄于自奉裕于施物筭無兼衣案無累殺以己不知人爲疚不以人不知己爲恨冲猷隱量粹焉莫見其際恭于接士而不諂也力于事神而不祈也不援上以苟求不詭遇以取獲居六官更三十載結考十七訖無玷漏而開關棲遲終不獲遷力與命其相戾也雅性強記闇誦諸經及梁昭明文選以教授諸子遇家人嗃嗃嚴厲雖盛夏必正冠束帶居常諷梵書日十數過以爲常讀莊子內篇至金躍求爲鑊邪輒以訂己曰吾終不爲不祥之請其埋照含厚蓋性之也天禧元年調都下疾終于儆廡實六月二十九日同母昆弟七人長曰瑋終安州雲夢令次曰琚曰璩曰現咸先歿弟曰昱舉進士早世曰位終國子博士五合姓曰高氏曰二王氏繼以鍾氏最後朱氏朱夫人後府君十三年而終三子長曰邠早夭仲曰郊季曰邠邠後王氏出也郊邠鍾出也府君之歸全也朱夫人留止南方獨郊侍疾及斬馬在疚力不克葬乃權窆京城之偏後八年郊與邠皆進士及第嗚呼小子以治命之重不敢殞滅天假殘息興于畀丁孤苦之餘遭時樂育進服嘉會非府君之儲德憑厚義方清白之所庇疇能及此然祿之弗逮哀亦罔極幸天子推孝治之化篤襲親之典乃以天聖五年郊祀詔書一追贈府君爲太子中允封朱夫人爲壽光縣太君明道東耕再贈屯田員外郎追封鍾夫人爲潁川縣太君景祐二年圓丘禮成進加今贈今得吉卜于許州陽翟縣三封鄉之南原以景祐丙子孟冬之癸酉舉公之柩以鍾氏朱

氏二夫人合祔焉。恭惟先府君庸言成規，庸行成矩。凡有諸訓，皆可爲士林景法。而光靈寢遠，竹素靡傳。摧慟追懷，百不獲一。謹摺撫崖略，以備誌墓之實。謹狀。

叔父府君行狀(案)府君名位

府君少孤，逮冠喜遊俠，重然諾。居鄉里以風義自重。既而感曾高以降，皆用儒術進。始慷慨從學，通戴氏禮及周儀二書。太宗端拱元年，以經明釋褐補隴州隴安簿。再調虔州石城簿。代還以結課尤異，遷耀州觀察推官。州與霍丘府君嫌名音協，固乞改擬，不聽。秩滿，又調靜安軍節度推官。時故尙書任中正以時望鎮左蜀，幕籌郡政。一以咨之。府君敏咨而才，感知己之遇，罄露風力，助成綏輯。任公密啓其狀。冬，進改大理丞。出宰大名府朝城縣。以建封之慶，就改太子右贊善大夫。仍賜五品服。移宰河南之登封。祀汾禮畢，列進殿中丞。俄而通判麟州。又移鎮戎軍。天禧初，有司稽勞，轉國子博士。晚節連倅邊守，皆西陲勁兵處。邊土慘烈，寒中肌骨，腴肉銷盡，壯趾成災。及還臺，不能拜伏，輒取長牀臥里舍，痾瘵寢劇，遂臻大病。以天禧二年某年月日，啓手足于京師。前夫人王氏，後夫人孫氏，封長安縣君。皆前卒。子一人曰郁，以族父之蔭，今爲榮州錄事參軍。同祖兄六人曰瑋，終安州雲夢令。曰璩，曰璩，曰現，皆文行孝友，不及仕途。曰珣，終江陵府節度推官。贈工部郎中。曰昱，舉進士，竝先去世。府君最幼，謹按府君天資強濟，于法令尤邃。前後操吏治，詳民隱，文牘倥偬，羣慮眩而不解。府君一見皆唾掌立決，情得舒露，人人厭伏。故所莅之政，旬

未浹而聲已馳矣。使輅郡將爭爲薦寵。忠愍寇公撫全魏。聞朝城之政。恨知君晚。自本邑檄召權忒府事。欲日見音采。其爲名卿所欽挹如此。精心勁氣。老而彌壯。與江陵府君華顛從官。比諸昆最壽。而姿宇風韻。纖微克肖。雖近親昵友。或不之辨。逮末疾淹久。聞江陵之訃。因而易簀。孔懷之痛。可謂至焉。自稱諱以來。褒窳都外。由羣從而上。悉葬故塋。及府君。昭穆益卑。容竊無所。其孤郁與兄子郊等。別啓新城于許州陽翟縣三封鄉之南原。卽以今歲孟冬之癸酉。奉江陵及府君之柩。偶穴同兆。且以終手足之愛。從象數之吉也。幽礎辭刻。必咨宗匠。是用直敘官伐。概舉遺烈。不敢文致。以備論次之實云。謹狀。

# 景文宋公集卷第十六

## 律詩

### 官舍二首

南榮坐炙野人暄。官謗心知鶴有軒。畫餅竊名真不食。銜枚邀寵更無言。楚辭云：願銜枚以無言。常被君之深洽。 楮齋書篋

吹塵度。蔣徑賓。綦暈。蘇班。事國愛君情未已。此生踈躑負丘園。  
病骨支離釜粟豐。臥看曠采照牆東。不材天與山中養。飽食人嗤柱下工。大府翩翩慙奏記。閑齋咄咄戲書空。翛然慵態知難畫。手按鳴弦目送鴻。

### 試秩祕書省

見聚珍本卷二十三

### 景陵乾明院湖亭

見聚珍本卷十四

### 江上阻風

見聚珍本卷二十四

### 公齋植竹

對植同奇樹。扶疎對近軒。舊經梁苑賦。初結太山根。就簡供書刻。乘秋爽些魂。鳶風朝作籟。鶴露夜留痕。招隱宜先桂。忘憂可並萱。會當充鳳食。薦實帝家園。

中園殖叢蘆

我慙散質山中養。君結孤根江上來。相對中園兩無用。菰蘆何處有奇才。

樹柳

爲愛當年濯濯姿。動春搖霧不勝垂。條供越絕千絲網。葉鬪章臺半額眉。肯共桑榆悲日晚。寧同枳橘過江移。待君合抱相看歲。定是金城洒涕時。

答安陸龐掾

見聚珍本卷九

郡將夜醮分貺齋附見聚珍本卷二十三

春霽見聚珍本卷十五

黃注昆仲赴舉見聚珍本卷十四

俊上人遊山

股錫飄然指上方。翠微巖腹掩鷹房。江山極睇才多助。竿木投機戲有場。麝墨洗餘池溜變。玉礎清極茗華香。秋風莫負重來約。淨社霜蓮徧碧塘。

州將病免檄委郡事

郡將移書臥閣頻。假提千騎出班春。校中寧免時髦誚。欲作宣明面向人。



晚思見聚珍本卷九題作吏上

祇役道中二首

溼落無容物。嶽碕可笑人。唯當荷農笠。不稱薦華紳。宦味真韞鏤。生涯累水薪。窮途計安出。祇是有沾巾。絮亂東風急。花飛雜樹稠。離家王粲恨。贈婦彥先愁。樵浦連橋度。旗亭數蓋留。癡人了官事。歸約誤棖頭。

鄰郡移書覆獄見聚珍本卷二十三

郡界閔兩州將率官屬禳禱

劬農方狎野。燭旱嘆焦原。六幕沈雲族。千箱害稼孫。都人望天漢。國相閉陽門。盛怒風生穴。汗斜祝有豚。征徒休道樾。汲缶澗中園。米價高何許。癡人遂不言。

自詠見聚珍本卷十三

詠史見聚珍本卷二十四

過安陸舊居隣里相送見聚珍本卷十七

泌陽王介夫見聚珍本卷二十

兵部學士移鎮昭潭

檣拂南雲艤帛蘭。再麾湖外嘆違顏。封君比籍千頭橘。瑞祝標祠九向山。迎吏出郊驅弩箠。齊兵下席掩

刀環漢條緩布裘書降。後乘蒸青幾兩還。

孫景隨侍赴舉

見聚珍本  
卷十四

早濟江步

見聚珍本  
卷二十

夏日

六幕風輕書刻長。地形卑濕近南方。人揮羽翼依林樾。綆續金瓶下井牀。雲路飛鳶愁跼跼。玉徽流水怨湯湯。尸官盛府中乾甚。久飲臺冰未覺涼。

晚春至自襄陽

刀頭歸約月殘時。棐几流塵蒲兔枝。陰地雨蛙歎鼓吹。後園煙茗老槍旗。風回曲榭花英聚。泉潰坳堂蘚暈移。臥看屋梁周粟飽。不嫌五管號支離。

題僧惠昇壁

何年飛虎錫。此地鑲鷹房。水入禪心定。花飄供械香。高談犀飾麈。清嘖茗成槍。千騎嘗留此。籠紗照屋梁。

果政郡牧  
率留詩筆

漢南州將按行江涘以詩見寄

見聚珍本  
卷十八

南亭獨矚

在景陵  
見聚珍本  
卷十八

州將按行隄上

十萬隄封限迅流。騰裝清曉徑春疇。駐車楚老漿盈野。勸築睢陽杵有謳。梅暖晚香薰宿館。雪天零霰犯輕裘。桑郊尅日迎歸旆。遙認驪駒最上頭。

楊初歸九江

方領思歸集鶴庭。樵風千里漾舟舲。歌翻桃岸雙飛鵲。夢繞天鄣九疊屏。上苑昔游賦飄雪。故林良友望賢星。遲聞乙奏藂雲帳。紫桂官窠襲袂馨。

挾彈林下

見聚珍本  
卷二十三

楊備永嘉市征

見聚珍本  
卷十八

羈思

三年官牒託東侯。旌蕩危心斛貯愁。一命鴻毛徒許國。單身螢火若驚秋。

州舉俊民以藝中第爲詩馳賀

曾聯郡將署鄉書。目見函關賣出符。奏頌一揮雲落紙。賜袍三浴薰飄爐。高軒並照連乾錦。飲膳分頒葑莆廚。病幕日期迎畫繡。塵容甘預弩前驅。

聞新榜恩除異等輒成自詠

見聚珍本  
卷二十三

溪亭

規日平空晚。澄波極望鮮。簾飛故陶瓦。梁負會稽椽。戰綠低寒杜。漂紅泊晚蓮。黃昏無限意。江月對娟娟。

悼祚禪師二首

見聚珍本卷十一

獻外臺王侍御

見聚珍本卷十三

祇役鄰郡道中曉發

見聚珍本卷十四

七夕

見聚珍本卷二十四

送常熟尉錢訪

見聚珍本卷二十一

送楊偕太傅知淮陽軍

下拜親膺一札書。隋河風柂送行艫。曉辭漢署茅留蕝。暮聽廉歌袴換襦。方志貢珍傳磬錯。客庖羞品盛魚腴。雙旌引入柔桑陌。少駐驂驛捋美鬚。

送楊子奇赴辟潭淵

老避嘲師晝不眠。喜聞書辟冠初筵。車陪魏館鳴笳路。食對何侯下箸錢。使驛馬歸催露檄。學帷鱣墮晦餘編。知君此舉仲知己。寧似他人有一天。

送貴溪尉周懿文先輩

見聚珍本卷十八

送蒙城簿謝暉先輩

見聚珍本卷十一

送江陰簿江楚材先輩

見聚珍本卷十一

送史溫虞部佐郡四明

見聚珍本卷十四

直舍飲餞楊子奇

見聚珍本卷二十三

寄鄭天休

天休兩賜手問會迫賤事不獲修答見聚珍本卷十八

聞後苑錫宴

見聚珍本卷十三

反舌

見聚珍本卷二十二

### 故文節公哀辭三解

早傳黃石系未伴赤松游暴疹驚牀蟻深恩賜養牛谿璜俄碎玉川櫂遂藏舟蕭相今無嗣夫人紹鄴侯  
以采思忠盡宣謀嘆巧勞慙遺無一老投弔剩三號撤奠哀笳引追榮斂袞袞欲知馮厚慶第覽得傳刀  
霜露才嬰疾龍蛇已喪賢神騎尾星次家託寢丘田長樂申君弔東堂罷禊筵佳城白日掩從此卽千年



# 景文宋公集卷第十七

## 律詩

送餘姚尉顧洵美先輩見案珍本卷八

章判官洗赴吳興幕見案珍本卷十七

辯才少白師歸天台見案珍本卷十

孫沆從事宰吳興邑見案珍本卷十六

程密學知益州見案珍本卷十六

寄獻澶淵太傅見案珍本卷十六

張屯田知兗州當按察濰縣見案珍本卷十六

同年梅鼎臣赴鳳翔幕兼省覲時君家學士領分陝見案珍本卷十四

王子野學士同理蘇臺

姑蘇奧絕冠東南。才子監州奉詔函。賜被僕歸廳久冰。去樵風分過舳相銜。菽疇莒葉耕刀利。溢釀梨花醉鳥攙。一水貫都無憚遠。錦鱗雙尾待來鍼。

中山公損疾二首

見聚珍本卷十六

同年譚綜掾江陵

鄉樹湘雲外。行轅楚塞東。不辭淹拔萃。聊欲辨無同。暝紫生寒岫。踈丹點暮楓。登樓有歸訊。爲附北歸鴻。

了淨歸天竺寺

見聚珍本卷十七

九日食餠有詠

見聚珍本卷二十四

龍圖蔡學士鎮高密

兼過鄉墅

厭直坡鑿引郡章。玉虬移刻對清廂。留符懇避離宮籥。公先有四洛保籃之命。以就養懇乞東藩。懷綬貪過白晝鄉。書閣迴巢

雙鳳羽。詔泥殘和五芝房。追鋒只恐歸期迫。肯蟹腴魚早計嘗。

對菊有感

見聚珍本卷二十四

元處宗安化簿

見聚珍本卷十一

晏寢

見聚珍本卷二十四

中山公鎮淝上

長鬣生鸞滿帳前。甘棠載憩示優賢。蕩函握節中軍府。奎字成鉤寶閣天。丹匕去尋鴻苑錄。佛花來供淨名禪。朝家入有三公拜。未信東山得久眠。



黃泌昆仲歸江西

纓樵殫楚桂。裘掖厭京塵。別路雙黃鶴。還家兩玉人。書園飄竹粉。鄉樹老梨津。電韻盈歸褚。中州賞有真。

同年吳穀尉烏程

見聚珍本卷十

智成上人奉陪中山公赴淝上

見聚珍本卷十二

送蕭山宰劉寺丞

見聚珍本卷十六

同年王聖源南都講授

聖源嘗以事免職

刻意悲愁髮未華。詣曹頻費杜陵嗟。歌緣郢客高難和。壁是秦人誤指瑕。綠底恩書褒振滯。烏衣羣從慶

還家。離宮萬戶經庠盛。卻對諸生坐絳紗。

送同年孫錫句簿巢縣

見聚珍本卷十七

冬日野外三首

見聚珍本卷八

直舍讎理律書呈同舍二首

舊文新札儼成行。柏燠微開帙氣香。天下書多殊未見。顏生應笑下雌黃。

經筵敢倦刀刊梓。國典將追鼎鑄書。靜對闕疑還闕筆。不知三古字爲魚。

楊都官日嚴赴鄆州

見聚珍本卷十七

廢鄭河民間呼此名或曰即古滄水河燕塞惟春夏汗潦所集 見聚珍本卷八

家居

賃廡接中林。迷塗感慨深。窮年不材木。提月退飛禽。官宇昏投版。私囊利挫針。病呻無用怪。不是顯時吟。

民塵

衰翁好藏密。移病此橋居。白眼慵迎客。青泥勸樸書。風窗殘書網。煙落暗春樗。惟有伊蒲士。相從亟飯蔬。

舒鴈

莊周悲殺鴈。本為不能鳴。寧識山陰誤。能鳴亦就烹。

邑居

暖襖裘貂病骨輕。茨簷窮伏廢將迎。族庖投刃喧羊肆。賃廡既邇市道屠相尤雜溪子擎牙近禁營。回近亦多連營似安仁閑居賦中雲破日痕緝。巖道雨殘烟脚媚。萋萋傳聞內史輕。租契時部圻例減民租私約吾農對耦耕。

早春近野見聚珍本卷二十四

玉玫瑰見聚珍本卷六

黃蒿微

劉藥染新藟。插鈿成密房。仙人文玉字。宮女道家裝。聞說藁間露。能令肌骨香。

千葉牡丹

濯水錦窠艷。頰雲仙髻繁。全欵碧欄葉。獨占紫球欄。誰謂萼華極。芳心多隱桓。

醢醢

來自蠶叢國。香傳弱水神。折醒疑破鼻。併艷欲留春。勿以媚蘭末。誤霑韓壽巾。

金雀見聚珍本卷六

真珠龍柏見聚珍本卷六

四季見聚珍本卷六

木蘭

吳王宮裏樹。春晚紫房開。秀比華夷重。香蒙菌桂猜。本草云。葉氣味辛香不及桂。無輕衆芳喻。曾照女郎來。

棣棠見聚珍本卷二十二

玉葉

唐昌觀中樹。曾降九天人。變駕香何許。雪英如舊春。豈無遺佩者。來效捧心顰。

茶葉花

媚叢無奈密。柔蔓不勝長。非隣粉白白。似俠骨中香。不分櫻桃艷。名先播樂章。近世民間雜曲始有茶葉花者

送保定張員外見聚珍本卷十五

晴雲

春空無際碧。雲意靜悠悠。盡日隨風馭。迎昏抱月鈎。正宜銜迥隴。強欲蔽層樓。宋野何須問。鴻濛正掉頭。

春墊勸農事見聚珍本卷十一

隴西都尉禪會圖見聚珍本卷八

訪李生野墅見聚珍本卷二十

南齋二首見聚珍本卷九

道中見問津者

欲問迷津意。都緣別徑多。亡羊曾自此。老馬欲如何。旁午晨車邁。間關夕蓋過。不須貪遠客。危恨寄風波。

讀張巡故事見聚珍本卷九

杼歎

寒日不我駐。歲陰生事微。孤懷百感萃。雙髮二毛稀。樵突沉殘桂。塵編擁故章。況無安邑累。身託故山薇。

月中嘲鵲

月馭初明露掌西。翩翩猶伴夜烏啼。架巢樹冷空三匝。卻是鳴鳩得穩棲。

# 景文宋公集卷第十八

## 律詩

游魚

游魚川上樂。映藻復依蒲。須防裁密網。莫獨畏鵜鷺。

驚鷗

漁拽亂溪來。白鷗驚已屢。不應畏機心。却下滄波去。

司徒侍中宣獻公挽辭三首

第一第二兩首見  
聚珍本卷十一

順諫長樂朝。奮庸明辟始。功名一不處。愛直兩遺美。空廡侍中貂。遂失尙書履。不朽在德言。古來皆有死。

皇帝狩近郊

并狀見聚珍本卷十  
九題作孟冬駕狩近郊

皇帝邇英閣講畢五經并序

臣伏見今月十四日。講畢毛詩。皇帝陛下卽阼以來。及茲二紀。五經皆已徧講。而天縱上聖。日新大猷。觀文稽古。剛健靡息。粉澤百度。充格九圍。臣學陋識淺。無以周知盛德。輒撰成皇帝講畢五經詩一章。五言十韻。繕寫上進。干冒清覽。無任戰汗待罪之至。

太極洪樞暇。西清祕閣開。延曠。邇英二閣。並在崇政殿西廂。文從壁府降。輦自殿中來。上聽政罷。方幸講筵。捧袞諸儒進。繙經寶思該。講書。留孔子宅。講尚禮識漢家臺。講禮記。詰傳風兼頌。講毛詩。陽秋富竝裁。講春秋。觀圖龍天矯。講周易。啓柙鳳稽繇。遂使民肯効。咸知上育材。星鈞參婉曲。天漢助昭回。章甫慚無狀。華光信濫陪。願因稽古日。拜手頌明哉。

和人禁中作

前殿曠曠晝鼓餘。對論兵食近袍紗。此時刻意言頗牧。不爲雲中首級差。來詩云。可能頗牧不重生。

和王君貺禁中寓直

長樂疎鐘斷。昆池夕照收。晚風生似雨。仙霧爽如秋。禁中听夕氣甚寒爽。鈞曲來深殿。宮花出御溝。雲天正如畫。壁月在西樓。

大禮慶成見聚珍本卷十九

車駕出獵和丁學士見聚珍本卷十九

早夏集公會亭飲餞金華道卿內翰守澗淵得符字見聚珍本卷十九

同年毛洵勾簿新建見聚珍本卷十一

同年李宗太平法掾見聚珍本卷九

隱几見聚珍本卷十六

貴溪周懿文寄建茶偶成長句代謝見聚珍本卷十八

長兄冬夕遞宿偶成長句上寄見聚珍本卷十六

同年成楷濰州理掾見聚珍本卷十七

學舍諸生罕至或累旬倚席不講愧而成詠見聚珍本卷十四

送同年葉文卿尉高郵見聚珍本卷九

送同年張孝孫勾簿穎陰見聚珍本卷十七

李國傳齋中小山作君即文靖子

觀開幽期勝窗屏列岫連千巖狀稽嶺一石記平泉迥接仙湖境低圍醉幕天休論真假意同是到忘筌

新月見聚珍本卷十

殘月見聚珍本卷十

晚歸儲廡

驅車廣陌陰極望散煩襟霞破天逾淨煙生樹始深摻喧侵暝鼓練急向寒砧卻入顏生巷窮棲似故林

晚秋客廡

涼葉日幡幡。西風振旅魂。客來聊解榻。童小未應門。蟬噪專林響。蝸移亂壁痕。缺然禽鹿性。待底報君恩。

賦成中丞臨川侍郎西園雜題十首

雙假山 在庭廡左  
右相對

佛螺雙髻蟲層嵐。雲穴呀空蘚暈銜。異日主公求肖像。居然認得傅溪巖。

煙竹

煙梢露葉貫冬榮。高出危牆近覆亭。聞道蘭臺有圖籍。故留春粉助蒸青。

柏樹 見聚珍本  
卷二十四

牡丹

上國名園買地栽。試知韓令是雄猜。香根斲盡成何事。不識騷人託諷才。  
楚人以香草喻君子則牡丹亦香草之一也。

醱釀架 圓陰婆娑公醬  
列坐榻其下

媚條無力倚風長。架作圓陰覆坐涼。露葉一春清襲袂。有人知是令君香。

小池 見聚珍本  
卷二十四

李樹 見聚珍本  
卷二十三

小桃 見聚珍本  
卷二十三



柳

散漫飛絲阿娜枝。第家留賞霽霜威。盡將煙葉偷眉。不爲章街走馬歸。

射棚

棲鵲雲侯迥勢開。主人留客侑金巒。欲知謝尙風流極。賭得將軍鼓吹來。

觀上朝

見聚珍本卷十三

歲晚家居自勉

朝陽濃澹雪雲垂。湯沐餘閑似標枝。藥有不龜聊擊絮。管無窺豹任爭碁。垣陰剝紫迷寒蘚。池溜含光結晚澌。飲取醇醪作佳士。莫貪蒿目強憂時。

小雪

見聚珍本卷二十

送荆湖北漕張職方

見聚珍本卷十八

庠局觀書偶呈同舍

見聚珍本卷二十四

送黃昱祕校太平理掾

兼簡法掾李伯元見聚珍本卷十七

學舍石榴

太學中石榴數十株少佗雜木然其樹率多蟠蠹見聚珍本卷十三

張伯起自蜀還臺簾對旣訖以有司奉祠蜡方旣卽齋復引入升太常爲博士

殿城塗丹九齒長。珠簾伏奏近天香。已傳樂職來西蜀。更就清齋得太常。夕燎烘庭思結佩。曉蘭薰浴滯華陽。心傾五日歸來路。共舉鮭珍酬賀觴。

歲除 見聚珍本 卷十一

謝都官監治建州 見聚珍本 卷十七

早春

鷗雪銷平苑。烏風裊迥竿。暖客侵柳動。寒意向梅殘。雲薄來無定。天晴望更寬。杯霞莫恹醉。朝野日多歡。

元夜觀正陽錫宴 見聚珍本 卷十三

上元景燈紀事 見聚珍本 卷十九

聞中山公澠上家園新成祕奉閣輒扞拙詩寄獻 見聚珍本 卷十三

龐祕校掾九江兼歸汝南迎侍 見聚珍本 卷二十

送客野外始見春物萌動 見聚珍本 卷十六

傷和靖林先生君復二首

清瀨嚴生國。良田仲子居。姬姜生不娶。封禪死無書。君復臨終賦詩其亂章云。茂陵異日求。竈冷丹何去。

廚封畫已虛。詔函加美諡。不及裏輪車。

筆精傳禊帖。句賞儷汀蘋。道勝吾忘我。賢嗟歲在辰。風愁青桂暝。露泣紫芝春。一束生芻贈。門無雜弔賓。

春夕

春晏病體少。惊退臥北齋。有寄見聚珍本卷九

捲幔星河近。嚴城鐘箭遲。飛蟲集暗牖。棲鵲忌明枝。弱柳兼風困。高花戰露危。回腸正無賴。仍此臥遙帷。

有懷舊隱見聚珍本卷十二

自詠見聚珍本卷十三

晝寢

靜拂藜牀藉蠹書。曲肱聊與古爲徒。夢柯向費論榮辱。訟鹿何煩競有無。庭下細光風泛蕙。隙中斜影日低梧。宰壻不堪嵇胞轉。寧覺人間有畏途。

桓伊傳

上前豬笛串奴髻。自倚哀箏詠刺讒。太傅一聞流涕久。使君於此信非凡。

房陵舊第見聚珍本卷二十四



# 景文宋公集卷第十九

## 律詩

孫景赴懷寧尉

一行爲吏日千里背淮人。蘭助朝昏膳。絲垂宛轉輪。雲容侵驛曉。江態引帆春。靜治龍舒邑。羗生盜向秦。

寄題眉州孫氏書樓

見聚珍本卷十五

寄天休學士

時遞宿館中見聚珍本卷二十一

重懷和靖林逋

見聚珍本卷二十二

房陵舊第股引蔡水養魚於池。敗日或有塞其水。竇魚多涸矣。

後園平日引春渠。浴鳳翔鷺兩自如。一旦繡衣來簿責。餘災猶得及池魚。

偶作

隼被鷓鴣委。知有累豺驚羊質。固非眞謾誇魯國多儒士。敢到君門止一人。

柳絮

見聚珍本卷二十四

送張問南游

見聚珍本卷十六

汴堤閑望

虹度長橋箭激流。夾隄春樹翠陰稠。誰知晝夜滔滔意。不是沉舟卽載舟。

送李公佐

見聚珍本卷十

送段祕丞同理金陵

自審刑赴相幕之辭見聚珍本卷十八

寒食夜偶題

前庭露氣壓輕埃。風砌花陰聚復開。苦恨浮雲心不淨。月中時汙太清來。

閨月晦日

見聚珍本卷十

落花

見聚珍本卷二十三

送張清臣學士隨侍金陵

見聚珍本卷十八

喜楊德華見過感舊成詠

曾見烏衣賂佩囊。再逢何處二毛郎。病姿故有靈光在。牡齒翻隨屈產長。河裏笛聲頻感槩。江南花樹剩淒涼。酒壚便有生平隔。已濯華纓未易狂。

寄南郡直講王聖源

見聚珍本卷十三

金陵相公赴鎮二首

代邸橫庚佐。商巖夢弼才。蕭公左右手。軒老上中台。利見攀龍後。重明捧日來。聊持樞柄族。旋運一陶坯。師石兼爲礪。形鹽本和梅。樹容他語答。車問少陽回。不續推時乃。宸歌續喜哉。陳平安注意。鄧禹退無猜。范曄論鄧云。進退用而下無損情。叢社南邦重。輕裘太府開。舍裝寧晚計。行復坐公槐。

慈宸念方國。上宰輟謨明。卽拜三公府。還爲萬里城。松姿終自直。鼎意未嘗輕。戀結雲簾對。恩頒玉節榮。一輕傳令子。雙璧聘材卿。鶴汎江南棹。犀羅帳下兵。台幡畫凝繞。仙袂赤松迎。粟脫賓筵飯。羊均宴豆羹。吳農觀耨水。蕪壤嘆糊禎。此日東山詠。惟公繼頌聲。

內閣孫侍郎生辰紀德

見聚珍本卷十九

送梵才長吉還天台

見聚珍本卷十

送韋漢卿同年赴五原理掾

見聚珍本卷九

送王鼎同年尉滎陽

見聚珍本卷八

送齊殿丞監緡雲軍

幾信南風轉曙烏。殿欄歸思結丹塗。曳朱恩借魚須笏。假節人同虎刻符。裳綵親闈稱雅壽。弩籥鄉縣壯前驅。飛霜郡閣遺文麗。更得韓陵共語無。故翰林南陽公出牧緡雲日。庭飛霜闈自爲記刻。又庾子山云。惟韓陵一石可共語。

送楊告虞部知池陽

新年臥錦直南宮。露絨歸來使寄雄。祕地鏘鑾辭夜燎。離亭贈扇有仁風。梅根大冶兼金富。楊葉芳洲雜  
蘄紅。偷楚俗移恩詔美。班春聊隱軾前熊。

學舍晝上

風射長廊雪絮春。經筵無客有流塵。捫心自問何功德。五管支離治繯人。

晚春有感

見聚珍本  
卷十八

寄樂山長老省賢

南方有尊者。卓錫戀林丘。演法三千界。多聞第一流。爐檀薰定几。笋脯供齋甌。社約慙成負。霜蓮落幾秋。

次韻和朱少府苦雨

滯淪連春晦。層陰接夜分。驕霆惟發電。愁棟但生雲。里突居無爨。官蛙坐厭聞。遙知霖唱罷。客思轉相紛。

遊小圃

初陽未熱樹陰輕。中圃留連底有情。春草抽心終不死。夏禽反舌已無聲。轆轤半上畦泉逗。襖襪初休隴  
雨晴。紫蓼青葵正堪掇。於陵何必是逃名。

盛諫議赴維陽

漢家規地徧青蒲。繡屐恩深拜命初。朱畫車轡頻出守。仙移院額別脩書。貢闈星橘兼苞柚。宴筋金盞和



鱸魚奉計不應三滿歲。荷囊法許從彫輿。

送靜海勾稽高泊見聚珍本卷八

葉司封知宣州對日改三品服見聚珍本卷十六

葉道卿監太平州

堵波題墨素塵昏。犀棹橫江重黯魂。束帙乍拋三鐵櫓。將軍兼映兩朱輪。道卿先侍司封之在宣城而後赴當塗淋漓鷺下秋濤闊。蹀躞趨狂宴鼓喧。速報政成歸待詔。鑄金雙夾魯班門。

送丁殿直郴陽監軍

渠浪撼殘星。飄然颺彩舲。懷人送歸客。短候續長亭。望寺癸垂組。遺書符殺青。無妨軍壘隙。壺柘侑賓醢。

學舍直歸晚霽二首見聚珍本卷八作三首此缺末章

聞蟬見聚珍本卷九

胡同年恢信州弋陽簿見聚珍本卷十一

唐詔監簿池陽市征見聚珍本卷十一

王君瑞祕丞同理青社君瑞昔三爲州從事

詔押平明出未央。使隨公府汎牙樯。卽時趨坐多留幘。幾夕登樓共据牀。勝國遺宮沉雪霧。從軍舊沼認

蓮房翹材宴隙還家早。紫葉叢萱映壽觴。

偶作

薄暮歌鐘宴平樂。黎明車騎過宜春。身長六尺飢將死。唯是平原厭次人。

儻舍西齋小圃竹樹森。植秋日搖落對之儵。然因作長句盡道所見。

避事長卿志。閑居郎將流。無心嬰外物。有興爲高秋。儻舍餘三畝。畸人代一丘。園空樹色至。日淡暝煙浮。紺葉繁江蓼。丹鬚亞海榴。青松七鬢嫩。黃菊萬釘稠。露泫梨津熟。風乾芟扇愁。小池圓寫鏡。臥石側盤虬。愛竹惟慙賦。逢萱卽忘憂。信非吾土美。聊並小山留。勝託三餘暇。幽尋五日休。沼蛙觀聿役。蒼雀聽啁啾。心有冥鴻伴。歌煩警鶴酬。茲焉爲樂地。時事判悠悠。

送呂太初法曹之許田時相國彭城公鎮許田見聚珍本卷八

秋夕見聚珍本卷十二題作七月二十八日

筆次見聚珍本卷十七

累夕大風見聚珍本卷十

曹景宗傳見聚珍本卷二十三

庭石見聚珍本卷十

西齋冬夕

四海共搖落。居然彫歲深。林疎縱風怒。天慘趣雲陰。冰沼留寒鷺。燈簷射宿禽。懷人感衰髮。自此不勝簪。  
學舍直歸

衣滿天街車馬塵。學廬番下已迎曛。弊裘欹帽驅羸馬。官長多能罵廣文。

觀太學釋奠時中冬月天府舉公陪位見聚珍本卷十九

善惠大師禪齋見聚珍本卷八

對雪二首見聚珍本卷十五

楊都官知隨陽君自蜀守爲施侔既而郡見聚珍本卷二十一

迎春曲三闋見聚珍本卷七

奉和長兄歲宴抒懷見聚珍本卷二十一

送胡宿同年主合淝簿見聚珍本卷十七

崔氏逍遙堂

戚里封侯舊。家園締宇初。據梧人化蝶。坐支客焚魚。砌草交垂帶。窗筠就刻書。欲知真趣盛。長者數回車。

答連生見寄兼簡同邑胡希元見聚珍本卷十一



# 景文宋公集卷第二十

## 律詩

寄會稽天休學士

見聚珍本  
卷十四

都街見綠樟枝感而成詠二闕

見聚珍本  
卷二十三

送高記室廣州幕

荆高  
氏孫

楚國王孫後。梁臺賦客賢。貪磨楯鼻檄。重冠玳簪筵。去路南溟地。離魂北斗天。庾鮭三種嫩。虞璧一雙鮮。颺影風爭怒。朱胎月對圓。慎持齋疾意。密啓佇詳延。

寒夜與伯氏宴坐

對擁圓爐坐。蕭然念變衰。樹鳴餘葉亂。燈戰暗花危。罇酒伯仲雅。園荆兄弟枝。陶陶且相樂。低月半遙帷。

同舍置酒

苑樹淒風薊薊寒。休時一笑恣醺顏。已浮山簡酒池上。更沒曹擘杯案間。主有哨壺聊慶馬。客同溫玉任頽山。冷官未及尙書對。欸段相將畢景還。

觀獵

見聚珍本  
卷二十四

除夕二闋

分見聚珍本卷十二及二十四

哭公孫子正

見聚珍本卷十六

喜藥山賢師見過

鳳林曾語別王舍此相逢淨月常涵水孤雲易去峯供緣賓閣飲師與清源參豫飯忘言之契耳界帝城鐘卻舉當年話無言促塵松

王秀才贊賦乞詩爲別歸毗陵

見聚珍本卷九

劉立德同年赴淝州幕

春榜連題千佛經兩藩交辟滯弓旌幕中仍是紅蓮客門下今爲玉笋生君再擢第即今中山公門下林逗楚風披醉衽浪搖淮月漬離纓歸來上賦趨行在足繼西豪舊弟兄

西齋夜思

見聚珍本卷十七

太學建講殿割王第西偏營置

見聚珍本卷十三

覽從兄感劒池編

見聚珍本卷十三

隣真亭

藥館何年記舊封宴亭此日駐憑熊佛螺近作臨窻岫仙馭遙添拂衽風談樹憩棠交結蔭飛電賀雀併

翻空使君邀勝留千騎。可在秦樓更向東。

僧園牡丹井序

予暮春行樂僧舍。涉其中圃。見牡丹數十本。華淺葉麗。雜處叢蒼。浸灌闕焉。封殖頽焉。芒夫羹豎。蹈藉侵侮。嗟夫。託匪其地。俾妍成蚩。雖拱壁夜光。不能抗按劍之患。況斯者乎。作詩以傷之。

朽壤眞非託。奇葩惜見捐。根深惟自庇。香酷索誰憐。晚藹仍晡日。斜柯但倚煙。有人同寂寞。無地與回旋。不預甘棠愛。羞將惡木連。數奇飛將恨。形槁屈生賢。已失南梅早。仍憂北枳遷。陰雲今讓棘。生淤此饒蓮。鈿轂排朝露。彫欄悵夜天。馱金會見斷。唐李長吉壯草云。走馬馱金斷金草。無事苦憔悴。

送炳宗集簿

見聚珍本卷十一

僑屋觀燕葺舊巢因贈

窈窕雙越燕。一再共年華。巢戶差眠尾。泥痕燥哺花。惜無文杏庇。猶免翠簾遮。所賴同雞德。新豐遂識家。

閉關

度日絕賓履。自然成閉關。無謀慙適野。藏疾願依山。莊周固有處。材與不材間。

楊太尉後園假山

韜戟嚴中府。礎星寫翠岑。嵐分一軒翠。岑入半庭陰。谷響迎壺柝。巖光射廡金。時平非聚米。緩帶恣幽尋。

春晦寓目二首

見聚珍本卷十

挑燈杖

見聚珍本卷二十二

覽岳長孺斬春罷歸舟中詩筆

見聚珍本卷十七

送四舅朱掾赴英州

拗柳亭臯晚。攀梅嶺露長。北辭鳩鵲月。南冒鷓鴣霜。越蠶催征候。珍鮭奉慶觴。片言民訟息。歸計埒林光。

送徐秀才

風鵬摧高羽。雲鷗慘別弦。勅隨東郭履。歸養豫樟年。客信憑梅隴。鄉飲伴月舩。君謀適不用。虛贈繞朝鞭。

歲宴私感

見聚珍本卷九

送萬池秀才

有客柅征輪。羈懷尉蓼辛。來乘訪戴雪。歸趁浴沂春。酒所留飛蓋。談餘換纈新。異時更月品。知冠汝南人。

觀隣人賣餅大售

見聚珍本卷二十三

僑廡

瞿曇少病否。司寇正歸歟。不鑿墻坏遁。猶煩里旅居。飯春霜稜去聲京師以田遠近爲數稜粟。羹糝雪畦蔬。願受爲氓

籍。閑披種樹書。



詠史見聚珍本卷二十一

食兔見聚珍本卷九

讀絕交論

嫌隙蕭朱末。盈虛田竇間。言雖甘若醴。心定險於山。後轍何能救。頽波遂不還。居然孝標論。抵几若爲刪。

蓬池作二首見聚珍本卷十二

雪夕

恩華綿帝寓。時天燂後。紋書四出。花出瑞王年。陰魄交光地。風翼雜下天。鹽波熬巨浸。縞頃界中田。有客方愁臥。先

時履欲穿。

答書見聚珍本卷十一

林鷗

林鷗泊泊飛。剩欲送斜規。城頭八九子。月中三匝枝。嚮晨常自警。鄰暝不應移。王孫無巧彈。此夜正羈雌。

和鑒宗游南禪別墅見聚珍本卷十

隴州魚龍川石魚見聚珍本卷八

陳奉禮宰四明見聚珍本卷十五

送梅摯廷評宰上元

子虛誦入漢皇帷。給筆當年挾藻奇。賜罷春袍兼彩服。對餘崑玉照林枝。卽時酒所歌驪闕。幾日江南瑞雉隨。建業清溪無盡曲。爲賡妍唱繞遺詞。

送樸密學赴并州

見聚珍本卷十五

江休復潞掾

見聚珍本卷九

送葉蘇州

臥錦潛郎種種絲。爲邦獨愛阮咸麾。中臺給契魚初剖。外闕升車雉尙隨。風汴雜花飄夕棹。雨吳芳樹隱春旗。爲尋劉白高吟地。酒熟螯香左右持。

和郭六玉津上巳宴罷見寄

式燕靈琨倦蕙時。祓蘭浮棗惜春輝。回驂並躍都門道。誰識顏王曲水歸。

九日

商館馮高爽氣濃。露莢千穗亞枝紅。餅餐交遣嘉籩上。藥菊爭吹壽罍中。擊隼勵威平隰闊。戲驂沉響故臺空。何人盛繼龍山集。醉帽須防穀鬱風。

偶思桓景登高故事

桓景全家遂得仙。佩萸吹菊對陶然。汝南雞犬緣何事。不似淮王許上天。

籍田禮畢因成七言

青旗斜倚耕壇霧。膏壤遙迎御耦春。二步不應踰舊禮。天心自欲勸蒸民。

送惟正歸錢塘

客艚高檣冒楚霏。月窟叢桂老春枝。一杯來應伊蒲供。八法歸刊斗藪碑。師水院記於相國長城。公今茲絕筆將刊翠瑛。鱸岸風生涼汐滿。蜃天霞破暝樓危。學該內外皆圓法。却要聲聞是總持。

送無錫主簿王庾

莫嘆東南遠。須榮試吏才。客從梁苑至。家侍太丘來。木脫洲程迥。風長檣意催。蟬知膠稻熟。鱸記海潮回。訟矢閑鄉狂。糖螯佐壽杯。牛刀宜自愛。無及武城哈。

還故里有感。明道癸酉見聚

馬上逢雪。見聚珍本卷二十

漣水軍豹隱堂。今趙集賢榮未策名曰嘗處于此及決科始以今名榜其堂不五年集賢出守軍政見聚珍本卷十八

李祕校省觀畢卻赴乘氏。見聚珍本卷十四

蘭臯亭。張學士充別墅見聚珍本卷二十一

景文宋公集 卷第二十

明州慈溪尉胡寅見聚

珍本卷八

古意見聚珍本

卷十四

景文宋公集卷第二十六

元本卷首  
三頁佚

律詩

初除直講獻內閣馮學士孫侍郎

見聚珍本  
卷十九

寒食野外書所見

見聚珍本  
卷十四

送客不及

見聚珍本  
卷十六

旬休

見聚珍本  
卷十三

直舍

南榮曝腹飮黃梁。臥看春暉上繚牆。有位乘軒慚野鶴。出錢邀沐羨山郎。神交自愛蘧蘧適。怪事非論咄咄狂。瓠窻不穿枵實散。只應何用是吾鄉。

東晉

見聚珍本  
卷十二

送澶淵李太傅

左契銅魚照綬囊。上頭車騎冠東方。三交薦杖中軍戲。一割牛心右客嘗。烽靜塞垣宵燐滅。橋橫河曲暮虹長。歸來競病喧笳鼓。不畏休文賦韻彊。

張生南歸

見聚珍本  
卷十五

黃孝基歸上饒

見聚珍  
本卷九

送張士安同年赴上元尉

見聚珍  
本卷八

直講周歲

見聚珍本  
卷十三

得楊棣州書

見聚珍本  
卷十八

長寧節紀聖

見聚珍本  
卷十九

慈聖閣秋橙結實上召宗室同觀

見聚珍本  
卷十九

春夕聞鴈

見聚珍本  
卷十二

天街縱轡晚望

夾道宮槐鼠耳長，碧簷千步對飛廊。  
虹橋不礙天河水，虎落遙遮禁苑牆。  
柳密試應勝暖吹，樓高都擬爲殘陽。  
塵輕霧重黃昏恨，半屬翩翩馬上郎。

早春出近郊

見聚珍本  
卷十八

兄長有計省之命

長簡蓬山藏，娑娑試滿年。  
頻書對命笏，長負出休錢。  
運復光華旦，恩回咫尺天。  
罷披窮石訴，入佐計臺員。

近對塗丹密相趨委佩聯太官供餌美三服賜袍鮮平進真如砥孤飛舊惡弦猶勝廣文客摧擿獵塵編

肅簡燕魯公挽歌四首

見聚珍本卷九

休沐

見聚珍本卷十三

春晚寫望

不覺春芳晏翻成客望勞草平天一色風暖燕雙高擊轉爭輕幘書旗街纒膠隨宜歌白紵都士半雲袍

休日

見聚珍本卷十三

昭文王相公出鎮青社

西漢無雙彥中興第一流二篇應商夢七聖首軒游昔會光華旦時當物色求從容賜官筆都穆潤緹油

芝押兼泥熟鼈峯駕浪浮

公在先朝歷內外制

捫天陪累礎敲鼎識培鈎

俗份二祀公皆法從

帝欲中階正公參九廟謀危言

天下事坐勝幄中籌斤斤宣嘉績巖巖樹壯猷異時思大治此日詠崇丘承弼圖勳盛蕃宣席寵優

長自參的

出鎮

均勞九州伯重序富民侯

公再入途正臺席

眞廟方憑几祇宮奉委裘扶天八柱正披日五雲收堯后除凶

代周王訪落秋盡歸千里馬無復少陽牛熙綽官咸事端朝茹不柔兜烽閑塞警財餌撫夷酋再侍欽柴

祭公兩侍聖上郊禮

仍廣築瓠謳

頃歲塞河成功

奉承湯恤祀力贊禹勤溝國賴蕭公畫言無趙孟偷深恩及行葦和氣

藹鳴球幾欲辭名遂何嘗爲智憂屢居移病苦連賜上尊醅敦免深慈展猶違動遽旒坐槐聊罷府剖竹

更爲州。畫錦貪過里。晨裝趣戒驄。邳垠訪祠石。稷下按行楸。列第今容闕。橫川本是舟。娛賓羅鼎食。坐閣便巾幘。故事南宮在。颯歌北海流。人祈衛武歲。三人對王休。

抒懷呈同舍

見聚珍本卷二十一

自訟二首

見聚珍本卷十八

抒懷上南京常山公

見聚珍本卷十三

南方未臘梅花已開北土雖春未有秀者因懷昔時賞玩成憶梅詠

見聚珍本卷二十

喜得當塗葉學士手筆

見聚珍本卷十四

勸客

見聚珍本卷十六

懷故里偶成

見聚珍本卷十七



# 景文宋公集卷第二十七

## 律詩

詔復制科有謂予應詔者

見聚珍本卷二十三

代賦後園賞花釣魚

見聚珍本卷十九

應詔內苑牡丹三首

千葉

一豫凝皇覽。千英薦瑞葩。壓枝高下錦。攢葉淺深霞。疊采晞陽媚。鮮苞照露斜。九莖休銜葉。五出浪言花。郁郁雲柯粉。葱葱氣瓣嘉。羣心識天意。成數佐皇家。

雙頭

化工憑協氣。花品効尤祥。旖旎雙苞艷。氤氳一種香。參差迎夕露。左右儻朝陽。有意同細幹。無言並絳房。萬靈天會帝。三月史書王。故此呈繁卉。還將助樂康。

三花

九城蕃瑞殖。三出儼英蕤。巽采昭天造。同心奉帝嬉。繁疑交晝影。重欲亞晴枝。恩露方均沍。王風亦徧吹。

併柯由內附。紛艷表重熙。幸覲由庚瑞。暫陪可嬉嗣。

代賦後苑賞花釣魚

黃屋宸衿豫。靈琨苑制雄。鈞天回帝所。太液近唐中。瑞旭搖卿諶。丹葩雜紺叢。王魚多在藻。君鵠鎮迎弓。式燕晞陽露。徒歌屬大風。此時慈惠洽。共樂夏渠豐。

冬夕酌酒

見聚珍本卷十五

送王庾

見聚珍本卷十

皇帝幸南園觀刈麥

見聚珍本卷十九

再送王庾

見聚珍本卷十

送孫臯

見聚珍本卷十六

送河中司馬待制

見聚珍本卷十五

同兄長賦朝雞

彫籠摧羽就羈栖。心識昕朝候不迷。羣鶴在軒皆有祿。夫君何事獨先啼。

雞答

君園稻富非爭食。省樹枝深未許棲。但得齊蠅無亂響。不辭風雨五更啼。

送鄭天休

見聚珍本卷十六

偶作二首

去國日久。寥寥雙鬢長。長安舉頭近。漳浦竄身危。沫埃窮鯁照。春非墜葉知。一廛先畝在。扶未自歸期。衰翁好藏密。移病此僑居。白眼慵迎客。青泥勃撲書。風窻殘晝網。煙落蔽春樗。惟有伊蒲士。相從要飯蔬。

柳

見聚珍本卷二十二

翰長再有北門之拜

見聚珍本卷十三

賦得敗荷

見聚珍本卷二十

題阮步兵祠二首

濟世非無策。迷邦詎可求。昏酣酒壚臥。蕭散竹林遊。俗眼嗟人廢。窮途逐涕流。何公真禮法。寧免疾如讎。幽懷八十首。鬱鬱寄蓬池。屋壁留南巷。鄉人奉種祠。乘驢非宦巧。逃蝨厭流卑。三沃椒漿醉。誰論飲過差。

嵇康謂步兵惟飲酒過差爾

家居

鬱鬱行何適。肩肩體寢臞。安仁非善宦。甯子是真愚。北化隨江枳。東遊謝海桴。何須命私駕。危涕避窮途。

寒夜

孤客傷時晏。遙帷對夜分。虛輪抱初月。側陣捲歸雲。霜蕙披寒穎。陂鳥叫暝羣。村砧與營杵。不寐最先聞。

惠民河隄晚矚

見聚珍本卷八

再逢成上人

見聚珍本卷十七

有感

車轍無聲巷次閑。畸人愁臥髮毛斑。月囊罷食侏儒米。歲計深依嶮壘山。風薄迥林秋蒂老。天圍荒堞暝鳥還。舉頭却望長安日。已在浮雲沆漭間。

寄弋陽王學士

見聚珍本卷十四

過朱亥墓

屠門遺舊隱。鎚袖凜餘風。兵下邯鄲壁。軀捐噓踏公。種祠羣望亞。樵禁九原中。異世同樽墓。東西夾漢宮。

蓬池寫望

曠望蓬池上。池平失素波。鳴鳶貌閑暇。樗櫟意婆娑。霧日垂金擘。煙峯晦鈿螺。回瞻百常闕。非爲五噫歌。

訪僧舍

見聚珍本卷十

讀退之集

素瑟朱弦古韻長。有誰流水辨湯湯。東家學嗜蒲菹味。覺穎三年試敢嘗。

古邑二首見聚珍本卷十一

迴環見聚珍本卷十二

僑居見聚珍本卷九

野望

皁壤一搖落。年華此向闌。雪雲從北暝。霜日帶西寒。漿酒喧神鼓。風毛送獵鞍。去邦猶未遠。差認漢宮盤。

觀相國長城公留題樂師院壁見聚珍本卷十一

晚秋月夕

萬里冰輪轉斗城。薄帷開望暝寒輕。金從佛國初移地。玉與仙家便作京。乾鵲繞枝經下苑。漢刀持夜發連營。謝郎莫惱脩然意。欲把纖雲點太清。

答書見聚珍本卷十一

送客見聚珍本卷十

送蔣御史漕江南見聚珍本卷十三

萬秀才園齋見聚珍本卷十二

送范希文見聚珍本卷二十

詠史四首

肆威矜逐逐。索黨恣猖獗。盜跖真知道。餘財欲汙人。  
青松獨受命。停雪待陽春。一遇樵人斧。同成樸檟薪。  
虎嘯雲巖下。風生林嶺隅。須防威可假。慎勿逐城狐。  
持鷸蜂謀壯。貪蟬鵲意深。漁人一拱手。彈者笑愔愔。

送梅堯臣

見聚珍本卷十

朱雲傳

見聚珍本卷二十四

送陳動之

見聚珍本卷十

結課

結課天官啟。悲秋騎省孫。崢嶸逾歲籥。飭儻別都門。餞蓋紛寒野。征橋拂曉暉。縣齋豐醉秣。無厭數持樽。

送潘祕校赴潁上簿

見聚珍本卷十

送馬房

見聚珍本卷十六

送明學士赴益州漕

見聚珍本卷二十一

和晏相公乘輿宿殿致齋日巡仗遇雪

見聚珍本卷十五

和晏相公青城

連天華帟竦南端。畫角吟龍疊鼓喧。按曲已休彫輦入。五營斜日亞旗竿。

和晏相公祀畢城馬上口占

七里城南紫霧霏。注旄叢蔽蔽晨暉。風驅萬騎甘泉近。雲捧雙龍夏后歸。鏡鼓和歌扶輦道。箭囊傳契敞端圍。

乘輿至門。勦箭乃入。

都廬技養雞竿下。共望中天赦鵠飛。

國朝肆赦日。每雞竿才豎。而緣撞數

輩。踴爭上。捧雞歡躍。然後赦出。

和晏相公夜歸遇雪見聚珍本

卷十五





# 景文宋公集卷第二十八

## 律詩

將還都寄獻臣見聚珍本卷十三

早發

征客懷周道。飄然望日畿。天開闔閩近。星隱建章微。王囿芻蕘往。駟原駉牝歸。詎能同野鳥。朝夕向臺飛。

送王識游洛陽見聚珍本卷九

臘後書所見見聚珍本卷十七

和御製皇太后恭謝太廟見聚珍本卷二十三

有感

力守高皇約。高祖云非有功不候祈還司隸章。翻身去殿檻。忍死出縑囊。豕突埋輪路。豺麕擇肉場。霜毫墨猶濕。迢遞竄遐方。

莊獻明肅皇太后哀挽應制二首

寶慈垂母訓。一紀御璫除。地有占沙口。天仍補石餘。軒星淪夕緯。翟輅去宸居。異日金滕啓。方知復辟書。

太后上僊後皇帝於  
巾箱中得此辟詔草

肝爪身無憚。寒暄疾有加。災生織女口。魂斷濯龍車。庶翼浮辰旭。邊簫咽暝霞。唯留長樂注。刊美在皇家。  
莊懿皇太后哀挽應制二首

國啟重雍祚。天推太極尊。夏祠今化石。堯母舊題門。不待寒泉養。空流渭水恩。烝哉王者孝。別廟奉姜嫄。  
潛饌行將徹。哀笳咽不前。風驚長樂樹。月苦鮒隅天。恤典禕章備。神塗駟駕聯。故奩脂澤具。留待上陵年。  
送梁著作宰興平

班馬蕭蕭祖帳闌。曉參橫影送征鞍。春歸花樹排初薺。天廢關泥落舊丸。乳雉羣飛郊柘密。祕魚雙合省  
芸乾。竊陵草色無深淺。試爲南登一望看。

癸酉六月奉詔修籍田記十一月詔罷

見聚珍本  
卷十三

送張元安肅知軍

星闌幾日罷薰衣。萬里題封換使麾。都外鳴夷催輶酒。塞南楊柳望春旗。中軍尺檄閑飛羽。前隊鳴鶻列  
素支。競病不須貪賦韻。路人笳鼓記歸時。

偶成

不用真如鼠。胡瞻亦有鷄。田園未歸客。天地一畸人。京邑風霜苦。江鄉薇蕨春。可能逃鬼笑。長送左朱輪。

予帖職以來經錢同舍秀州道鄉費州子野樓州伯垂鄭州仲裕凡四五人矣

晚春

露花裊裊開還徧風絮飛飛去不休春解無情春亦老欲將寥落與誰愁

送祝熙載見聚珍本卷十

送魚太傅通判漢州

縣野喜相依長亭亟解攜寒銷雲棧北春徧錦城西印醬傳芳菽嵩祠頌縹雞時平通守貴千騎闢鄣泥

奉和御製後苑賞花釣魚應制見聚珍本卷八

莊惠皇太后挽歌應制二首

嬌幄柔明訓堯闈保護賢別居長樂殿讓給水衡錢慎疾方加膳收神亟去僊宸矜增服紀追報煥終天昔帝推嬪則吾君賴母慈陪陵漢家葬異室闕宮祠霧暗星軒隱天愁月御移翟車參享路無復廟中期

和石學士直舍晨興見聚珍本卷十九

仲微相過把酒有感見聚珍本卷二十

偶作

人遠言都廢身閑道轉迂是非纔一馬多少但雙鳥學稼慙農老還山笑客逋嘶蟬何所謂相伴據庭梧

詠葵

纖草無人愛綠葵。一生私意竟誰知。須防白日傾心處。自是中園衛足時。

和音

危弦度曲汎孤鈎。一世知音未易求。直把將雛爲陌上。主人猶復自搖頭。

馬比部赴兩浙提刑

兩漢爲郎選。南方奉使材。書隨星火落。帆拂斗牛開。月破濤收鷺。天低雨暗梅。却緣持節重。無客對銜杯。

郭仲微見過問疾

見聚珍本卷十九

楊柳詞四解

垂楊無態不堪誇。猶有餘情解作花。三月紛紛飛似雪。白門啼殺叛兒鴉。  
天幕風和畢雨餘。翠輕黃淺亞春衢。不知張緒當年日。似得長條濯濯無。  
苑路黃黃隔翠霏。三眠初熟倚春暉。枝枝柔曼皆堪愛。不分羌人拗折歸。  
玉樹森森拂曉空。子雲辛苦賦青蔥。不知苒弱當君意。却就長楊便作宮。

館中卽事呈郭仲微

仙山對敞直廬扉。繡徧緹油素領垂。鸞乘空陪天驥尾。羈禽不集帝梧枝。雲連帝閣朝曦早。花咽宮渠夕

溜遲。何事夫君弄刀筆。五年猶似鴈門騎。仲微五年間再伴西諸侯。一爲絳州。不拜。今亦無副職。如余之不偶。

李德林

內史兵機是所長。東師飛度取降王。誰知一夕讒言入。不得文皇七寶裝。

夏日舊疾間發見聚珍本卷二十一

鄭天休舍人言中丞晏尙書西園見憶

聞道青雲友。曾過廣武廬。中園玩蕭寂。嘉樹日扶踈。塢靜蟬鳴急。花翻鳥集餘。賦成誰見憶。唯是沈尙書。

送黃灝見聚珍本卷十六

覽中丞尙書護陳二郡新詩見聚珍本卷二十一

自詠見聚珍本卷十三

答客見聚珍本卷二十三

秋日詠庭樹見聚珍本卷十

病興早朝

萬樽冬瓏鳳闕西。病興重喜趁朝闈。初霞稍上巖廊戟。落月催傳衛士鷄。温樹未凋風力薄。仙杯已滿露華低。明光一對清光罷。昏目猶慚眩轉迷。

送殿院張奎漕京東

見聚珍本卷十八

和中丞晏尙書憶漕二首

見聚珍本卷二十四

西園晚秋見寄

見聚珍本卷十一

九月十五日恩賜禁中所種稻二把米一囊

見聚珍本卷十三

和晏尙書詠芙蓉金菊

千疊綃紅抱藥乾。一番金雨映趺攢。比來醉筆磨新曲。簡上飛霜不擬寒。

雨中罷直

禁樹連天雨送秋。千門寒氣襲輕裘。優旃不用誇諧辯。陸楮諸郎已得休。

和梅侍讀給事秋雪

見聚珍本卷二十

當直偶題所見

凜序閑緹籥。輕寒著黼帷。仙盤迎日早。溫樹得霜遲。風觸趨朝珮。霞纒放仗旗。殿廊聊暴背。誰訝子雲衰。

栢君山與楊子雲奏事。坐白虎殿廊下。以寒故背暴。

禮祠宿太常院聞翰林兄長內當

碧天霜氣夜稜稜。人在鼇山第幾層。靜極禁闌閒下鍵。暝深連閣見通燈。薰薰浮篆才餘火。酒滴供研自

不冰無柰此時懷。共被各分臺。暑擁青綾。

李仲令挽詞二首見聚珍本卷十一

出城寫望因侍祠出宿

驅車南陌道。物色喜春還。水暖初成浦。雲晴不抱山。原委平澶漫。禽哢巧間關。此適非謀野。祠官只在閑。

禁門待漏見聚珍本卷十三

寄葉道卿見聚珍本卷八

和中丞晏尚書春陰見聚珍本卷十四

海棠見聚珍本卷二十三

小桃二首見聚珍本卷二十三

海棠見聚珍本卷二十

與獻臣希深伯中源叔景純會飲城東小園見聚珍本卷二十三

清明值雨見聚珍本卷二十

和三司晏尚書謾成

日烈花休樹結陰。紅牙貪調萬黃金。伯松不學陳遵飲。爲識鴟夷是酒箴。

扈從至奉先寺回

見聚珍本卷二十二

乾元節錫慶院燕

盛節推慈洽宴觴。千官不拜儼分行。擣彈併給黎園部。曼衍爭趨角觝場。傳炙濯壘紛絡繹。神仙綵樹互低昂。名會面內于胥樂。歡譁遙通戴斗香。

皇太子誕慶

軒祐深叢祐。文支此挺生。重輪當月滿。一索應乾成。瑞麤昌綿緒。天弧仗左檠。海雖分幼潤。星已慶前名。緩帶羣心洽。吹銅順氣迎。歡觴交祕幄。曲赦徧離京。漢祝昭謀貺。周篇記路聲。從茲詒翼永。斯萬見承平。

三司晏尙書西園玩菊

見聚珍本卷八

送郭太保知相州

見聚珍本卷十六

和三司晏尙書秋詠

見聚珍本卷二十三

王沂公挽詞三首

見聚珍本卷九

送靜照大師歸餘杭

見聚珍本卷十七

翠樾亭

見聚珍本卷十四

屬疾

見聚珍本卷十二



景文宋公集卷第二十九

律詩

馬上見殘月見聚珍本卷十

聞蛙二首見聚珍本卷二十二

祇答晏尙書懷寄之什見聚珍本卷二十三

早秋二首見聚珍本卷二十四

冒雨晚歸馬上口占見聚珍本卷二十四

下直

殿樓傳鼓報歸鞍。槐道逶迤出九關。雨罷浮雲留北闕。朝來爽氣徧西山。倏逢行轡排朝度。稍見晴鷗接翅還。癡計未容官事了。只驚潘髮颯然斑。

宣獻宋公挽辭三首見卷十八。題作司徒侍中宣獻公挽辭。此係重出。

春雪寄鄭府尹見聚珍本卷十五

和三司晏尙書西園暇日

陰陰嘉樹雜花殘。下曉行吟靜更歡。草葉參差聊藉帶。竹皮粉墮即爲冠。餘杯更辨浮冰耐。小衽初思御月執。公有吾廬無限愛。海圖周傳不同看。陶淵明詩有吾亦愛吾廬之語。又曰汎覽周王傳流觀山海圖。

句休二首見聚珍本卷八

禁中垂柳

曼線長枝不自收。天姿濯濯與風流。已隨曉佩拖三綬。更伴春旗亞九旒。盡日舞殘芳吹在。此時眠熟暝煙留。宮中二月多行樂。爲掃清塵待翠虬。

元會詩六首第一首見聚珍本卷八

亨運樂斯逢。多儀粲云展。雜襲置蘿圖。顯昂瞻邃冕。泮碱履行進。分墀佩聲轉。蚤極自成恭。歡餘還作抃。惟新茲首祚。傾祝乃祈年。光華無輟旦。先後不違天。賀牘紛陳几。祥圖藹奏篇。南金照靡麗。塗玉截昉鮮。穆穆集華黻。煌煌開燕席。壽薦萬年觴。音諧四廂石。右秉蠹文羽。左軒揚武威。再飯人屬厭。三行酒溫克。陽秋履端月。象魏布和辰。解辯穹廬使。吹笙萍野賓。帝暉仍接晝。皇澤共成春。盛禮年年覩。祥祺日日新。自昔君無勞。有言朝不夕。遙聞索扇上。已見歸輿飭。千門詔解嚴。萬官均詠德。愧以斐然章。無裨從臣職。

和官師陳相公

公辭四輔貴。纒營三畝園。來詩有城中三畝宅之句。此地山林樂。當年巖廟尊。庭藹有新馥。郊禽無近翻。熟喻治窮僻。

乃符蕭相言。

和晏太尉二首

紫宸賜宴見聚珍本卷二十三

寄君玉學士

鷄檄防邊未得休。又停歡酌爲前籌。良辰併賞何憂晚。它日三公尙黑頭。

和致政燕侍郎舟中寄晏尙書見聚珍本卷十八

和晏太尉懷寄燕侍郎

賜車高掛得長閑。猶寄南宮事外官。招隱新君無怨鶴。趨朝舊路記翔鸞。滄浪濯罷垂纓懶。礪塊澆餘著酒寬。行到昔人知足地。羨君容膝易爲安。

和晏太尉三月十三日錫慶院二首見聚珍本卷二十三

和晏太尉西園晚春見聚珍本卷二十三

句休見聚珍本卷十三

送越州陸學士見聚珍本卷十四

和天休龍圖經句署懷舊憶道卿舍人并見寄

帝梧春早二鸞飛。羈羽孤翻得樹遲。今日併巢阿閣畔。依然同識舊棲枝。  
諷書小史非新至。比舍名郎半昔游。君筭青雲多少地。三年來作北平侯。

送福州通判陳鑄

州閣紆新綬。鄉枌歷故塵。先驅長卿貴。隨子大家賢。桂蠹閩君貢。刀耕越俗田。春郵有歸信。正待早梅傳。  
戲招君況舍人

紅白戎葵相間繁。含情盡日對書軒。夫君太特西垣貴。只愛當階藥樹翻。

答道卿舍人桐竹之嘲 見聚珍本 卷二十四

馬上遇雨 見聚珍本 卷十七

送黃祕校 見聚珍本 卷十

送承制劉兼濟知原州 見聚珍本 卷二十

卽事 見聚珍本 卷十二

對月 見聚珍本 卷十

喜仲微學士直右史

殿棟洪紛冒紫霏。新聞再拜上丹墀。左右史初到職必再拜乃升殿日高中禁仙香馥。輦度橫街赭傘移。寶校對呈天廡。

馬輕兵看闕羽林兒因君此際磨坳墨偏憶當年第二螭

行香見聚珍本卷二十三

和晏太尉晚夏

炎威不可度永晝坐南軒蟻過閑占雨蠅來自厭樊林披衆果熟池靜數荷翻早晚韓鷹習乘秋擊迥原

和王龍圖七夕直宿見聚珍本卷十六

和道卿舍人奉祠太一齊宮見聚珍本卷八

和道卿舍人承祀出郊過西苑馬上有作見聚珍本卷十九

皇子封建詩

醉表歧姿茂皇基慶祚融玉圭先啓國銀榜後題宮茅襲封壇舊金頒瑞節雄恩添少海潤歡激小山風  
抱拜殊藏紐敷言異戲桐燕詒光祖烈調護切宸衷育德吾君子庸親天下公異時瞻出閣縣懸頌無窮

比日

比日投簪隱孟峯列舍椽值巖因作牖仍礪卽疏泉斧爛仙基路花飛佛雨天諫帷他夜夢猶在翠微巔

宿直

三重仙閣道家山寓直由來惡素餐漏近章溝先報暝樹連溫省未知寒蘭釭靜對朱花結芒帙閑披白

蠹乾前膝正宜無夜召。賈生衰髮僅勝冠。

晚秋集晏太尉西園

邂逅翹材客。乘秋共涉園。淺葩歡所媚。寒日醉中暄。目遠鴻堪送。蟬休鵲自翻。長年無所嗜。惟有不空尊。造適銜杯醕。情來念物華。喬柯寒自籟。荒菊晚猶花。袞袞飄談麈。焯焯下日車。歸騶侵暝鼓。無復避堤沙。

監中會雨禁諸公飲餞吳舍人梁正言富修撰葉龍圖以計省不赴作詩見寄見聚珍本卷十五

和待制龐學士寄獻宮師陳相公見聚珍本卷十四

次韻和宮師相公因待制龐學士賢年二韻易川然兩字

龍樓一品亞台聯。佚老歸來帝養賢。商皓嶺芝追隱伴。胡公潭菊得高年。客盤梅熟經調鼎。宴渚舟橫舊濟川。延閣裁章紆和曲。玉音風馭共冷然。

屢乞近郡詔不許見聚珍本卷十四

次韻和宮師相公南游舊山還及闕下二首見聚珍本卷二十三

答天台梵才吉公寄茶并長句見聚珍本卷十八

和晏太尉三月望日見聚珍本卷二十三

和晏太尉早夏

寂寥春藹盡。岑蔚夏陰稠。舌反禽稀弄。頭昂麥併秋。直宜處臺榭。稍欲厭巾幇。可待蒲葵直。思從謝傅游。

晨赴書局

見聚珍本卷八

送謝處士南歸

見聚珍本卷九

和樞密晏太尉元日雪

見聚珍本卷十三

送連庶

見聚珍本卷十





# 景文宋公集卷第三十

## 律詩

出穎上唐公張集仙相勞見聚珍本卷八

過肥口二首即晉師破符堅處

肥水縈如帶。淮山崢似雲。此時聞鶴唳。無復畏官軍。氏醜矜凶甚。臨流列萬幢。由來不出項。何苦欲浮江。

初到郡齋見聚珍本卷八

行樂二首第一首見聚珍本卷十。第二首見聚珍本卷二十三。題均作行樂。

中秋夜不見月二首見聚珍本卷二十四

木芙蓉盛開四解見聚珍本卷二十二

仲冬二日使到頒翠毛錦旋欄見聚珍本卷十三

立春前二日簪雪見聚珍本卷二十

聞歸鴈見聚珍本卷十二

一百五日官舍作

晉歌本自傳幽憤。楚俗緣何作勝游。宴豆雕文誇淪卵。俠場星影鬪飛毬。光翻蘋吹都無力。暖著花煙不肯流。擣杏沃錫紛節物。更慙多病怯寒甌。

書齋前柏八株森植翠茂

見聚珍本卷二十二

已落牡丹

世間惟有不勝妍。愁對韶華欲暮天。已被風開又風落。要爲人羨卽人憐。

淮山

見聚珍本卷二十四

郡圃

側曲艷歌閑送日。晚花初葉暗留春。舞狂風蝶時過樹。啼熟林鶯不避人。

小荷

見聚珍本卷二十

池上

晚暘西池上。池清暑氣微。雲煙互明滅。蒲荇兩因依。戲鱉來無定。眠鳧久自飛。紛吾刀筆慮。逢此憺忘歸。

淮祠謝雨

雨罷天披霧。杓回夜向晨。煙簾出郊路。燈火侍祠人。破月斜銜桂。傾河淡掃銀。三時此修報。慙負駕崧輪。

晚夏高齋看雨

雲族窮天雨足垂。繁聲涼陣挫炎威。圓荷萬蓋翻珠玑。綠稻千畦灑佛衣。迎浪孺魚銜藻擲。逆風雛燕入樓飛。原田潤浹吾農樂。簞笠紛紛晚未歸。

題挽鄧亭

亭學士楊察所修。既成而楊被召。故僚屬共名之。

鄧守挽不住。眷予番久留。決非人所挽。胡不理歸舟。

到官朞月病益損樂職感懷

天與疎慵地人無榮進心。死灰差免溺。奴甲反棄杖卽成林。主諾固多暇。避賢懷所欽。難邀潁川風。敢望漢

臺金。漢時太守增秩賜金。倚酒狂雖在。前衰歲已侵。恭聞容考績。緣此未投簪。

苦熱二首

夜火雖中氣未清。篋頻練倦若爲情。峯雲不動林煙熱。正爲蝸蟻作沸羹。

秋陽晝長不可度。身被單葛如重裘。何當急雨洗天地。坐使清風還九州。

七夕

見聚珍本卷十六

秋夕不寐

見聚珍本卷二十二

木芙蓉

見聚珍本卷二十二

酒胡

誰刻優胡象。來爲飲席珍。不因君屢指。幾洎作獨醒人。

觀舞

蹀躞趁繁會。婆娑無定妍。心知吾地廣。長袖得回旋。

峽石寺

見聚珍本  
卷二十一

寄獻楊州

平昔懷親友。銷魂重遠辭。于今急難地。那復別離時。脫木乾坤晚。窮途日月衰。憂餘曾得愜。涅罷返無淄。楚分多連澤。淮居止雜夷。持尊相望意。不減見瓊枝。

過惠崇舊居

崇工詩有名于世  
見聚珍本卷十

哭郭仲微三首

見聚珍本  
卷十一

讀賈誼新書

誰謂賈生學。兼之文帝朝。死憂王墜馬。生賦鵬如鴉。被召宣溫密。矜功絳灌驕。勤勤論五餌。史筆未相饒。  
班固強五餌以爲賤。蓋不見賈生之功成耳。

讀史

昔事堪追咎。斯人亦寡謀。臧倉君側毀。趙孟死前偷。直筆空料理。忠臣遂隱憂。只應詒後世。三歎廢緹油。

讀巷伯章見聚珍本卷二十四

對白髮自感寄揚州

四十仍逾四。顛華鏹更新。應從多病日。遂作始衰人。毀積方銷骨。經窮先腐脣。竟誰憐種種。由此到諄諄。  
軒冕間關路。風波蹭蹬身。兄今又過二。何術奈蕭辰。揚州又大二歲。其衰可驗。

偶書見聚珍本卷二十

思歸見聚珍本卷二十一

守歲見聚珍本卷八

得故人楊備書見聚珍本卷十九

詠懷二首

榮願日云暮。安論輕且肥。嵇慵元抱病。遽晚況知非。餌落愁魚鯁。巢成羨鳥歸。吾生江海志。終不與心違。  
盡信書奚信。難言命敢言。竟誰成簡冊。無客問乾坤。值狩麟猶泣。遭君鶴乃軒。滔滔千古事。惟有付芳樽。

聞蟬見聚珍本卷九

有懷寄同舍見聚珍本卷十八

述懷感事寄子明中丞見聚珍本卷二十一



景文宋公集卷第三十一

律詩

秋興三首見聚珍本卷十二

不寐見聚珍本卷二十三

送張司勳福建轉運使見聚珍本卷二十四

舅氏自壽陽由京師歸安陸見聚珍本卷二十

尹學士自濠梁移倅秦州見聚珍本卷十九

送蘭殿丞赴闕見聚珍本卷十八

送黃寺丞謫濠梁見聚珍本卷十二

重陽前二日喜雨答泗洲郭從事見聚珍本卷二十三

得杭州鄭資政書見聚珍本卷十八

答宿州王素都官見聚珍本卷十七

答戶部句院王學士泊滄陵見寄見聚珍本卷十八

寄宿州王都官見聚珍本卷十七

和資政諫議六章

初到郡齋三首見聚珍本卷八

東亭見聚珍本卷八

秋日西望

晚衿清曠屬層樓。搖落乾坤共作秋。正爲中山存闕意。得無平子側身愁。

東亭見聚珍本卷二十四

柔上人年八十不出夜讀細字見聚珍本卷十

奉和宮師相公流杯亭詩并太傅相公樞密太尉和章次韻

築巖春脉下飛泉。林閣留賓敞慶筵。流水環階智者樂。醇醪飲吏相君權。曹參爲漢相吏有欲言事者參飲以醇醪使不得開說和

歌遠屬鈞樞舊。襖帖閑存爵里賢。此地勝遊誰復見。醉波深映六符天。

憶舊言懷寄江寧道卿龍圖

下蔡行差近。金陵路更東。切切成念遠。咄咄但書空。恩厚容藏疾。時亨途諱窮。祿慙千石守。老謝一錢翁。憶昨趨陪日。仍緣班序同。君始入四掖予升內閣每內朝同班我生真寡合。君量自旁通。散裘疑皆瑩。忘疲宴屢終。聯驂屬



車後數曾未央中。禁樹排頭碧。衙旗曳尾紅。籠街接騎士。賜管鑲宮工。慈豆分堯箒。歌雲識沛風。斯文誠有屬。吾道匪常隆。秦市俄驚虎。鈞天亟駭熊。塵埃忽蒙白。桃李併來蟲。箕次橫長舌。颺輪走轉蓬。欲芳間鷓鴣。禦濕問芎藭。可笑矜踈節。私憐抱朴忠。望霄嗟墜雨。欲翼避虛弓。尙忝銀符密。貞誇隼旆雄。王魚供晝啜。淮魚味甘如白王珠米報秋豐。州貢米有稻羅光粒粒如珠病久衰還早。身閑意愈冲。虧全從月蚌。喜怒任狙公。急景沉歡緒。長波隔訊筒。南飛俱似鵠。北嚮未如鴻。二開懷趨走。道卿直龍圖予待詔天章重關限鬱葱。惟應心報國。丹赤關江樞。

喜連君錫過郡 見聚珍本卷二十一

答李從著作 見聚珍本卷十六

答客 見聚珍本卷十

和延州龐龍圖見寄 見聚珍本卷十六

再寄 見聚珍本卷十六

次韻宮師相公答太傅相公秋書 見聚珍本卷十五

次韻罷相游故園 見聚珍本卷二十二

憶與唐公西湖 見聚珍本卷二十三

九日憑高有感見聚珍本卷二十四

望仙亭置酒看雪見聚珍本卷十五

望仙亭晚睡見聚珍本卷十一

九日置酒見聚珍本卷十八

清明日集西園見聚珍本卷十七

峽石乘舟晚歸見聚珍本卷二十

望仙亭書所見二首見聚珍本卷八

冬日城樓駐望

城上危欄徙倚頻。由來荆楚歲時新。寒塘酒幟能留客。晴塢梅花解笑人。客鴈參差仍向渚。貪魚撥刺不空緝。憑高更盡三吹角。坐見霞霏仄半輪。

西園

日涉中園路。昌昌春意深。鳥新無罷囀。雲暖不常陰。秀色平連野。芳姿細著林。歡言挈齋酒。值興卽徐斟。

二月十四日西園晚眺見聚珍本卷十一

齊雲亭晚闕見聚珍本卷八

西園三月十一日

春園來繼日。學葉暗東西。蔭樹都成幄。尋花旋作蹊。沼魚銜尾戲。林鳥合聲鳴。寧暇并州問。山公醉自迷。

小酌感春邀坐客並賦

見聚珍本卷十二

出城暫憩林下

見聚珍本卷九

晚夏西園二首

道樾陰陰密。畦泉活活流。梨成津向潤。瓜熟子相鉤。日晏坐中園。清襟注迥軒。輕颺逢葉動。小雨得荷喧。

望仙亭北軒晚思

見聚珍本卷二十四

齊雲亭憑高有感

憑高極目意茫然。坐對淮南搖落天。空把歸心同客鴈。遂將緘口伴寒蟬。一罇醒醉黃花外。萬事蕭條白

髮前。誰取長弓射鳥翼。休教西日送凋年。

晚眺

見聚珍本卷十一

晚秋西園

西園來最數。要是使君閑。塢有常眠石。臺無未識山。池光兼日動。楓影帶林殷。鳥沒蒼茫外。天垂搖落間。歸雲高杳杳。黃菊正斑斑。幸有齋中熟。無嫌向晦還。



景文宋公集卷第三十二

律詩

有詔換淮陽

見聚珍本卷八

閏九月晦日登舟二首

見聚珍本卷二十二

去州三宿八公山宛然在望

山長如不去。三宿趣行舟。未必緣人意。祇能攪客愁。勸程方浩蕩。回首更夷猶。獨有相思恨。因之東北流。

同張子春淮上作

見聚珍本卷八

道中二首

故歲南趨壽。今茲北向陳。淹留桂枝客。還入玉關人。髮髮都成葆。纓纓幸濯塵。心知來往數。不敢問迷津。橫船清潁岸。岸豁見高原。桑柘寒煙路。牛羊落日村。扣舷漁艇集。爭食渚鳧喧。去去風波事。逢人未易言。

晚發二首

候鼓遙喧岸。行舟逆上湍。輕烟著波面。斜月罷林端。颯沓鳧鷖亂。蒼茫葭葦寒。使君何所憚。便道許之官。曉瀨雖能迅。寒流不復漲。林聲散棲鳥。隄影度風檣。茲歲方云暮。吾行未渠央。病身非汲黯。安敢薄淮陽。

宛丘作

見聚珍本卷八

喜雨

見聚珍本卷十八

春晚官舍呈幕中

萬點飛花拂路塵。行春罷後惜殘春。雨催菖葉全成甲。風播榆錢不算緡。多病已慚官綬束。長年惟共酒杯親。坐題吏諾君何怪。只是漣漪素食人。

一百五日作二首

見聚珍本卷二十二

滁州趙學士重脩懷山松樓

見聚珍本卷二十

暮冬城上晚睡

見聚珍本卷十六

按務東橋駐望

岸峻雙旌駐。橋橫一水長。凍舟真欲膠。低鴈劣能行。發發天含籟。稜稜野雨霜。停驂重回首。直北是吾鄉。

行春野外

見聚珍本卷八

登清思堂寫望

迢遞陟城隅。飛軒浩氣扶。春容來迥野。天脚人平蕪。暖吹時披拂。晴烟乍有無。耨痕經雨徧。村逕值林迂。長庠初休馬。荒陴稍集鳥。水生蒲澤漫。林缺弩臺孤。客思紛難泊。愁衿愧自拘。久之成悵望。西北認皇都。

寄公序資政給事

見聚珍本卷十八

答翰林燕學士

見聚珍本卷十七

喜翟穎先輩至有感

門下客逾落。胡爲君見從。墜餘仍顧甌。寒罷始知松。休計流光邁。聊欣此地逢。已甘漂似梗。寧止啞如鐘。仕路惟希退。鄉評幸見容。病偷它日壯。衰作長年慵。世態同波蕩。交情敵酒濃。好堅歸去約。相伴老三封。

元本此下至卷末皆佚。





景文宋公集卷第八十一

元本卷首  
第一頁佚

表

代鄆州王資政謝上表

臣某言。奉違帝幄。甫洩价蕃。切三輔以聯圻。長萬夫而督政。感隨戀結。榮與愧并。中謝切念臣本以中材。弗期廕仕。先帝拔之。凡瘁飭以龍光。赦夫用拙之艱。詭其效智之實。與聞國論。參服臣鄰。自爾叨食寢浮。計恩逾厚。越逢下武。不荷慶基。垂念舊人之庸。俾行丞相之事。時惟物載。謙有未遑。介于兩宮。政亦多故。而臣荷知人於真聖。念在耳之緒言。冀蹈朴忠。歸報明辟。執據典刑之重。傳會幾微之宜。一心事君。朝廷尤悉。千慮期得。夙夜所強。寧無媒孽之乘。果從災異之免。六更年籥。三易守符。嚮沐召歸。再加授拭。始由樞省。俄正台司。臣亦知遺籙蒙顧之餘。鳴鶴失旦之後。方且擇典之令。保節之甘。慎獨閑邪。誠明遠悔。歷接虞棟。幹之撓。折足畏鼎。飭之羞。漸冀協恭。□□同底。其如窮陰難忱。槁質易衰。病目眩於臨文。蹇步疲於拱著。三吏者彌綸庶采。外朝者景式辟工。苟容具臣。焉謂彼相。輒啓還於魁柄。謀退保於餘年。危懼上聞。費辭貽瀆。敢謂尊號皇帝陛下。納之大度。惠以有終。延聰聽於蓋高。寒煩言之先人。時推麗澤。用獎告勞。升冠揆階。崇兼禁職。擇濟潔之津奧。距齊魯之富穰。垂許典州。漸令佚老。前瞻天邑。無勤象闕之思。右

睨鄉疇。易及角巾之計。曲成至此。大造難酬。伏况犴測屢空。稼茨其稔。室盈杼軸。無乏於二東。吏勸農桑。明宣於一札。願寬旰人。冀力循良。迺邇綴以方遙。注孤情而奚極。臣無任

生日謝生餼表

臣某言。門弧蓬筓。私誌於始生。牢餼坊尊。旅霑於蕃錫。感親懷之不逮。媿君旣以無從。登受以還。腆榮罔真。中謝切念臣代惟羈齒。才本拘儒。乏于內之美猷。與惟幾之秘筭。幽而當黜。日儆於攸箴。求不爲瑕。上麻於大度。然而拙牽其分。志奪於衰。始蒙晏晏之風。寢介容容之福。何圖暮齒。彌示矜憐。因震夙之有初。憫劬勞之永謝。特頒多物。俯續頽齡。鍾庾陳庭。荷饗嗣道。回望秋之蒲質。更俾欣榮。駐仄日之缶歌。仍資宴喜。斯蓋尊號皇帝陛下。懋敦邦憲。欽待臣鄰。因舊體之則然。諒孤生之曷稱。撫躬銜遇。糜踵爲酬。臣無任

讓恩表

見聚珍本卷三十八

代進新稻雙竹詩表

見聚珍本卷三十六

謝恩表

臣言。昨以遘勤歸之慶。膺序進之褒。尋述讓封。亟煩敦詔。蒙心慮於再瀆。君貺難乎重違。拜受以還。榮悻參極。中謝切念臣學纔半古。智不兼人。參筦斗樞。嚮周閏籥。仰丁至治。丕迓舊章。恭屹嘉壇。哀侑上帝。美

祥來答繼日月而可書。渙號遂行。寒天淵而交抃。惟茲卹祀之重。實與相儀之行。早苦病衰。僅逃跛倚。猥緣近侍。亦冀賞科。慮塵不僭之猷。輒罄自知之訊。冀還渥綬。少息震惶。而善聽既高。危心終隔。固執其介。則違聞命之恭。寧忝其榮。以圖保往之報。然念茂功匪建。美號前加。品章表於魏階。勳柱隆乎楚級。茲爲徽數。曷允師言。此蓋中謝尊號皇帝陛下。能哲有初。推仁無貳。獎纖塵之益。以勸事君。法景風之來。速其行惠。俾夫無狀。叨厥懋官。誓斷斷於公心。答恢恢之私覆。無任

代謝進五箴獎諭表

見聚珍本卷四十一

代張屯田兗州謝上表

見聚珍本卷四十一

代石少傅謝恩澤表

臣某言。伏蒙聖慈。特授臣姪孫某某官者。聖澤下頒。詔綸有煥。慶叢闔闔。光動里閭。中謝伏念臣退迹。榮餘年種種。尚叨儲傅之秩。許懷家巷之安。養且有仁。德將焉謝。近緣誕聖之節。更陳延賞之求。伏蒙尊號皇帝陛下。大度包荒。至慈及物。甫從人欲。卽霑臺恩。孝治方隆。許及宗親之末。衰容無狀。更流枝葉之榮。揣分旣逾。糜軀曷報。

代人陳情表

見聚珍本卷四十一

代人乞出表

見聚珍本卷四十一

代陳州章相公乞致仕第一表

見景珍本  
卷四十一

代石少傅賀南郊禮畢表

臣伏觀今月二十五日南郊禮畢者。國祀告竣。天行飲至。慶騰方夏。歡浹綏紳。竊惟恤祀以誠。有國之大節。饗帝爲報。唯聖之上儀。矧三歲以躬行。合百神而並職。本朝所重。緝典攸先。恭惟陛下。誕受葆圖。不承前憲。躬自儉薄。政實焦勞。百穀已登。坐躋仁壽之俗。五兵雖用。常戒忿鷙之師。是以列緯澄霽。尤祥駢牒。用懷景貺。乃講鴻儀。申敕庶官。駿奔百執。款殊庭之祕奧。覲清廟之邃嚴。遂及郊丘。祇奉圭幣。儀必及物。史皆信辭。樂六變以咸和。台祛乎天地。禮三獻而不怠。哀對乎祖宗。熙事備成。至靈歆感。逮彫輿之旋軫。坐巖闕以推恩。澤與雲翔。俾羣元之更始。命先郵速。包無外以相歡。昭洗故疵。導迎新祉。臣幸還所事。繼屬縣疇。前滯一纏。空羨藻鳧之筮羽。蹒跚三陌。但同陽翟之傾心。引領私門。注情神闕。

# 景文宋公集卷第八十二

## 表狀

代南郊乞姪男恩澤表 見聚珍本卷四十一

代謝加恩表 見聚珍本卷三十九

代生日謝賜羊酒米麵等表 見聚珍本卷四十一

代陳情乞尋醫表 見聚珍本卷四十一

代乞自試表 見聚珍本卷四十一

代轉戶侍充職知廬州謝表 見聚珍本卷四十一

代薛資政謝許住京養疾表 見聚珍本卷四十一

### 代謝加職任表

祇膺洪霈。伏積深憂。竊以鑿坡爲侍從之榮。天畿居郡國之首。唐垂四禁之制。謹申命於時幾。漢列三輔之圖。慎觀風於大衆。必咨邦彥。始允公言。竊念臣材出下中。世惟寒素。先皇帝識自無聞之伍。擢于尤異之科。歷玷仕塗。窺寢王體。九德咸事之世。叨服上仁。下官不職之誅。幾煩深刻。內惟陋寡。姑守樸忠。慎夫

緇磷之遷。安于庖祝之分。屬以重明紹纂。慈治協宣。樂鳧鷖之守成。並循先憲。均山藪之藏疾。垂采空名。入玷星垣。預裁芝誥。昭昭天采。罔裨灑詔之風。坎坎河干。坐愧淪漣之刺。方議免冠之請。以懲褻被之風。敢謂陛下。慎緝邦經。恢明官式。謂鵠長鳧短。難強於委材。而免極犬疲。可矜其悴盡。俾條久次。推進茂恩。升嚴署之重深。兼神臯之穰劇。永惟二事宜得。烝髦詎茲無狀之臣。可玷類能之舉。難祇成命。曷弭煩言。謹當精索隱微。勤居夙暮。君如堯舜。奉不律以修詞。前有趙張。按成規而措事。庶逃尸監。上答睿明。

代楊鄆州謝上表

蒙恩授臣知鄆州軍事。兼管內勸農事。卽於今日到任。上訖。謬分左契。臨長東人。提千騎之雍容。有六條之森備。出麾有幸。坐閣增榮。切念臣箕斗虛名。丘園微介。決科僅中。論績稍遷。遘明辟之纂圖。忝望郎而升秩。用惟枯木。不自先容。細及秋毫。罔非帝力。但罄如絲之亮。曷知媚竈之求。終賴洪慈。免其大戾。甫周一閏。更典三藩。銜箋藪以見容。負支離而竊祿。昨緣使道。獲遂造朝。許留數刻之閑。俾與百金之奏。俄煩節召。改錫袍紋。追露冕之爲榮。均解衣而拜賜。胡然頑陋。糜爾寵光。斯蓋伏遇陛下。遙駿先猷。亟蒙庶品。謂乎俎豆之無越。矜其丹腹之可塗。曾不疵瑕。猥從器使。伏況汶陽疏壤。魯道遺黎。昏作屢豐。敦龐俾乂。雖屬河公之近決。不妨田峻之有秋。惟冀至仁。少寬中戾。臣敢不內循不訓。上體寶慈。列三壤之埴壘。勤修稼政。愛二東之杼軸。底慎邦財。儻臻樂職之風。冀贖浮人之刺。

太后表

驟違天咫。祇率星言。趣四牡以載馳。戾萬夫而樹政。大東之奧。剖左爲榮。竊念某智本顛蒙。數惟奇隻。早辱縣官之使。遂代上農之耕。曾乏所長。仰裨乃事。支離有素。居延受粟之譏。樸屬而生。久玷能官之詠。連更郡寄。再覲宸嚴。清明會朝。與陪於有著。好醜必上。令盡某所言。復加五品之章。以示百城之寵。洪惟幸會。負絕擬倫。斯蓋陛下仁篤好生。惠深藏疾。扶盧直鑄。各盡於有能。溢海附山。或取其微益。俾茲蠢野。尙玷寵私。矧汶上之名藩。本魯初之奧壤。承平在旦。富庶敦風。臣敢不律乃叢軀。撫茲善俗。中庸厥履。日夜以思。束矢鈞金。體欽哉於庶獄。杏華菖葉。誠勤止於斯民。少寬當辰之勞。上答包荒之賜。

代孫侍郎謝加龍圖閣學士一表

見聚珍本卷三十九

皇太后表

見聚珍本卷三十九代孫侍郎謝加龍圖閣學士表第二首

代張相公乞致仕第二表

近以寢迫衰年。啓歸宰政。仰紆聖詔。中祕俞音。抱感雖叢。撫情難隱。伏念臣材資素下。世系本寒。先帝擢自草茅。飾之丹牒。不知駑鈍之素。與聞政事之宜。位過其涯。民肯多謗。時屬陛下茂溫文之懿。膺七鬯之承。實參乃僚。俾輔成德。親奉清明之始。已階極近之聯。廩賜日優。名器雙假。自爾秉旄在外者。再當軸居中者。三責任併加。謨謀弗稱。羣臣之所同悉。上心之所自知。遭時洽平。容得無吝。方今邊鄙未靖。師旅且

勤吏苦遠餉之勞。民罹橫調之役。上干穹昊。延致沴災。辰不用行。風終而噎。煩側身於昧旦。形罪已於至言。咎靡自它。臣任其責。當從司敗。亟正嚴刑。尚沐包荒。趣圖就效。然而鍾漏餘景。迫已耄之辰。蒲柳瘁萎。無可勉之狀。尚偷安於天秩。必取悔於朝彝。伏況請老者禮經之常。乞骸者邦典之舊。揆臣之齒。久已過期。行己之方。亦當專事。伏唯陛下。全要領。賜罷丘園。憫盡力於壯時。惠克終於末路。至若動危辭任。已寬弗忍之誅。得謝推仁。方伸不奪之志。罄辭翹慮。須可爲祈。

代張相公乞致仕第四表

近以馨露乃誠。上還所事。猥紆深詔。卽斷來章。情有未申。義無苟默。罔逃冒格。終冀矜兪。切念臣淺器薄才。遠塗暮景。嚮緣舊物。再忝上司。貪懷感會之華。久孤丞弼之委。遂乃延災列象。取玷盛辰。師積歲以留屯。人餉邊而重困。廟議之失。實始建明。國典所懲。自當先坐。而冥煩近識。昏耄浮齡。但安舍垢之容。罔慮妨賢之素。靜言內訟。愧悟前非。是以仰丐菟裘之營。苟紆石慶之責。祈收印綬。許罷丘樊。外則圖天變之銷。內則期台路之穆。上全爲國之惠。下安知止之常。夙夜以惟。始終交允。且念士無奪志。則臣之申請者三。禮著引年。臣之過期已七。危悚備悉。嗟耄幾何。伏望陛下。寬無狀之往誅。軫必從之今欲。俾其納政。許以乞身。得均請老之流。是無齎志之恨。必若寶慈未忍。可制中留。便當輿疾遁歸。頓纓狂蹈。自捐餘齒。或累大恩。言瑣喻繁。所希開允。



代張相公乞致仕第六表

茲者叩關五請。須命再旬。畏責任之道悠。迫退歸之日短。未蒙順許。始示褒存。而言訥無可喻之情。志窮有不奪之介。尚餘確控。終冀垂矜。竊惟就列揆能。審於自卜者。臣之誼也。疏祿養士。恩不聽辭者。君之仁也。推其仁。所以穆御邦之要。秉其義。所以崇視履之方。事主保躬。二端而已。如臣者早緣舊物。更踐上司。高秩厚封。乘時而感會。警言謬策。見納於睿明。筭宰相期。底裏交照。至於三揖在下。靡猜貳之嫌。百度與朝。皆聖真之舊。臣雖無狀。容可自安。但以衰朽之年。朝夕難保。法當得謝。古所引年。久尸厥官。焉用彼相。異日干校人之議。煩司敗之歸。雖使亟海包荒。回霜屈憲。而叟臣秉誼。得無愧知止之明。元后推仁。且將詒鮮克之悔。今茲納政。允謂得宜。伏望陛下。普訪羣謀。追觀往則。巧全要領。俾守丘園。紆日昃之深嗟。免夜行之明刺。亦且萬無纖隙。可累於朝。猷百兩餘生。有終於天造。翹心引領。用俟兪恩。

代乞罷第四表

比以三陳奏牘。上納政機。願乞槁骸。得去公路。而中詔垂錫。兪音未開。切救斷章。卽還視事。苦情既暴。拙喻已殫。不能拂天聽之崇高。回帝衿之感惻。拒命誠罪。奪守愈非。竊執愚冥。終祈順許。恭惟窮其所不能者。非用技之善。覆其所既滿者。非愛任之謀。矧四海安危。萬樞濟否。用又厥辟。相惟其人。苟器非所堪。力不勝任。齷齪之量。已試而積弗成。諄諄之衰。日偷而老。且至內曠天絳。外譴人言。借使藏疾之君。味進之

上亦不容久于倚注。叨此宴安。況臣雖乏猷爲。粗知廉愧。以兩朝含育之厚。加三事論思之崇。儻可勉行。敢云顧避。蓋念慮昏才盡。日索運奇。帷幄之計無良。邊鄙之饋數屈。師擊不解。天變仍臻。不當持燭火以冒晨。啖腊毒而求飽。辱國爲重。謀身乃輕。是以赴訴庸聰。必期徇請。輸竭私悃。止冀避賢。雖知而復知。近乎煩。而可言。不言謂之隱。願臣自揆。須聖洞明。寧觸煩以致愆。不涉隱而蒙上。伏望陛下推王者之法。据天下之公。念孤臣之竭誠。免司敗之論咎。止全終始。直俾罷歸。休息殘齡。弭除來謗。黜瘵用智。允穆於朝。風斂分收崖。并全於介節。一諸茲舉。兩便乃宜。延聽曲從。始遑寧舍。

謝御筆批表

伏蒙聖慈。以臣上表乞罷免重任。伏奉今月三日御筆批答。候郊禮畢。一年後許退。不得更上表求罷者。事敦情迫。業已啓聞。恩隆喻至。罔垂開允。刻誦聖訓。傾駭乃衷。伏念臣中人之才。無善可錄。因緣過聽。叨冒上司。奉承明制。而宣之朝。什不能五。總領羣務。而達於上。什不能三。徒以斷斷朴愚。區區慎蒞。旅進旅退。不敢後人。公車公言。止於寡過。若乃調度兵食。由置取豐。鞿致戎獯。化桀爲順。靖多辟之俗。去無用之官。訂正度程。燮撫樞極。則臣之自視。性有不能。陛下雖欲庇之至仁。貸以不死。謂憊則可恕。謂直則弗疑。奈何妨賢之譏。謹而弗可解。備位之責。至而弗敢辭。今臣順命。則取尤。違詔。又抵咎。稱疾以邀上。則詐。俛首而還位。則慙。茲焉危窘。匪謂文飾。而且寶筆親示。金口宣聞。既賒歲期。仍畢禋禮。切却來奏。獎卹藁軀。

粗識名教之方。敢渝君臣之誼。恭遵慈敕。已默費詞。誓勉不肖之材。上酬再造之賜。然念年齒頽邁。精力耗殘。陽雖蒙榮。陰或取譴。悔常待亢。吊止在閭。終冀數月之間。更續乞骸之請。眷深難荷。感至無言。



# 景文宋公集卷第八十三

表

## 代章集賢讓表

臣某言。伏奉制命云云者。台司云缺。方謹於咨。愈恩贊所延。躡加於轄短。內循能而不稱。進卽寵而匪遑。敢格褒音。徑敷危枉。中謝竊惟鈞柄之總。邦緯是毗。膺朝夕以告猷。一統類而爲職。周設三公也。惟人而備。漢分兩府也。待選寔艱。至於公孫開陳。良知作相之有體。建平風采。稍比治郡而損名。益知重雍撫期。同寅責實。能哲所以垂惠。注意在乎已安。詎俾無庸。首虛茲授。如臣者。材鷲而底。門悴且寒。本務自知。弗期孟晉。第以仕超所願之表。用浮有智之涯。擢始禁林。越陪樞管。高門之地。常重。遂用人輕。天下之務。惟幾。舉煩中覆。省私未報。引領安歸。用惕若以因時。幸僥焉而補過。不圖欽磨。更誤念求。僅踰一稔之期。遵承三吏之乏。賞階暴峻。功號頓蕃。重書殿之榮資。衍爰疇之實幹。王言顯布。公路騰咨。深惟得失之間。動關休戚之大。在易之鼎。覆渥戒其攸占。觀天之階。疏比應而如響。詎止詒於身悔。實并結於朝譏。與其被匪服之辜。寧容嬰如慢之責。伏望尊號皇帝陛下。察至誠之有素。惜重器而罔私。降采多言。追還麗澤。改詢廊廟之懿。參熙筭宰之隆。特丐衰齡。且仍故職。布盈辭而近瀆。須允報以爲期。臣無任。

代章集賢拜相第二表

見聚珍本卷三十九

代中書請復常膳第二表

臣某等言。近以常饗未復。繼援舊章。溫檢垂頒。尙稽允報。征營失措。昕夕靡遑。臣某等。中謝。伏惟尊號皇帝陛下。若古宣猷。右文敷治。克相上帝。寵綏下民。懼一物之失宜。冀九功之攸敘。嚮以歲元。肇曆乾緯。流占特刑罪己之詞。恭循菲食之變。勵翼庶政。焦勞聖懷。亟躋格於精裏。用振除於餘咎。天感旋屆。人情汔康。謂宜卽參禮典之中。還登牢品之具。進嘗珍旨。侑納粹和。陛下過執齋恭。淹餘旬晦。務謹哲王之戒。久隔太官之常。伏況體有等威。誼無降抑。垂裳當寧。躬朝夕之甚勤。侑樂養恬。濟剛健之常久。敢緣固請。仰丐僉音。願收天保之誠。復備君庖之舉。庶俾柔嘉玉食。不空惟辟之文。闡實陽休。更盛無疆之祉。費詞已罄。須可爲期。臣無任。

代章集賢謝恩表

臣某言。近以誤被制亟。躡升台府。刻章伏省。昧死還恩。煩允命以申褒。勅攸司而趣拜。事移願始。懼集寵初。中謝。竊念臣孤遠微生。間關平進。本謀干祿。纔望亢宗。然而運有親逢之期。朝無不肖之疾。遂蒙君養。寢膺仕塗。伏遇皇帝陛下。執競熙圖。垂明建極。翕受九德。練覈庶工。擢始冗官之聯。贊爲名命之重。深遷禁籍。進侍經帷。拙者於用雖多。何嘗云補。儒家在要而寡。固亦自知。巨言善任之辰。居濫升樞之委。尙以

三垂撒簞。五刃久藝。奉行止更踐之常。論思無調發之遽。待容樗質。猥忝天機。內畏將車之塵。方詒蹠馬之泛。更叨懋冊。超對上司。臣雖妄屏。粗識涯分。蓋三事非容容之忝。萬樞倚贊贊之資。與道同底者。亮采實毗。以聖責愚者。取敗尤速。徑披素款。荐控虜聰。陛下業已延登。竄無中止。遂乃出綸之信。闕乎銷印之言。勿使因辭。敦令就職。矧以階封並峻。職號兩崇。叢鉉席之異儀。絢槐朝之華典。抱誠終廢。順命茲慙。敢不免叩邦猷。力敷民藝。夙莫之勞是念。窒隙之智畢陳。但慮俯積謗囂。上延災譴。被鄙人焉用之義。煩漢家即免之文。脫收效於涓毫。冀紓期於顛殞。

代夏尚書讓節制第一表

臣某言。伏奉制命。授臣節度使檢校太傅云云者。朝綸疏霈。闡鉞頒華。任匪值能。誼無苟進。敢淹茂冊。仰訴危悚。中謝伏念。臣出自孤生。厘專樸學。嚮圖干祿。正敢代耕。先帝擢始下陳。俾升近綴。及其強力。試以方州。屬不后之龍飛。齒舊人而魚貫。入階峻秩。寢服清光。超貳乾樞之繁。問塵台路之采。拙艱自守。明睿素知。緣久次以出藩。歷四基而蒙召。還專計局。實寵使名。習見文治之常焉。知方略之總。不謂中軍謀帥。西屏須才。過聽妄庸。顯膺節制。竊竄圻而書社。叨公傳以視官。內循甚愚。猶識常分。蓋知役非其長。則憚任過於力。則顛。況欲乘華領之早衰。勉虛弦之餘怯。秉髦制敵。跪轂啓行。上副萬里之明。俯全百勝之決。求于宿將。庸或爲難。揆之迂儒。孰知其可。且勸能莫如責實。累國過於災身。匪敢自私。所虞有悔。伏望尊

號皇帝陛下、普詢公議、追止徽章、貨格詔之近愆、收嚴邦之遠計、改圖善武、趣立茂功、昧死申祈、俟兪知免。

代夏尙書讓節制第二表

臣某言。比者仰列需函。上還帥節。未蒙順許。滋極震惶。終恃至仁。更申前請。中謝竊以師無常克。視律之否臧。官不備求。惟人之輕重。是以楚鄖方用。鄰席側而靡安。漢傑已登。中帷坐而論勝。故能抗威齊斧。躋秩齋壇。有臣如茲。何賞之遴。若臣者。本緣儒進。偶與仕期。躡躡自將之塵。斷斷無它之謹。或施之刀筆。或責以簿書。雖曰曠官。不過任咎。至於顯膺誕告之渥。專制中權之雄。一失所謀。交累而國。安得冒顏於授受之始。隱情於進退之間。僭此負乘。假我名器。徒使有功罔勸。先啟邦人之媮。應敵非長。方詒史氏之誚。拒恩誠罪。知分可矜。伏望尊號皇帝陛下。垂亮苦言。卽收成命。僉求慎將。付俾元戎。庶當注意之辰。弗絀維塵之論。懇悰斯極。開可爲期。

代夏尙加節制謝表

臣某言。一昨啓避將旄。重垂恩詔。罔誅煩請。卽俾往諧。孤願易遷。徽章難拒。臣某中謝。伏念臣出于羈齒。弗逮遠猷。振蹟先朝。被榮華旦。淺謀與政。孤操奉公。顧匪服以叢譏。殆多憂而損性。氣隨事耗。體與年衰。徒仰蹈於盛明。遂自忘於勅去。因浮所食。勉宿爾官。何言右武之求。首被中軍之忝。外廷顯告。褒冊蕃臻。



擢一介之懦微。冠十聯之雄重。矧惟推轂之選。本待出師之行。而三純以來。二垂撤警。寢成威械之偃。絕觀檀車之勤。遂使開幕建牙。惟專受祿。屬韃汗馬。無所效功。今此僉求。止圖靜知。愈爲虛受。固願上還。至於秩視宗工。地分邇輔。兼憲司之劇職。鎮咸服之要區。雖參寵戎行。而更爲身幸。此蓋伏遇尊號皇帝陛下。念人適乏。超刈於譴材。謂令已行。罔收於信賞。趣交瑞節。馳領故都。拜命茲慙。省躬思報。敢不懋經方略。協布教條。上體眷懷。力期綏撫。冀彌悖於老學。得從事於新書。獲列萬分。誓廿九殞。

代石資政乞外任表

見聚珍本卷四十一

代宰相謝傳宣入伏月令午正歸私第狀

見聚珍本卷四十

代昭文相公乞罷免第一表

臣某言。臣聞無能之臣。至仁靡畜。焉用之佐。上聖所譏。何則。名器有分。責任無假。從古治亂。本三公之非其人。累朝罷黜。固宰相之自有體。天下公議。王者難私。老臣至懇。君聽宜亮。臣某中謝。伏念臣生自下國。系出單門。先帝擢之艸茅。華以纓弁。歷課刀筆。備嘗風波。還齒朝韃之趨。引內文林之選。孤根苒苒。因得少安。弱羽翩翩。其如長醜。伏遇尊號皇帝陛下。連隆闡釋。政重持循。見矜華領之餘。謂非它腸之惡。越司綸省。尋玷玉堂。思以中乾而遲。辭由外重而拙。敢圖晚路。猥副洪樞。文武之略何施。負乘之寇滋集。未淹再歲。俄正中台。于時主者見敦。不容還讓。處士之議。已自沸騰。尙冀飭構液以構材。勉契需以致遠。旋屬

黠羌畔命。西鄙宿師。餉役繁興。保戍係出。賊不時定。汔茲五年。財所當調。動且億計。縣官空乏。斯人歎愁。職居者敗。墨狎聞。師行者逗撓相踵。以致斗落觀釁。須索靡厭。輒書撫和。猜阻中定。此皆輔弼亡狀。處置乖方。淺慮不可計深。局謀不足料遠。六翻無助。九鼎爲輕。上遺主憂。下速邦侮。臣猶知罪。人其謂何。是以去歲中。昧死乞身。稽首還政。底裏罄露。親近具聞。所望改詢賢臣。翊亮天綽。親奉聖訓。使須後期。適以機省務煩。分提劇使。久之冢宰病去。因冠上司。遂復僂俛。卽恩遷延待罪。助經羣務。又及一基。今狄旣申盟。戎將悔禍。漸期屈伏。圖致靖嘉。則臣之經綸。止極于此。臣之引避。正合其宜。非不知變調陰陽。和一統類。時廡百穀。仰澄三光。使夷狄莫敢不王。臣工各任其職。柰何性分有止。強勉難成。贖脫於扛鼎之前。手傷於代斲之側。又況年事云耄。體力已衰。盛憲之憂。陰耗於百慮。師丹之志。顯廢於萬機。庸得自寧。以戮大事。伏望陛下。察臣試可之無效。憫臣底力之不前。赦其空疏。賜以停免。重惟疆場尙警。水旱相仍。帷幄急咨。謀之秋。廟堂非充位之地。早垂矜可。庶息謗囂。退一罔功。則材士肯勸。狗一知止。則薄俗自敦。此物此心。明神可質。以終以始。虜□是憑。敢道煩辭。止希得請。臣無任

第二表

臣某言。臣近露奏章。乞辭重任。奉被訓答。永賜開俞。蓋言拙者情有不通。理迫者義難自隱。敢空憑臆。再叩謀聽。中謝。伏念臣資稟無庸。志願有底。逢辰之盛。爲食所浮。旣承乏內樞。遂待罪宰相。昧於牢讓。輒爾

冒居室大楹小者。何撓之能支。綆短泉深者。胡汲之云濟。叶佐萬務。出入七年。而政不時經。民罔用乂。內微開陳將順之敏。外乏總領折衝之猷。徒以馴致久安。奉行成式。力殫而任益重。足躡而道愈悠。考課無成。中外同亮。弗能則止。從昔以然。且臣負責當免有三。謀私可歸有二。臣聞善宰者使中國尊大。四夷賓服。民不捐瘠。天無災譴。雖國嚮厥福。而身預其榮。今夏賊弄兵。湟胥丐貨。倔強沙漠。首鼠邊垂。千里之饋告勤。五年之戍不解。天誅淹久。廟筭依違。臣之宜免一也。內自淮浙。旁泊荆閩。雜調併科。比屋咨嘆。輸餽轉幣。列郡窮虛。京陝之人。勞役尤甚。去便居擾。官濫吏私。譁張之盜竊登。捉搦之使中出。臣之宜免二也。寶元之後。大變仍臻。地震定襄。日食九朔。白晝而晦。經轡失行。民食寢艱。地寶逾愛。害氣未究。民言莫懲。臣之宜免三也。臣齒歷既暮。形質早衰。晝視文書。則昏忘相半。夜偃牀簀。則呻倦併來。牽勉而行。僇仆將及。臣之可歸一也。且臣冠男笄女。天枉相繼。擠溝舐犢。悲割屢嬰。蓋顯責未加。陰譴先及。惟一息方幼。未能應門。百年收骨。誰爲臣計。臣之可歸二也。負三當免之責。二必歸之私。縱元后至仁。且容備位。而天下大議。於何可逃。伏望尊號皇帝陛下。念四輔之惟其人。憐一介之守其分。以量能爲哲。以從欲爲仁。特沛玉音。許能魁柄。俾全要領。得守丘樊。始終之惠兩成。公私之計偕允。況二垂面內。多士獻謀。師律漸精。治具尤飭。方當別咨英輔。速就大功。明黜叟臣。靡妨賢路。成命朝出。多謗夕銷。延素天關。企竚矜遂。臣無任

### 第三表

臣某言。伏蒙聖慈。以臣再上章。乞解重柄。特賜批答。不允。仍斷來章者。煩辭荐露。中詔報聞。仍枉慈音。卽停後啓。荷戴無量。涕泗偕零。臣某中謝。竊以明莫先於自知。勇莫近於能恥。自古通誼。爲臣大方。苟渝斯言。不可以訓。伏念臣材識。鷲下年力。尫殘。感慨宸恩。婆娑台路。惕日三省。未夜九回。蓋注意於安。則百度所脩。未臻至治。試可乃已。則七歲之績。果於弗成。戎醜其心。克邊民勤戍。執咎之職。匪臣曷歸。是以頓首屢陳於前。誦言必請於上。願還大政。以稷具瞻。而睿睿見私。朝議弗聽。抑此孤抱。廢爲空文。雖易戒三瀆之尤。而志矜一介之奪。敢煩欽誓。更賜裁俞。臣又念感會之來。纖介無憎。上則大明垂亮。免數辱之虞。下則同僚叶濟。靡不咸之隙。但以彌綸任大。僕遯智殫。高能召危。亢實詒悔。塗遠於日者。負將暮之責。形分於鑑者。致必窮之咎。此皆驗于已然。寧待多喻。安可以華皓餘齒。更昧自知之明。丞弼宗工。遂遠能恥之勇。伏望尊號皇帝陛下。量其盡力。推以至公。許還樞機。避賢者之路。賜全首領。敦大君之仁。早獲罷歸。是逃罪戾。必若砥鉛鈍。以嬰割。徒作庖羞。竭馬足而泛車。不爲御巧。言窮寢拙。心迫逾危。抑控天聰。矜聆制可。臣無任

# 景文宋公集卷第八十四

## 表狀

代楊太尉讓加節使第一表 見聚珍本卷三十九

同前上皇太后第一表 見聚珍本卷三十九

代楊讓加節使第二表

臣某言。臣近以併塵寵數。亟達讓封。猥奉訓辭。未垂順許。夙宵惟念。冰谷震惶。臣某中謝。臣聞官惟其人。受授存乎實。賞不可僭。輕重視其功。故師錫則勞。臣不疑。冒居則處。士橫議。大猷所繫。從古而然。切念臣一介非夫。兩朝善使。雖微幹裕。絕有它腸。承空乏於樞庭。速謗囂於鄉校。法宮雲構。偶忝使權。麗澤風翔。第膺賞級。蓋聰謀之抑畏。答大倣於高明。與物惟新。祈天永命。如臣無狀。爲國具僚。慮不先幾。事多遺策。至仁在宥。裁赦已多。詎可當憂勞之辰。自安過寵。味廉隅之守。以敗偷風。取身咎以不辭。玷國經而爲惜。伏望尊號皇帝陛下。酌於舊典。斷自清衷。俯念芻微。追還渥綬。示名器之尤重。俾顛債之罔加。祇竢兪音。用寧危懼。臣無任。

同前上皇太后第二表

臣某言。臣近以崇進寵章。輒騰讓奏。大言垂答。成命未還。慙震所并。啓處無措。中謝切念。臣材姿蹇淺。地望單平。獲對聖期。遂階樞柄。汲深綆短。自審於無能。材敗錦傷。慮墮於有典。伏值國家從周考室。嗣禹卑宮。獲贊事經。亟成丕績。惟當陽之引咎。因肆眚以翔仁。首眷近班。並推異數。鴻私交委。危懇匪寧。何則。密勿之司。體均休戚。彌縫之任。責在臣鄰。當九重旰食。以勵精。甯百執宴安。於受爵。上虧治表。俯畏人言。伏望尊號皇太后陛下。垂照危悚。曲全瑣質。重名與器。罔俾於官邪。收綍以綸。特從於人欲。儻道易盈之責。實銜再造之私。臣無任

代楊太尉加節使表 見聚珍本卷三十九

同前謝皇太后表 見聚珍本卷三十九

代讓樞密使第一表 見聚珍本卷三十九

同前上皇太后第一表 見聚珍本卷三十九

代楊太尉讓樞密使第二表 見聚珍本卷三十九

同前上皇太后第二表 見聚珍本卷三十九

代楊太尉謝樞密使表 見聚珍本卷三十九

同前謝皇太后表 見聚珍本卷三十九

代楊樞密加恩第一表

見聚珍本卷三十九

同前上皇太后第一表

見聚珍本卷三十九

代楊樞密讓邑封第二表

臣某言。比者甫屬勞還。例蒙進律。卽憑露奏。切冀回恩。嚴詔罔俞。危悚無感。省循甚然。啓處若驚。中謝。臣聞人食不浮。有邦所慎。名器爲假。先聖必書。是以祿緣德而爲差。賞待勞而作勸。君臣之際。進退至公。切念臣科自散材。本惟近器。當有道之日。而抱寧生之恐。在諸臣之中。而專石建之謹。遂邀誤寵。入幹鴻樞。大度見容。寸長未效。三事六府。交脩之訓。亟聞百禮千儀。法從之榮。斯極。方虞校議。貽損國經。敢圖捨爵之辰。亦預揚庭之告。峻升儀等。優食邑租。且夫器敗其盈。物衰於盛。假令有功可紀。尙當遵易退之規。況其何力于時。無容取疾顛之咎。敢茲再瀆。虔竢曲從。伏望尊號皇帝陛下。體天極之好生。法道先之善貸。保全舊物。開可德音。儻收已澍之恩。是免不濡之刺。

同前上皇太后第二表

臣某言。近以玷塵褒製。虔貢讓函。亟辱大言。未垂可報。慮食浮之損國。彌夕惕以裝懷。罔道有誅。吏期瀝懇。中謝。切念臣芻微衆驗。椎鈍自知。觀千載以開榮。蒙二宮之圖舊。遂階顯仕。或累寸勞。未淹緹筭之期。已正黃樞之署。洪惟聖旦。務講上儀。振萬宗祔之中。載耜坻場之左。而臣屬當景從。內慙寡聞。動有昆關。

之迷。居無伯始之問。睿明垂庇。責讓罔加。乘此策勳。例蒙席寵。益漢臣之高秩。增晉食之爰封。所宜拜嘉。以示殊獎。其如道路之論。憚莫懲嗟。犬馬之懷。不能無感。儻自安於異數。實取紊於彝倫。苟玷大猷。靡爲細事。伏望尊號皇太后陛下。詢謀衆采。俯諒丹懇。協議長君。賜停前授。使器有所極。無至於害盈。且功在不疑。何煩於惟重。獲依慈貸。庶克保全。

代楊樞密謝第三表

臣某言。再達奏函。願還明制。猥諭已行之命。且均寧僭之科。往愬莫伸。冒榮何幸。中謝。切念臣本微風績。偶會盛明。科自冗閑。迭階華要。譬之枯木。靡自先容。及乃秋毫。罔非帝力。遂謹一心之事。慎隨異物之遷。發于誠明。期貫夷險。至於諸葛應敵。臣則闕其所長。方叔有猷。臣則慙於未壯。樞員承乏。機務頗叢。屬容典之交修。顧建明之匪效。庶官強力。謹爾奉行。百度森羅。居然飭盡。實忽慙於無用。徒庇質於至明。敢冀勞還。首膺第賞。寵階凝峻。封宇便藩。懼受授之兩虛。控慈威而再瀆。冀收成命。俯穆大倫。寧謂絳靡還絲之期。爵存屬世之本。先加無狀。庶勸有庸。繫治典之化源。匪孤臣之私荷。寵光下賁。震抃參懷。斯蓋伏遇尊號皇帝陛下。普汜翔仁。保和樂育。業已升於四近。求無備於一夫。特假先榮。將權後効。敢不退求於己。罔伏攸箴。持守器於易盈。靜長柯於有隧。竭情夙莫。歸報涓分。臣無任

同前謝皇太后第三表



臣某言。昨以玷塵懋賞。祈丐還恩。伏省陳章。既殫於所請。枉音催拜。遂隔於由衷。承命若驚。省躬銜感。中謝切念。臣少緣羈蹇。獲對嘉亨。出無以蕃扞四方。入不足重輕九鼎。但以斷斷之介。蚤移於忠。區區之心。所守惟道。兩宮察乎少戇。三事悉其無邪。遂正右樞。仰參熙綽。朝家累盛。禮典懋脩。或恤祀以展牲。或勸耕而育穀。親奉至幸。法從爲榮。曾是慙煩。淺爲職業。漢庭故事。僅且奉行。魯廟多儀。疲於每問。外速諫官之謗。上貽有國之差。切免是宜。褒揚絕望。敢謂尊號皇太后陛下。慈均不冒。利篤廣生。因太寢以還衡。告外廷而席寵。進階近列。益戶大邦。繼昧死以上言。冀課功而責實。蓋高莫訴。虛授爲慙。敢不勵翼謀贊。襄戴采戒。園葵之爭利。敦皮弁之守官。庶詭微功。罔浮厚食。誓心有素。摩踵爲期。臣無任。

代人乞存歿臣寮納家集狀

右臣竊以周德之興。多文以監二代。舜華其協。好問而察邇言。爰歷古先。咸遵風軌。期有裨於治體。無容廢於誓詞。輒罄芻蕘。仰裨漏闕。伏念臣材惟闕茸。職本掃除。服君度之在寬。不汝瑕而垂采。曩者太宗皇帝。亮其愚訥。獎以寵靈。命臣充史館書庫都監。兼祕閣供御圖書。時屬聖念嚮儒。朝獻被世。旁求典故。備覽清閑。又命臣往江浙。搜訪遺書。眞宗皇帝。繼體不承。好生善養。洗其痕殿。秩以冗閑。伏遇尊號太后尊號皇帝陛下。祇遙珍圖。交修先憲。遺簪未弃。塗腹再加。又命臣同天章龍圖閣都監。臣委質三期。行年八十。鍾漏方盡。雖愧於夜行。塵露有施。敢忘於上報。臣嘗覽祕書目錄。伏覩自唐末至五代。其間有以文章。

取名當世者。咸存屬綴。列在緹緗。載册府以相輝。賁牙簽而有第。我國家承百王之末。披三代之英。師儒挺生。名臣輩出。或高文大册。爲廊廟之珍。或隱居放言。樂山林之志。從臣抒嘆。太史陳詩。炳然斯文。高映前代。然四部之內。編集無聞。一王之言。規篋安寄。使彌文不表。則至化弗昭。後之視今。闕孰爲大。臣今欲乞降聖旨。下中書取四朝以來存歿臣僚及隱逸之士。以文學顯名者。各許其人及子孫獻納所著家集。乃降下兩制詳定。若其深厚溫潤。可以垂著不朽者。具姓名聞奏。官爲給紙墨。差人繕寫三本。付龍圖天章閣太清樓祕閣收藏。足使增觀本朝。垂榮來籍。開元之目大備。有司之副可求。上以見文思安安。堯之稽于古。下以見賢士濟濟。周之所以寧。臣之至愚。竊爲深惜。且年祀寢遠。則亡逸滋多。今而不求。後亦隨廢。異日當使陳農訪舊。結馳傳之勞。河間購遺。軫補亡之慮。功相遠矣。誰曰不然。臣衰疾見乘。憊昧惟素。願留餘景。期觀大化之成。輕率狂言。或俟聖人之擇。越千程覽。伏待誅夷。臣無任

# 景文宋公集卷第八十五

表

## 代薛參政乞致仕上皇帝第一表

臣某言。臣聞公器至重。多取謂之假人。福嚮有涯。踰量以之招損。然則筋力非便。誼許其乞骸。鍾漏行休。禮容於得謝。進退之際。終始尤難。中謝竊念。臣門地本寒。材姿無筭。稟生懦武。逮長樸忠。慎異物以見遷。惟斯文之積習。偶比諸生之牒。遂代上農之耕。出入三朝。間關四紀。至乃與聞國議。參列禁廬。奉屬車之塵。法當得從。勸華光之講。席必爲前。接武玉堂之中。美食太官之署。稽古垂賜。爛其私庭。任子推恩。徧於家姓。聯官六卿之重。衍食千室之封。則假人之譏。上所悉矣。榮願云獲。私釁亦鍾。賤息天年。貳宗乏事。蓋由臣竊位無補。尸祿有初。腊毒庭貍。不能牢讓。葑家瞰室。自取降殃。則招損之由。驗於前矣。且臣少也多病。老而寢加。頃緣舐犢之哀。頓成鬪蟻之悸。足膝酸重。目瞳眊昏。營魂散離。強力虧替。則乞骸之請。臣得所宜。鄙人迂疎。伏生昏忘。兩宮之忍。致于理。二儀之務。好生。剝去浮言。儻開纖隙。禮居既進。恩與其終。則得謝之文。上宜開許。伏望尊號皇帝陛下。憫孤進之既耄。軫神罰之所加。特垂丐於餘辰。許上還於所職。使臣得生歸里閭。護視丘墳。安車之齡。收骨有所。茲爲悃悞。長累聖明。伏況七十爲致仕之期。九三据重。

剛之厲。議年垂及。知止在茲。儻諧初服於私門。是免喪元於昭世。援天至切。得請爲期。

同前代上皇太后第一表

臣某言。臣聞任重於才。官次速乎多謗。祿浮於分。鬼謀害其常盈。諒以盛之必衰。均朝暮之理。亢而招悔。在進退之交。將瀝懦衷。敢援茲誼。中謝竊念。臣稟生蔽朴。承學陋孤。感懷熙辰。玷塵清軌。自編民而振拔。辱累聖之眷求。多識舊章。絕希於胡廣。少知治體。敢望於夷吾。尺寸未施。寵光益契。伏遇尊號皇太后陛下。翊長君而在宥。統先烈以貫行。垂念皤皤之年。彌寬事事之責。獎其舊物。擢預講員。在博不勤。但欽於躋聖。據經而對。曷足以名家。曼歷歲時。寢成尸素。窮生有底。睿賜無涯。嘗於去春。啓辭近職。退藏散地。休息煩言。人欲未從。天私加勞。由冒升於寵等。更纏輦於身枝。臣有次男。素辨家事。使治菟裘之業。久居汝上之田。私闡下衰。壯年早世。臣病瘵既久。悲感見乘。結爲瘞昏。內攻肺腑。藐藐孫儒。空空室廬。薄此遠塗。更嬰窮罰。安可尙玷承明之祕。益重子臧之災。罹天薦瘥。爲國貽悔。願還章綬。退老丘樊。伏望陛下。按得謝之舊規。諒知止之深素。丐其暮齒。許以生歸。庶先犬馬之辰。不貽溝壑之擠。寬髦老於三赦。彌服上仁。從先故於九原。俾無私恨。叩關危苦。辭不及文。

代參政生日詔書賜牲餼謝表

見聚珍本 卷四十

謝加常山郡開國公表

見聚珍本 卷三十八

代昭文相公乞罷第五表

臣某言。伏奉批答。以臣累上奏函。乞解鈞柄。頻煩聞報。未賜矜俞。事却而心愈危。言窮而請彌訥。是使天無九臯之達。日靡三舍之還。內壅孤懷。久隔慈聽。敢違明命。卒布丹愚。臣誠憂誠迫。頓首頓首。臣竊惟操契課功。弗效而猶用者。不可爲善任。竭力奉上。已弊而不去者。不可爲愛君。誠以萬務關諸盛衰。四輔本之翼戴。統紀一繆。誚譟羣興。事旣驗前。理無冒處。伏惟體天法道。欽文聰武。神聖孝德。皇帝陛下。鋪明聖職。躋塞虜功。法周文之能官。體漢宣之責實。擢臣於平進。委臣以上司。七賀歲纏。罄效愚款。若乃戎夷儉猾。臣當撫鎮也。而西有不羈之酋。黎庶生聚。臣當親附也。而內多失職之俗。陰陽者臣所燮治。而精禘之變未除。州郡者臣所差擇。而嘉靖之風弗競。民瘥日薦。邦采月朘。加以私室生災。暮年多病。目眩心悸。髮禿齒搖。哆然一夫。隳我三事。而陛下雖有善任之德。容可獨私。老臣雖有愛君之心。詎當固位。此所以前後四啓。本末兩陳。亟枉褒言。尙欲留輔。伏思天意。誠有所歸。蓋慎始於終。則主乎恩。退人以禮。則示乎漸。猗違弗忍。熟復見憐。然念臣末路徂齡。自當必免。拙謀謬計。舉不容誅。伏以國事惟微。宗工難曠。早祈遂許。令獲退休。咨擇辰髦。協奮不績。於臣蒙知足之分。於國表黜幽之宜。所執不異前章。所干更無它理。控天自誓。觸死弗渝。延聽可音。庶寧憂慊。臣無任翹衷疊訴。懇倒屏營之至。謹五奉表陳乞以聞。

樂書局謝賜景祐樂髓新經表

臣等伏蒙聖慈各賜臣等景祐樂髓新經一册者。樂教通倫。茂昭於廣博。常言知選。鋪詔於本元。藹垂範以坦明。亟鏤方而流布。頒文肯泊。拜賜知榮。中謝。伏惟尊號皇帝陛下。保合在和。慎徽布度。凝瑞福於羣品。暢蕭勺於九圍。惟時右文。式克稽古。永言六代之制。未表五均之徵。治定在辰。財成有屬。先比音而立法。遂稽器而展聲。追乃鏗純。革其燠殺。乘書程之夜乙。問機緯之日孜。竝考前經。森條輿訓。由于及午。辨位六同。自駟得鶉。正名七列。討力華之餘韻。會祕式之經躔。案以旋宮。配乎感祀。推阮險之管象。較上黨之黍圍。度量惟精。金石乃定。爰表新書之號。俾資廣內之傳。倬爲章而可瞻。不愛道而臨下。以聲爲法。遂該禹律之精。甚德何加。方邁韶箛之盛。臣等俱緣惜學。叨直禁扃。窺述作之模。但欣游聖。躋太常之誼。潛誓服膺。仰陶監代之風。倍激丁辰之幸。臣等無任

代謝改官表

臣某言。月日。進奏院遞到官誥勅牒各一道。授臣前件官。仍放朝謝者。溝壑仆材。久從於病免。星闈華選。尙忝於序升。榮寵不貲。疋殘萃感。臣某中謝。竊念臣稟生祐薄。繼代門單。以一介之陋生。服千齡之聖會。擢從士伍。寢被朝猷。薦叨共理之良。蔑有萬分之報。貪天善養。食土何知。而臣自幼纏痼。頻年寢劇。去夏以攝生寡術。積損蚤衰。臥漳浦而沉緜。踰漢科之假急。移書言狀。待報去官。旋蒙詔綍之頒。俾齒京臺之籍。優其廩俸。便乃家居。內結病悵。久淪生意。敢謂尊號皇帝陛下。至仁溥鬯。橫施豐融。謂其犬馬之微。常

佩虎魚之重。拖紳中廢。忼日未終。因久次以推恩。獲外郎而增秩。寵生望表。位溢智涯。魄已散而復還。骨將枯而更肉。況臣率平強之力。尙畏敗官。屬影撇之餘。何勝誤寵。戴丘山之重恩。遡泉壤以猶生。儻幽錄之未編。期糜軀而上報。臣無任戴天荷聖。激切屏營之至。限以官次。不獲奔詣闕庭。謹奉表稱謝。以聞。臣某頓首頓首謹言。

代石少副賀南郊禮畢表

臣某言。伏祝今月二十八日南郊禮畢者。陽郊已事。邦節有容。列位均歡。綿區浹慶。中謝恭以享帝莫先於聖。報本莫隆於天。有國所脩。舊章惟允。走四海而來助。聿展多儀。閱三年而後行。舉無違禮。屬當盛際。昭憲先謀。恭惟尊號。皇帝陛下。天秉粹溫。時行剛健。紹休謨列之懿。同底方隅之寧。乘時尙文。賁雲章於天極。推懷布惠。淪膏澤於民心。法令詳平。吏治脩謹。遂使休光瑞應。同日竝臻。式勤讓善之方。以飭就陽之典。相惟羣后。鋪究上儀。殊庭左廟之嚴。前升乎圭瓊。厚地皇穹之重。合薦乎陶匏。敷侑席於層垓。煬高燿於紫宙。三靈交感。百禮具成。且復御象闕以嚮明。稽奮雷而肆眚。內策勳乎從衛。外疇賞乎方州。慶賞遂行。表裏皆悅。臣向叨近侍。今退私闕。苦整蹙之不仁。陪末行而莫逮。閑坊就第。但聆於穆之餘。法從觀光。莫覩猗那之盛。欣愉內積。距陌無從。臣無任

謝復侍讀學士表

見案珍本  
卷三十七

慰皇兄汝南郡王薨表

臣某言。得進奏院狀報。今月八日。皇兄汝南郡王薨謝。追封濮王者。沴罹棊鄂。悼結楓宸。置訃外聞。輿心中。忱臣某誠悲誠鯁。頓首頓首。恭以濮王承華皇籍。育德慶源。備王禮於三駢。首天倫於萬乘。表儀朝序。友悌宗藩。當延磐石之封。奄速壞梁之釁。伏惟體天法道。欽文聰武。聖神孝德。皇帝陛下。義深斯痛。情篤孔懷。賁泉壤以追榮。極典章而恤命。恩親茲厚。尊寵何加。伏斬理遣深衷。道齊達觀。割奈何之重愛。順有典之常經。臣限守藩符。阻趨廷陛。臣無任瞻天望聖。慘惻屏營之至。

謝曆日表三道

臣某言。伏蒙聖慈。賜臣詔書一道。并皇祐五年崇天萬年具注曆日一卷者。居卿雜候。列舍平分。定朔啓元。繫時訖歲。以財成於太史。用分授於庶邦。臣某中謝。恭惟尊號皇帝陛下。惟古與稽。前民致用。每當啟禋之末。豫謹來茲之常。迎步龍躔。昭集鶉尾。舉十二中之位。氣以絃來。列大小餘之差。閏隨月見。衍侯辟於封緯。竄禩祥於術家。本夏人正。兼漢時令。騰示縣寓。守此共規。恭聞言天者必驗諸人。惟聖能述。明時者先治干曆。俾世弗迷。仰誦頒常。允謂知本。臣叨分守瑞。豫拜賜書。啓簡揆辰。案文得候。示人以信。固無穀管之差。告朔有經。寧懼餼羊之廢。誓勤宣布。少答恩私。

謝曆日表二道



今月某日。進奏院遞到詔書一道。蒙恩賜臣至和三年崇天萬年具注曆一卷者。官惟底日。后以授時。迎歲前頒。綿區同稟。臣某誠感誠幸。頓首頓首。臣聞惟古治曆。求端在天。發斂有常。舒散來效。恭惟尊號。皇帝陛下。作聖於唐。與神爲幾。每緣班朔之常。尤推雜候之謹。預步盈縮。參注禴祥。岐分至而著之篇。條晦弦而舉其正。鏤槩流布。馳驛分頒。卽日行春。固厚長人之幸。異時流火。亶無司曆之差。臣幸守列邦。例蒙溫詔。敢忘紬繹。以味初常。

### 謝曆日表第三道

臣某言。今月四日。進奏院遞到詔書一道。賜臣嘉祐五年曆日一軸者。堯曆授人。舜璣觀運。寅敷時訓。謹示天常。叨備守臣。幸藏王朔。臣某誠惶誠感。頓首頓首。恭惟體天道。欽文聰。武聖神。孝德皇帝陛下。撫臨函極。愛育黎元。當四氣之環周。重五辰之軌順。清臺課索。黃道推迎。間翮忽以靡容。正閏餘而率定。旁探六家之祕。中參一歲之宜。雜候畢書。道占允驗。曲盡聖神之蘊。因知覆燾之心。溫詔下頒。列藩均被。臣方司幾輔。獲奉王正。拜君命以匪遑。審民時而皆得。謹當宣布。庶使遵明。臣無任云云。

謝乾元節表

見聚珍本卷三十六  
賀乾元節表第五首

### 賀德音表

臣某言。今月二十一日。馬遞到德音一道。以皇祐六年四月一日爲至和元年。臣卽時集官吏將校宣示。

并行下諸縣訖。有食之會。善曆前知。更始之文。上聖無憚。緣肇題於年紀。用普賚於黎元。飛驛疾頒。多方朋抃。中謝。臣聞天所以垂戒者。寓乎象。君所以應變者。本諸誠。故禹由罪己。以興。湯稱旋日。而感。古有茲事。今驗所聞。伏惟尊號皇帝陛下。挺高世之姿。撫下武之運。于命之不易。惟日之與新。以不戰屈屬國之羌。以重威纓老上之虜。足食而教。飭法號平。萬務信釐。億姓滋生。屬者步太陽之舍。在正月之交。言數則非有不用行之占。語時則固無自取謫之悔。陛下推美弗蒞。引咎益虔。舉徹常饗。朝避正寢。大肆多眚。復著首年。發積錢勞三邊之屯。閣丹筆降庶獄之死。臣伏讀聖詔。徧視曩篇。雖日主大君。時忌孟夏。然所次異者。厥證從之。或分野饑凶。或臣下譴負。氣兆豫動。躔晷昭垂。非專一人獨主斯應。陛下弗覩災以釋懼。弗恃治以忘謙。就朔改元。因事修改。臣又聞神雖在上。鑒不遠顏。必且畏德還威。轉沴爲祉。有因晦不現。有當虧而完。敢煩有司。顯竚不貺。臣違去從囊。方荷守戈。竊誦恩言。愈欽盛際。臣無任戴天頌聖。激切屏營之至。

賀日蝕日降雨表

見彙珍本卷三十六

慰溫成皇后大葬表

臣某言。得進奏院狀報。十月七日。溫成皇后大葬禮畢者。椒壺上賓。梓宮永闕。恩厚泉窆。慘結邦闈。臣某誠哽誠咽。頓首頓首。恭以溫成皇后。肖順坤元。倪異天表。內輔柔教。旁翊鴻機。大練有以自脩。彤管不可

勝美。宜享難老。遽及冥升。伏惟體天法道。欽文聰武。聖神孝德。皇帝陛下。厚眷賢家。追正慈極。卜建園寢。近負都城。匪棘而緩者。俾守常經。弗奢而儉者。以成遺志。復土斯已。納主方初。然情與文殫。則哀隨日遣。望申悃悼。彌舍粹純。俵祝宸殿。飛越心爽。臣限總軍務。不獲奔赴闕庭。臣無任瞻天企聖。禱係屏營之至。謹差本州都知兵馬使呂從奉表陳慰以聞。臣某誠哽誠咽。頓首頓首。謹言。

賀正表

臣某言。伏以初建寅辰。日纏營室。夏正啓序。品彙鼎新。漢殿受圖。華夷輻湊。臣某誠懼誠抃。頓首頓首。恭惟體天法道。欽文聰武。聖神孝德。皇帝陛下。紹統熙洽。凝神穆清。憲泰象以相宜。體乾元而邁德。民歌舜日。世浴堯仁。丕丕寶圖。衍鴻休而增熾。簡簡祕祝。乘慶序以叢休。臣叨奉邦符。恪司藩輔。頌南山而拜壽。莫參翔鷺之聯。企北闕以馳魂。徒鬱疲鷺之戀。臣無任瞻天樂聖。激切屏營之至。

謝轉左丞表

臣某言。三月十八日。進奏院遞到官誥勅牒各一道。以臣同脩唐書成。除臣尚書左丞。依前充端明殿翰林侍讀。龍圖閣等學士。集賢殿脩撰。尋具奏陳讓。今月八日。奉答詔。不允者。冒榮而受。撫己增慙。臣某誠榮誠感。頓首頓首。伏念臣曩與諸儒。共刊舊典。羸使在外。哀藁自隨。十有七年。書乃絕筆。伏蒙尊號皇帝陛下。弗責其緩。止錄所勤。外嘉終篇。例詔增秩。臣實無狀。輒用固辭。而成命已行。如汗不返。衆力相藉。孤

讓難從。永惟劇司。是號中轄。臣敢不以瘁補拙。勉懦爲強。一得一酬。九殞無憚。臣無任戴天荷聖。激切屏營之至。

代石太尉謝令安州照管表

見聚珍本  
卷四十

代謝加朝請大夫表

臣某言。今月十三日。進奏院遞到官誥一道。勅牒一道。蒙恩加臣朝請大夫護軍。餘如故。仍放朝謝者。緣函霈澤。方均在宥之仁。繁素裁書。遽被策勳之典。祇荷若驚之寵。深懷不克之憂。臣某誠榮誠抃。頓首頓首。竊以周命庶官。第九儀而詔爵。唐徵異數。由十二以進階。所以褒職業於宗工。辨等威於朝著。官無速謗。乃堂陛之克崇。名或假人。實負乘之可畏。如臣者。凝猷素寡。治行無聞。臨遣大庭。蔑著惟良之譽。奉揚寬詔。頗淹報政之期。屬以樞燎告虔。星雞肆眚。給薪除地。曾微扈蹕之勞。加律麟庸。濫預乘軒之賞。紆細札十行之旨。兼散官五品之榮。夫何葦芮之材。亦被厲鴻之賜。潁川加秩。誠有謝於褒揚。宋鼎益恭。誓無忘於俯僂。庶勵夙宵之志。用酬覆燻之私。

代謝加勳表

見聚珍本  
卷四十

代上皇太后謝出外表

霈發天旻。澤流巖槁。內循享會。罔寘情涯。中謝竊念臣一介孤生。兩朝誤寵。無裨王度。有玷官成。再躋架

浪之居。繼掌隨風之命。司馬素遲之思。動或淹時。倚相能讀之書。老而彌忘。且以稟生多病。仍歲勿支。匪服成災。療官在慮。乘霜露之邪隙。動冰炭之夙痾。結爲沉緜。損其強力。臣亦上體洪造。思致小康。經熊鳥以養和。觀龜頤而考吉。移書請告。咨委於攸司。瞑藥攻中。寢成於淹臥。迭陳囊啓。求假郡麾。危心苦言。援天非一。至仁大度。藏疾已多。賴祝網之在寬。輒竄漳而終請。豈謂伏蒙尊號。皇太后陛下。蓋高垂聽。善貸均慈。恕及蠢愚。罄無底裏。許中停於辭禁。更推進於官聯。寶構清司。使符重寄。併爲烜赫。垂逮厄殘。矧惟此邦。臣之舊治。周知風土之樂。具存條教之規。庶盡力於某年。竢有痊於癘瘵。復瞻不幸。仰謝大恩。勉於未死之前。奉乃彌文之化。私悚所誓。淪髓同深。原本此下佚。



# 景文宋公集卷第九十六

原本卷首  
二頁佚

## 序

春日同趙侍禁遊白兆山寺序見聚珍本  
卷四十五

送薛嘉魚序

見聚珍本  
卷四十五

登科記序

見聚珍本  
卷四十五

送同年吳昌卿之上元序

江南地方數千里。士子風流出其間者。有吳氏昌卿十三官焉。昌卿蚤孤。事母以孝聞。務時學。敏。廢天尊。爵。身在江海。名動京師。天聖初元。挾策西土。歷造鉅公。暴其素蘊。倒屣握臂。一旦在諸生右。由是士類欽挹。獨映當時。時僕亦以先人牛馬走與計南闕。既忝相如之至。遂並田蘇之游。而朋儔後生。往往竊借其名。以爲光寵。初。昌卿少而好賦。每私勒十題。終朝而畢。及異試之際。少選成文。欲勇者。賈其餘。游刃而滿於志。俄署太常高第。調主袁之宜春簿。甫一歲。丁內難。輒去官免。服闋還臺。會縣官以拔萃之科。高選英俊。昌卿卽及舍里旅。閉戶不出。而自春涉秋。言成數萬。猶介士待鼓聲而奮。博者臨蒲齒而竦。適會有司以考限斷。昌卿遂觸報罷。再佐邑於昇之上元。朝髦野賢。咸爲愾歎。君方奉檄欣如。趨府儻如。成虧之間。

不槩冲氣。則細故祇悔。胡無自入焉。是行也。春江溶溶。春山蒼蒼。羣鷺鳴呀。雜花幡舞。晨征夕次。明晦萬景。足以傍三戶之牢愁。據六朝之雜擬。古者歌詩必類。輒聲而系之。山之陽兮水濱。擊吳榜兮行人。霞之朝兮露夕。隱阱側兮思君。愛不見兮搔首。江浮天兮共春。

慶曆兵錄序

見聚珍本卷四十五

元太守待告南陽襄葬送行序

太守元公。以絕俗之姿。邁協華之運。用鄒魯之經術。始焉筮仕。因田孟之長者。終以立名。筵胄席以聯官。剖錄符而出守。加以博練前載。淵通治體。盤螳封而不跌。舞桑林而中奇。陟降丹塗。習聞三尺之律。臨遣黼座。親奉十行之文。故公之下車也。拯頽綱。究雅俗。廉問民瘼。而豪桀不能擅私矣。視原田。正經界。督課作。而稼穡不可勝食矣。班寬大之令。民咸知於上意。削靡密之教。吏自飾於儒雅。風由上而化。下雨我公。而及私。葦年之間。一境不變。先是。公迫官牒之執掌。闕宰樹之營卜。日月其除。寒暑載離。企彼南陽之田。是有東陂之產。由是愴露霈岡極之感。岡雨裏有進之業。奉需頭而誥請。因遞傳之載馳。精懇上聞。俞音遣降。越金素之彫節。揭風旂而首路。肅四牡以出餞。統五鼓以戒晨。醜奠旅陳。簪紳舉集。客有奉觴於公。前而言曰。聞夫立身以明義。事君以展體。顯親以盡誠。古之道也。若公之素風冲和。瓊意完行。鳳覽德以來下。鴻漸陸而爲儀。藹藹嘉猷。式是王國。穆穆休問。賓厥帝門。則身可以謂之全矣。敏政勤化。首公勵節。



緝素絲之五絨。粲羔裘之三英。固幹事而克終。經布常而有藝。則公之事君。可以稱其至矣。赫赫閭里。結廷尉之駟。森森松檟。開京兆之阡。東方之騎。按道以千餘。西京之車。會葬者數百。有道之碑。無愧石君之孝不衰。則公之顯親。可以言其終矣。若乃東漢鬱葱之神壤。南都麗康之雄輔。晝衣錯繡。宴棗揮金。楚老壺漿而出迎。蜀令弩蘭而前引。累茵而坐。季由之感無窮。望寺而趨。張湛之恭斯在。萃是衆美。爲龍爲光。卓哉昌辰。仰止耆德。如斯而已矣。逮夫白日馳陸。涼颼動天。騎竹之童。僊細侯之歸鞅。熟芝之檢旌。黃霸之治功。於斯之時。然後觀其榮也。某恭梓攸託。占藉有初。庇雲蔭以居多。偃風聲而素久。粗訂輿誦。深愧不文。謹序。

相國張公聽普印昕師彈琴詩序

樂家有琴也。於古差近。釋子悟禪也。在法最勝。勝法難喻。古聲難調。二者合以相資。此昕師之鼓琴也。相國清河公鎮許昌之初載。帥以領忘言之契。有命駕之行。聞其清靖。參以冥坐。心照云舊。法樂甚歡。於是乘艾夜之閑。投蘭言之隙。思有以音聲佛事。蕭散天弦。竦神承流。深根寧極者。莫尙乎絲桐之樂。乃進而御之。旣一再行。相國洒然而喜。顧謂四坐曰。夫聲緣器至。器乃假合。和寓聲現。聲本虛空。若夫据大和以親琴。特朽株枯木。自解脫而論法法也。皆駛月行舟。道要盡然。吾聽止矣。因爲詩以貺師。其亂章有彈意忘琴之句。所以逗機爐雪。遁迹魚筌。彷彿大方。脗合真際。師亦躊躇滿志。推琴而視之。它日予與觀。

焉。竊美公以左槐直宰，回入佛乘，徑登之如此。又嘉師以安弦軟音，動蕩天倪，造適之如彼。是用敍作者之意，以冠其篇云。太常博士直史館廣平宋某。

淮海叢編集序

詩爲天地縕，予常意藏混茫中。若有區所，人之才者，能往取之。取多者名無窮，少者自高一世。顧力至不至爾。然造物者吝之，其取之無限，則輒窮躓其命而拂戾所爲。予略記其近者：王摩詰顛於盜，愁苦僅脫死。杜子美客巴蜀，入沅湘，寒飢不自存。李太白踣於貶，白樂天偃蹇不得志。五十餘分司，元微之爲衆排。迨終身恨望，劉夢得流檣抵老，弗見容。是皆章章信驗也。惟山林方外之人，亟索亟用，天不能扼其數，以無求於世。與道徜徉者，耶？予友梵才吉公，其人歟。公資能詩，始來京師，以高言警章，與士大夫相酬謝。士大夫爭從之游，名徹天子，故錫命服師號。師亦以寵爲侈，遂以南方菴天台凡三十年，年愈高，學愈精。自瀏東西，山溪鳥魚，草木風雲，人事法集，靈所怪區，一物一興，瞻公之思，不能給而告疲焉。可謂取其蘊多矣。公又挾惠力自在，天果不能扼之乎？故前後所著踰千篇，分目數集，所謂淮海雙編，其第三集也。屬予以敍，公之得誦，人口貴人紙者固多，不待僕贊。旣顯矣，雖然，願一言焉。公之徒若有辯如淨名者，或呵公以外學自鄣，公云何而默其呵，使予釋然云。

送承制劉兼濟知原州詩序

前年党項羌叛。乃今正月。穿當路塞。劫餘種將十餘萬騎。犯高奴。入金明。於時侍中劉公提卒不萬人。徑薄賊壘。屢鋒苦戰。所殺過當。虜勢蹙。欲引去。會小吏不肖。引師擅還。賊乘我虛。侍中伏節而殞。朝廷赫然。憤悛寇之味。惻然憫師臣之亡。錄孤厥冊。哀顯存歿。仲弟寶臣自龍竿戍召入。問破賊方略。寶臣頓首雪泣。願得自當一隊。腦王庭。張天聲。以復家仇。帝偉之。卽詔以二千石守朝那。給上臺千兵。光寵帳下。寶臣邊事甚悉。出入凡三對。論兵數十章。鋪陳切懇。多得要領。上未嘗不稱善。而寶臣亦自以感遇不世。故忼慨而誦言之。既六月。引軍而西。諸公嘉其行。長言以餞。又俾僕序所以必類之意。以寶臣之才之傑。奉廟筭。據憤謀。與羣帥協力。而侍中之靈。又且相子。彼先零百年餘運。何懼不克邪。月捷三馳。賦詩者之志也。凡若干篇。列如左方。

### 崇祀錄序

臣聞。遂古之初。民神不雜。雖有所報。未稱禮文。及夫黃軒之接萬靈。姚虞之類上帝。南正火正。述乎世官之常。祭義祭統。表乎諸儒之論。國之大事。粲然著矣。其後馬遷之書封禪。班固之志郊祀。多儀浸講。前載益詳。施及歷朝。更相祖襲。是以歲禱冬賽。祠官之領可求。經入咳數。天子之奉逾廣。蓋有道則監之在德。叔世則狎而不獨。有唐之衰。五代無象。嘉生湮鬱。祀族僭差。極乎亂階。啓我亨會。於赫太祖。以甚武戡難。擁監觀之呪。饗帝是皇。思文太宗。以明德保邦。謹馨香之治。制神不瀆。聖上纂大維烈。重離有光。寶妙道。

之儉慈。域庶物於仁壽。忠厚躋格。殊尤碎隱。由是東緘瓊噤。除道仙閭。右瘞鼎鼐。敲景雲極。帝命攸式。天載寶通。揭盛典以垂榮。亘淳烈而長世。臣比在冗局。頗志舊章。伏念三聖相承。五紀而遠。文物增損。百度之品。蓋多。詔符燹積。一王之範。當考。且開元之代。既爲通禮。而韋公肅續。譔禮閣新儀。王涇又爲郊祀錄。補備其事。國朝惟有開寶之禮。無它譔述。誠恐官成。抗守。年所屢更。青紫失傳。尊俎潛越。願褻王制。嗣祀信書。亟蒙開可。俾加論緝。又詔戶部郎中知制誥臣李維。太常博士直史館臣姜嶼。參相典領。未遑卒業。自屬爲邦。繼以二臣兼總。它職。畏官之曠。編削淹期。蕪札雖存。羣條靡立。逮茲閑外。始復講求。於是興建隆之元。據開寶之舊。先列凡例。明常制也。次張題部。俾從類也。篇有引述。原乎大本。取徑要而易知。注有援證。包乎先代。務覩縷而曲暢。至於太僕之牢具。司農之蔬膳。光祿之脯果醪醢。少府之器服。圭品。奉常之粢稻。太府之薰幣。將作燧鑑之給。司天日時之告。祝史冊信。撰工樂章。壇墀以垓級爲差。攢題以位置相準。因事示法。附義生文。比次有倫。擗撫無間。其實錄之體。固靡尙華采。備有司之傳。故自成新制。輒緣崇祀。以冠書名。析而第之。爲二十卷。有以知金玉制定之當。黼冕致美之虔。多物與稽。能事云畢。周禮盡在。無待太史之觀。漢儀可推。當留博士之藏。臣衰茶有素。紬繹罕工。絕筆冒聞。魂爽震越。謹上。

# 景文宋公集卷第九十七

序

江上宴集序

見聚珍本卷四十五

宋同年劔池編序

見聚珍本卷四十五

王參預詩後序

扶風馬蕪仲康與伯氏張建維自弁髦之齡篤常跗之愛業成門內名動京廛當時聞人多與游處咸平癸卯歲嘗奉世父官於越絕會今參豫清源公以危言大對克厭上心擢佐著作郎宰邑定海士流蘄嚮號登龍門時仲康弟兄雅欽公名悉索素蘊振褒衣脩矩步以士相見之禮願知於公公一覽其文厚爲嗟挹亟作詩一百四十言自題烏欄以遺之勗其大成許以遠到陽秋一字蓋重褒衣之褒機雲二賢遂結錦囊之顧其後建維以真宗上封之七年由進士第歷曲臺終博士仲康以今上初元之二年繼升奏籍相望雲漢穆如墳廡信夫東國人倫之不誣高陽才子之無隕者已仲康銜玉音之賜闕鈞婉之蹤且念巾箱久藏雖五經之均愛懷袖勤玩虞三歲而或滅非就山珉之刻易訂家楹之傳謂僕比牒同邦丐辭裁序因歎博士君未終公惠而無祿早世安昌入相罔竝卮酒之歎子夏言詩姑誌師門之舊勉述顛

未附之左方。

南陽趙叔靈集序

見聚珍本  
卷四十五

送英州理掾詩序

沛國十四舅再調爲英州理掾。過辭於予。客有惜其去者。私於坐曰。子嘗言舅家之才之邵。可爲國華代寶。今縱未能躋高爵。激卬萬乘之君。猶當爲三輔高選。奚以之萬里而南爲。予曰。夫所謂德全者。得喪喜懼未始入乎胸中。彼宴安腊毒。皆囿於物者也。今夫泰山之雲。卷之在膚寸。舒之徧天下。和氏之玉。始之爲廟器。捨之倫砮硃。當膚寸與硃砮。若怒且呼曰。我必徧天下。爲廟器。人方以爲不祥且怪也。之人也。之德也。寧容以道里遠近。祿粟薄厚。繫然以自辯哉。是其爲德也全矣。姑見夫辨嚴在旦。臺閣諸公皆賦詩申贈。以見鄭志行矣。南方寬柔。獄無留事。數擊鮮進醇酒。休日則陟神區。探奇絕。徜徉乎天倪之地。以外物之累。寧不綽綽有裕哉。客曰。善。宜以序。明日遂行。

送賢上人歸山序

見聚珍本  
卷四十五

送張端公轉運兩浙序

見聚珍本  
卷四十五

送張都官知兖州序

見聚珍本  
卷四十五

送刁君績赴蘓臺序

見聚珍本  
卷四十五

張相公御賜飛白書并進歌答詔刻石序

慶曆二年秋八月。皇帝御飛白書千歲二字。賜大傅鄴國公。公既下拜登受。卽進歌一章。發舒懿藻。列榮遇之懇。翌日有詔。所以褒答甚厚。公欲侈上賜。夸代珍。乃索完青。以鑄以鐫。披天侔采。與辭借永。又俾愚題序歌右。庶得其詳。恭惟神筆之況。有似重師。臣而光惇策歟。夫千歲者。延紀之盛期。爲壽之極言。雖老彭之養。聃史之隱。未有過焉者也。且賢人之生。率五百歲。謂之命世。及默契答宰。感會天人。則一遇之罕。謂之嘉會。皇意若曰。公由青宮調護之舊。身翊飛龍。手披叢雲。三爲大丞相。劬勞王室。年艾功成。以安車就第。奮斂謀謨。完爲大和。扶輿陰陽。回入難老。故因所遇之運。而以其數錫公。進陪命世。超十期頤。惟公饗之。實帝命之。昔史克之頌僖公也。其輯曰。萬有千歲。眉壽無有害。陋藩涼德。空言不情。猶逾鐸採焉。託于聲詩。寧若自天子所發。爲褒祝。日珥爛乎家。星鈞灑於毫端。從古以來。寵遇始終。未有二公者矣。至於容姿攸縱。聖蹟冥符。則具素聞。知狀足於詠嘆。此不申頌云。





# 景文宋公集卷第九十八

## 說錄題述

鴈奴後說見聚珍本卷四十八

舞熊說見聚珍本卷四十八

酺說見聚珍本卷四十八

字說

高祖紀七年春令郎中有罪耐以上請之。應劭注曰：輕罪不至於髡，完其髡髮，故曰耐。古耐字從三，髡膚之意也。杜林以爲法度之字皆從寸，後改如是。耐音若能，如淳曰：耐猶任也，任其事也。師古曰：依應說，耐當音而，如說則音乃代反，其義兩通。耐，謂頰旁毛也。三，毛髮貌。予以顏氏之說，似不審應音，及誤引許慎說文，不了其義，更有兩通之語，且耐無而音，止於乃代一音耳。案古者能字皆作耐字，亦取堪任其事之意。後世以鼈三足之能爲能，故今人書能無有作耐字者。應云耐音若能，此能鼈乃是三足能之能，能耐自然聲近矣。本不爲而音也。顏氏云而謂頰旁毛，案說文自訓而字爲頰毛耳。象毛之形，至耐字直釋云罪不至髡，則顏氏謬應意而誤說文，其失明矣。

王杲卿字說見聚珍本卷四十八

錄田父語

歲維孟冬。京縣大穰。戶既還定。鄉無捐瘠。室家湊湊。厥聲載路。於是先生命從者具柴穀。適野而觀之。汁者滿筥。稻者如茨。饑者弗仇餉。鋤者無德色。糴不閉隣。輸不爭承。欣欣然以盡四友之敏。先生乃揖田父。進而勞之曰。丈人甚苦暴露。勤且至矣。雖然。有秋之時。少則百困。大則萬箱。或者其天幸然。其帝力然。田父俯而笑。仰而應曰。何言之鄙也。子未知農事矣。夫春膏之蒸。夏陽之暴。我且踣跣。竭作。楊芟梓中。以趨天澤。秋氣含收。冬物益藏。我又州處不遷。亟屋除田。以復地力。今日之穫。自我得之。胡幸而天也。且我俯有拾。仰有取。合鋤以時。衰征以期。阜乎財求。明乎實利。吏不能奪吾時。官不能暴吾餘。今日樂之。自我享之。胡力而帝也。吾春秋高。閱天下事多矣。未始見不昏作而邀天幸。不強勉以希帝力也。遂去不顧。先生引車而歸。從者曰。夫子何讓也。我直彼曲。請得還辨之。先生曰。不可。淺丈夫悻悻然盜天功。以私己力。乃自記之矣。奚獨父之誅焉。

壽州西園重脩諸亭錄

州治下蔡八十載。天守牙居。惟有黃堂便坐。與吏民賓客相見。無它觀游。庸息我私。前人或指是爲傳舍。不一二歲。且去矣。亟我勞而遣人逸乎。訖不肯營。予友集賢王君子野。以景祐三年始來領州。陋前之爲。

不藏其言。乃取四偏隙地。袤三百弓。治而園之。破麀場。蕩虺區。荆蕪蒞榛。百板以興。巖然而高。於眺望宜。則以爲亭。奧然而幽。於息偃宜。則以爲堂。析置八區。疊棘相望。不決沼沱。平䟽圃畦。射焉有棚。庇焉有榭。取材於官。役不逮民。春秋以展地主之勤。歲月以休公家之勞。禮成事時。身有餘佚。州人駭觀。嘆美一辭。自是署制劇雒。它邦不若矣。當此時。子野以治績聞。號爲異等。由是觀之。繕葺燕居。果不害於爲政。政之不立。雖有廷內。尙惡乎興。慶曆初年秋七月。予待罪于茲。距子野之遷。歲才四舍。其間凡五易守。而前之皆宇。皆土。圯木撐。階塗缺殘。罅風濺雨。壓焉有漸。非來者不善繼。蓋不暇已。予也幸而暇。其明年。因得新之。壞者支。蠹者鮮。沓者夷。汙者浚。潛奇伏妍。一日並還。庶乎子野之志。及予而大備。嗚呼。人之言。吾廩帑是力。刀筆是總。苟獲濟矣。容膝之爲多。尙何務爲是舉。不知君子之道。且先王域民也。四惟士以間宴處之。高明輪奐。各有宜適。仁義之所談。教化之所謀。體神胖王。乃能自力於之。況吏二千石。居峻制嚴。表的千里。偪而無差。如等威何。予是以見人之言。與子野之道。得失有間矣。初。子野落成。石君曼卿鑿石紀其詳。及予完復。亦用史臣之法。謹時月文。以忠告之。誼詔後來云。

西州猥藁系西州詩今分類在此集內見聚珍本卷四十八

題司空圖詩卷末

唐司空表聖。隱虞鄉之王官谷。唐亡。表聖死。無子。家書湮散。後百五十三年。直宋嘉祐歲己亥。武威段繹

得書一卷。示予曰。表聖私藁也。紙用廢漫。字正楷。凡詩十有二篇。此世所傳表聖筆。其真不疑。繹以重番。治背。髮軸錦護首。粲然若新。其勢不數百年不泯也。噫。表聖賢者也。以其賢。故一物一言。爲後人愛祕。若此。寧當時之人舉不及後人之知表聖耶。是不然。同時者。相。異時者。慕。尙何怪哉。繹得於虞鄉尉孫膺。膺得于谷口民張。張傳之祖。祖嘗爲表聖主閣云。廣平宋某記。

福嚴院棟杉述

見聚珍本  
卷四十八

# 景文宋公集卷第九十九

論

有若論

太史公仲尼弟子傳稱孔子既歿弟子思慕有若狀似孔子相與共立爲師他日弟子進問云云謂月離千畢及  
商盟年長無子事者有若默然無以應之弟子曰有若避之此非子之坐也予嘗推本其文此殆鄒魯間野人語耳  
若夫多能攸縱淵泉博厚與日華天極不可階而踰者此固卓然異稟理絕夷等生人以來未有如之者  
矣及夫天不懋遺人將安做服膺之徒悼惘無所則尊其言而奉行之可也敷其教而懋明之可也寧待  
索目皮之肖似席師訓以咨決振衣避席北面而事之使弟子皆愚人也則可若其少知一體寧不謂之  
痛心哉夫蜥蜴似龍不以御天砮硃象玉弗容禮神萍實擬日羲仲面之寓木偶焉僕夫云之何則眞假  
有區甚愚能判狂聖殊品惟材誰強今乃遁道德之實据形髮之僞扳而立之質而遂之是先聖宜被竊  
玉之誅案陽虎竊寶玉大弓仲尼貌似陽虎項羽可膺降媿之錫舜重瞳項羽亦重瞳優孟足俾相楚孟似孫叔敖也虎賁亦當佐漢虎賁狀似蔡邕  
魯多君子一何勃哉是使在三之義永廢於師嚴無服之喪下同於儒戲昔周思召伯猶能愛樹越求范  
蠡因用鑄金自假物以懷賢非望人而責實較之茲事不以優乎及觀孟子書亦云子夏子張子游以有

若似聖人。欲以所事孔子事之。強曾子。曾子不可。曰。江漢以濯之。秋陽以暴之。皜皜乎。不可尚也。已。由是而言。則始嘗謀之。後弗克舉。又安有離畢亡應。商瞿乏對。撤坐攘臂。事之弗終之論乎。古人多失實於傳聞。此其驗已。

和戎論

見聚珍本卷四十四

蕭望之論

見聚珍本卷四十三

# 景文宋公集卷第一百單一

## 雜文策題補詞

對太學諸生文

見聚珍本卷四十八

### 策題三道

問。兵之設久矣。雖甚盛德之主。未有不養威蓄衆。以平亂略。制民謀帥。以經王事。而能保鄣萬寓。震疊四夷。乾剛雷聲。莫我之禦者也。故昔之高才上哲。謀臣猛士。度攘宄之隙。稽奇正之本。著書定策。列于家流。祖述相因。風烈如在。然考其言。則煥同善。蔡質于事。則或若筵楹。略舉諸凡。且會而要。蓋聞萬人之命。繫于擇將之善否。則國之安危。必取其練。韜鈴之謀。敦詩書之奧。多識前載。弗由中御。乃可以克敵制勝。尊主庇民。然則絳侯少文。功高漢籍。成安大儒。身燬泚壘。去病不學古法。實破匈奴之強。趙括能讀父書。無揀長平之禍。由斯而談。則後之習孫吳祕術。曉張韓所次者。又奚益哉。至若周以卒乘而王。仁術也。秦以功首而帝。霸事也。何車戰遺法。墜而不復。爵級近賞。行之猶利。將姬公聖制。泥于遠。商君暴政。通于今邪。抑又聞之。弗教謂之弃民。居安不可忘戰。故國家內有五營七萃之衆。外有迺屯乘鄣之師。時無春秋。訓以鉦鼓。因彌縫偏伍之法。爲擊刺坐作之容。督責有程。部曲不懈。而論者復以爲平居則案圖易習。臨敵

則因事難期。今欲捨陳迹而弗由。則練兵無本。蹈前言而必用。又應變或踈。質乃武經。孰爲彝法。今當商  
情前志。細發壯猷。總文武受任之殊。酌古今養生之便。其安也何教而善。其用也曷舉而宜。上體好問之  
心。並陳有備之戒。熟復條悉。遲薦于朝。

問。羌賊叛命。甚逆天理。揚埃殺馬。盜掠邊人。烏鈔豬突。輕進易退。而疆場之吏。習練未明。決者貪功。懦者  
撓敵。出入五載。未有成功。遂使僞惡游魂。自謂得計。虐用部種。多罪貫盈。兵到其頸。晏然未悟。朝廷愛重  
黎庶。不欲窮追。止遣師人。嚴護亭堡。然而餽餼之費。苦於無涯。屯戍之勞。未有云訖。衆君子講習妙略。發  
憤上言。故陛下垂詔有司。引訪參欲以申□。考長冊。俾無遁謀。衆君子其定志悉心。孰復研究。且豐則足  
食。用兵之本也。請先計遺利。以佐軍興。夫茗鹺酒稅。權於縣官矣。而賈販告匱。歲課不充。今將流通轉貿。  
官司交利。如何爲法。銅錫冶鑄。化爲法錢矣。而小屋儲積。官帑爲虛。將發出滯留。變動萬貨。如何爲制。賦  
車籍馬。行師之急也。請博詢前古。以便當世。夫十萬爲率。步騎相參。今若舉而出征。則輜重駄幕。幾何而  
足。菽粟芻程。幾何而計。風雨暴露。何以蔽障。營壁屯置。何禁侵掠。又如坊牧閑監。畜馬以時。而官吏不肖。  
歲朶月削。昨緣乏用。賈於民間。材非閔佶。類不堪戰。今將蕃牧奏隴。按求唐法。則慮爲虜侵。宇畜鄉亭。遵  
用漢制。則未救時乏。並陳長利。無諱攸司。至於兵家之書。久應論計。地有九種。悉載等差之名。陣有八法。  
各陳施設之要。能悅禮樂者。旣稱謀帥。不學孫吳者。亦自立功。兩端異焉。并爲詳確。遲聞該洽。升薦諸廟。



問。大事在戎。常德立武。安天下者。固不可以忘戰。言聖人者。非得已而用兵。是以咨之輿論。擇之多筭。伐謀制勝。經武定功。今諸生章騰公車。身待南闕。講開方略之日舊矣。上使有司廷試。問所欲言。固當怛臆。感槩。條陳科別。勿并勿遽。明著于篇。國朝軍制。近沿五代。外籍廂校。內列禁屯。無歲不踐於更。無日不討於教。指麾部分。可謂素辨。然或臨機逗撓。違律否臧。且罪隸刑徒。漢驅以鬪。賈人營婚。秦悉備行。未始選鋒。悉能破敵。永惟其事。頗用致疑。何彼之不教而勝歟。吾之豫訓而負歟。周魏府兵。號爲有法。隋唐並用。課效甚明。今欲求六馱之舊章。倣八柱而參帥。詳言舊制。折衷新規。夫策待應機。軍不中御。而曹氏署教。逆料合淝之攻。宋祖封函。直禽外水之戍。盡去陣法。反敗達頭之師。追復車戰。更詒陳濤之屨。法與事戾。一何遠邪。且如觸往亡之凶。何城實克。犯甲子之忌。何主實興。折壓沈水。誰卽破奔。飲酒變血。孰應擒馘。日辰弗驗。刑德奈何。至於聽同律之聲。若爲取驗。驅熊羆以陣。胡法使然。駐隊鋒隊。進退之所宜。圓陣方陣。施設之安在。四機行軍之要。十利用騎之能。夷吾三官。必將備物。晁錯六地。各有便兵。承天之邊。要奚先。王昶之治略。疇急。欽遲良誨。升薦諸朝。

補監生牒詞

國家崇飭儒業。招徠國胄。厥脩典學。俾趣大成。屬當著錄之辰。茂謹程能之式。備觀廣業。咸序俊名。噫。申錫百朋。旣善循於聖域。賓興三物。將大對於王庭。盍各良圖。以副褒然之舉也。

補進士李孝嗣充州學講書詞

夫子之意藏於經儒先生探出之以授學者使後世懷懷如古聖親炙于前講習之益大哉向學徒言於  
刺史以君深窮典籍雖白首不衰願爲諸生譚思博喻俾躋厥味而升諸堂君其無辭宜補州學講書故  
牒。

補鄉貢進士張景純充學錄詞

學舍庶務須雅才領錄之君向已總攝會與計吏偕故虛席不補今君之才未克施有政宜還學官振綱  
條觀所措置是亦爲政云宜補州學學錄故牒。

補鄉貢進士趙肅充州學教授詞

士之入學至大成必因夙儒領生引而內諸聖賢之域以君博物多識求文章法度今肄業之彥褒然朋  
來君當示以規模振闡拂所蒙而先明之得英材教育孟軻所樂也刺史慕焉今補君州學教授。

補鄉貢進士劉傑充堂長詞

前日以堂長在學錄右主者言學錄錄一學事堂長爲諸生首位當在次孔子曰必也正名刺史是以曉  
有司釐正今補君州學堂長其率諸生典學無忽故牒。

# 景文宋公集卷第一百單二

## 齋醮文

### 乾元節宰相開啓道場齋文

伏以若水開祥。契上聖千年之運。祇園脩供。資能仁衆善之因。恭憑無量之福田。仰祝延鴻之睿筭。伏惟皇帝陛下。體元行健。累洽重熙。荷靈命之睠懷。迪先謨之懿鑠。昭德而誕膺純錫。敷文而交舉上儀。在璿克集於歲功。鳴社爰臨於誕節。萬邦咸乂。九序惟歌。某官翊亮天工。協宣皇極。率勵同寅之志。克申順美之誠。當華渚之令辰。獻堯封之善祝。躬趨寶刹。特啟淨筵。四事香花。羅寶階於兜率。六時鍾唄。演梵唱於魚山。繫勝果之圓成。佑鴻基於悠久。皇帝伏願宸居樂豫。壽域歡康。固守位於金輪。齊卞年於沙劫。法雲溥蔭。將德澤以長周。慧日揚輝。等皇明而久照。某官伏願茂膺戩福。益顯嘉庸。彌宣調鼎之勳。上贊垂裳之治。然後願寵均朝著。恩浸寰區。官師咸罄於忠規。黎獻並躋於富庶。大包瀛表。細及昆跂。仰沐加特。同茲饒益。

### 罷散道場齋文

伏以薰風叶序。寶月向盈。記祥虹華協之期。著金鑑露囊之盛。虔趨福地。大啓眞筵。罄朝野之歡忻。集人

天之瑞福。恭以皇帝陛下。茂膺瑞命。祇紹凝圖。待旦垂裳。冒洪禧於海域。彌旬舞羽。偃師節於方陲。順履佳辰。夙標聖旦。旅貢琛而展慶。鄰媿玉以伸歡。某官襄贊大猷。翊宣至化。欣誕彌之佳節。集延祝於羣倫。哀對梵仙。宣揚祕典。光闡佛乘之最。上迎天筭之遐。皇帝伏願。湯德逾新。堯章增煥。九河開與。五緯循躔。綿周億載之期。長奉萬年之慶。鋪昭惠命。永庇含生。某官伏願。穆景三階。凝和九鼎。竝翊帝猷之亮。交隆國棟之華。然後願鳴玉翠蕤。藹藹贊清寧之運。游童逸老。熙熙樂仁壽之場。

乾元節功德疏右語三首

右。伏以星樞燦電。仰屬聖期。龍藏貫花。普陳淨供。演迦陵之仙韻。籲震旦之歡心。伏願陛下。齊永寶天。均華慧日。如山委貺。拂石迎年。曼丕筭以無垠。撫慶圖而增固。

右。伏以國家寶祚。縣長。洪基丕固。惟正陽幾望之旦。乃元后克生之辰。列辟投誠。百靈薦祉。延梵宮之開士。集淨會之良因。上奉至慈。永臻純嘏。帝圖累盛。益隆百順之祥。睿筭無疆。共罄萬年之頌。傾虔懇祝。倍萬常鈞。臣某無任。

右。伏以瑞旦流虹。茂紀清和之序。聖猷躋日。允光雍盛之期。率土胥歡。後天申祝。恭卽布金之宇。竝啓貫花之文。盛供柔嘉。清流淳濯。冀憑妙果。祇達虔誠。續惠命以無疆。擁珍圖而俾熾。永孚鴻貺。臨撫羣心。

祝聖醮文

右伏以上聖推仁萬靈蒙賜無能名德。況用謝生。是以祇案齋科。仰祈仙極。發葉晨之幽蒞。步璇宿之秘綱。月律一周。熙事云集。所冀區區之懇。上洛於真游。丕丕之基。永隆於宸祚。億齡俾熾。景化常新。無任懇禱之至。

### 昭憲皇后忌辰讚佛文

伏以仙驄上賓。邈靈遊而遂遠。星龍緜舍。優遺範以如存。式臨奉諱之辰。欽薦無邊之祉。伏惟昭憲皇后。欲祥聖武。宅順坤儀。首基椒極之華。參翊蘿圖之永。懿猷茂建。柔化丕昭。悟真諦以收神。衍慶謀而垂後。今皇帝永懷徽則。介助真詮。悵先忌之環經。凝孝思而叢感。祓除金地。披釋寶文。旅華緘以巡香。儼珍羞而侑供。冀憑惠果。上縉勝緣。昭憲皇后伏願法露普流。慈雲周應。晏居淨界。常爲十號之證明。顧在朝家。彌極九皇之高治。今皇帝伏願奉承鴻緒。增鞏丕基。絕瑞高符。交天人而相答。尊名盛德。煥日月以常新。四序順成。八風和布。臺師偃戢。原稼豐甘。然後願磐石英藩。永茂維城之業。乾台哲輔。益隆禮嘏之勳。官師告叶於忠良。黎獻竝躋於仁壽。

### 禳災道場開啓齋文

圓照普臨。羣生攸賴。顧伉儷之屬疾。歷旬月以未寧。用集禪薰。載披梵筴。所冀滌驅衆咎。叢介繁禱。俾損病腦之勤。回爲清淨之報。投誠至切。垂祐是祈。

功德疏右語

右伏以法緣交濟。庶彙蒙成。方內闡之纏痼。匪至慈而曷禱。式延淨侶。敷叩靈篇。冀緣懺謝之勤。併釋咎殃之惱。諸方回鑒。萬倍迎休。祈仰所兼。祇肅于是。

禳謝醮文

臣於慶曆八年。被命案視商胡決河。於時將議脩塞。財用未辨。民無聊生。臣恐智慮昏愚。不克集事。默發心誓。仰叩上真。願開發所見。冀無迷謬。其年遂建議罷脩河口。休息兵民。朝廷頗以爲便。免於罪悔。神實佑之。今謹脩薄具。歸謝靈造。冀臣自今以往。凡百所爲。每賜警寤。無陷非僻。無墜咎辜。無謬正作。回無迷禍爲福。敢因報祀。兼達至誠。

祈雨醮文

比以蒙常示咎。政失有初。慮取怨在人。或移災於歲。內省云屢。遠復逾非。用款藥都之庭。恭展霄網之式。晝御三復。熙事具成。願除貪墜之災。且被智塵之晦。順氣來應。嘉澍滂流。蠱騰弗生。札癘咸弭。惟彼蒼之垂鑒。顧自孽之難逃。叢譴尸臣。回祐黎庶。至誠罄列。真庇是依。

知益州醮文

臣荷天子香委。臨撫西人。立功賦事。多所不逮。慮索智窮。日負罪尤。永惟巴益之地。生聚百萬。臣爲之長。

脫一繆悠。民受厥愆。今者上啓天帝高真列聖。垂監下臣。矜照危懇。俾發寤未通。濯祓暗冥。使裁處寡悔。措置時當。上不誘朝廷之法。下得遂黎庶所宜。嚮方遠罪。實天之貺。

生日設醮文三首

臣蒙朝廷任使。提總九州。安撫兵農。使各就厥緒。雖日夜極慮。期副帝心。然恐智昏識淺。差失輕重。不適事中。上詒國羞。下取民怨。故因始生之日。祇禱神靈。懺謝曩愆。開發後悟。薄品澄酌。仰薦至誠。昭鑒在下。惟賜裁許。臣遭遇盛世。名位過分。惟始生之日。上懷考妣。劬勞無報。投誠天晨。開佑餘福。焜照幽冥。超悟上真。俾臣悉力。得免罪悔。無任懇禱之至。

恭以至仁臨下。幽感必通。臣永惟所生。不克攸報。流光環及。危懇無歸。是用案式清場。投誠妙蔭。冀聖真之臨鑒。察怙恃之長違。紛委餘禱。茂延先烈。明威在上。敷訴云依。

伏以塵界喧卑。人靈紛沉。或時屯日厄。或鬼觸祟纏。或違攝取痾。或妄動成悔。沴氣相輔。私居不寧。仰惟不覆之仁。下布無垠之蔭。敢持丹苦。祇叩高真。願垂營護之慈。俯濟危疑之困。振除後害。涵泳餘祥。颺歛可通。誠明茲罄。

祈福醮文

伏聞庶品每生。有爲皆罪。至慈無上。自新者容。敢據斯言。昧陳危赤。伏以臣本乏材力。過冒寵名。入侍禁

嚴出領藩劇。多歷年所。未報國恩。而智慮昏蒙。舉措違選。刑罰弗中。賦斂失期。感害至和。自取幽罰。遂致疾苦。綿跨歲時。祝不信辭。鬼用牧室。撫心內省。詒咎有初。今者。祇潔清場。廣延上士。披拂琅蘊。申啓珠篇。備舉明科。祓除餘責。臣今願洗濯情府。茂對聖真。已造之非。從而知悔。將來之殆。決不再爲。少禳降禱之來。仰幸添齡之貺。披宣至苦。監照是依。臣稟生暗愚。少小多病。十有三歲。慈母見損。年甫及冠。又失父蔭。訓誨弗終。志操晚立。行年二十有七。乃始登科。片文單伎。遇天子十有六載。擢爲從臣。或外領劇州。或內幹繁局。邊要帥領。皆責便宜。每念短謀謬計。弗暢人事。輕重失措。處置乖方。下情壅隔。庶務漏罅。貪榮冒祿。苟進偷安。雖逃邦刑。先罹鬼責。抱疚沉頓。出入三年。寒暑交侵。藥石無效。誠恐值乃厄會。不復永年。內求諸心。敢不知罪。向者。預編條敕。兼領史書。情淺意迂。斟酌無準。識昏學陋。褒貶妄加。幽明難誣。報應俄至。又如獄案繁重。軍律峻嚴。從權作法。臨機制變。纖微有失。生死頓乖。及茲追咎。慘如焚灼。伏念訓有改造。法容自新。況惟高真。必許悔謝。若乃命曆素定。安敢有祈。至於生理未終。則將自誓。已往之咎。訖靡再造。未來之惡。罔或輒萌。履于有常。戢其過分。見寵思辱。在安念危。損怨鋤驕。踐言慎獨。不敗人成。己不掩短。現長捨五。欲濁緣去。六塵妄念。漸臻寡過。以贖曩愆。明神在前。慈衛如咫。有渝茲戒。是殛是顛。崇降大厲。有如皎日。無任懇禱之至。



# 景文宋公集卷第一百單七

## 行狀

馮侍講行狀見聚珍本卷六十二

孫僕射行狀見聚珍本卷六十一

石少師行狀見聚珍本卷六十一

## 姜副樞行狀

姜遵字從式年六十八公之先本齊姓漢以豪桀徙天水後葉復貫淄右今爲郡人焉公幼岐嶷長而沈毅初肄儒業治百家之言深博自將文藻足用既與鄉物有聲於齊魯間屢挾策干宗司以經濟自任咸平三年真宗始御軒陛延髦秀公以進士擢第於殿庭明年補登州蓬萊尉治有風力郡將供備庫使水丘陵貪其幹用奏請就補本州理曹掾且參軍事朝廷報可未幾丁內艱去官免憂闋都銓舉充開封府右軍巡院判官京穀浩穰獄市居天下劇爲吏者罕能以課自脫公至則勵辭氣探情僞厥職脩舉庭無留事二囚自誣棄市罪獄將具矣公微得冤狀飜其文致先是雪冤有賞公慮傷前主者寢不自列祥符初秩滿判大理寺丞建封恩例改殿中丞出知吉州廬陵縣氓籍數萬氣俗荒獷左言閔貌以久認爲健

公威克明斷。摧破姦黨。據案一決。吏民厭伏。汾陽禮畢。就改太常博士。得代歸闕。時前丞相天官正公在  
西掖。熟公治行。卽薦公才幹。押察視之任。有詔換監察御史。八年。以勞遷殿中侍御史。充開封府判官。賜  
五品服。吉州守高惠連誣構公。廬陵舊事。奏請逮訊。公聞命不疚。馳往對辨。左驗明白。訖無污鱗。還臺。以  
□□同判延安郡。天禧三年。召還。遷侍御史。判三司戶部句院。俄出爲陝梓利夔等路體量安撫。先時公  
舉奏山東大姓姦利事。至是。皆伏法。天子以公建白有狀。未復命。卽拜尙書工部郎中。非常例也。使還。出  
知邢州。今上卽位。就轉刑部。移守於滑。俄充東南轉運使。天聖元年。換京西路。不旬日。召以本官兼侍御  
史。知雜事。加賜金紫。受詔。詳錄計省逋負之籍。科別蠲貸。明年。遂以本官充三司戶部副使。三年。改兵部  
郎中。遂歷副度支鹽鐵二使務。俄攝太僕卿。充北朝正旦國信使。四年。還節。領職如故。其冬。拜右諫議大  
夫。知永興軍。六年春。駙召以本官充樞密副使。七年。遷給事中。八年秋。感疾。請告。兩宮馳親使。挾太醫相  
望於道。存神省慮。形於慰勉。九月乙丑。車駕親視臥內。賜白金三千兩。丙寅。薨於某坊第之正寢。上聞震  
悼。復趣駕臨弔。制贈尙書吏部侍郎。法賻所須。率在優等。夫人路氏。國子博士從古之女。封平陽郡夫人。  
公三子。長曰居正。舉進士。早夭。次曰延齡。任太常寺太祝。次曰餘慶。未仕。四女。長適棣州商河縣主簿王  
翔。次適東頭供奉官閣門祗候宿若虛。次天於室。季尙幼。孫三人。曰承顏。試將作監主簿。曰正顏。齊顏。及  
遺奏之上。延齡改大理評事。餘慶特授太常寺奉禮郎。正顏齊顏竝授祕書省校書郎。外孫宿拱之。授三

班奉職。哀榮之數。存歿之恩。篤矣。公長昆昭範。治春秋經。未中第。次昆著。以公貴。載授太子中舍。致仕。今皆物故。公天資方重。內孝而外嚴。家庭之間。有若官府。性長於吏事。濟之以忠力。未嘗阿邑當世。故所莅必震肅。所言多指切。前後進用。皆上所自知。又以感昔人削蕪納誨之箴。問樹漏言之誠。故闈臺奏議。樞機密言。天下事甚衆。世莫得而知云。惜乎。參基命之司。歲律未幾。遠猷熙綽。弗克究公之素。寒暑興沴。棟梁其萎。然可謂雄峻之寶臣。黃中之元吉者已。節惠易名。國有彝典。謹次官閥。告于有司。謹狀。



# 景文宋公集卷第一百十八

原本卷首  
三頁佚

## 啟狀

代王相公

漢風隆洽。宗臣遂萬物之宜。晉道宣臻。綿寓無窮人之諺。蓋所以恢明職業。暉潤典彝。俾百度以惟貞。靡一夫之不獲。然後翊巖廊之景化。贊法座之鴻樞。寅亮懿綱。緝熙禮殿。撫辰凝績。冠茂伐於人彝。宅揆奮庸。飛淑聲於帝載。永言休範。宜屬洪鈞。恭惟某官。日域靈輝。天球瑞質。粹儀霞舉。會峇宰之昌期。偉量淵淳。稟天人之先覺。夙蹈凝嚴之地。亟推渥綬之私。建竝議以朝熙。舒懿文而麗國。論思東序。先賈誼以受釐。間宴西清。化倪寬之上壽。自邇彌綸庶務。叶贊宗工。潤綠詔之溫純。參黃扉之宥密。出驅元乘。慕談笑而却軍。入奏青規。用春秋而繩下。茂勳舉集。景昞荐隆。旋以國家上聖。凝圖虛皇。委覽紫清之誨。延密論於真官。綠錯之文。委鴻禧於命曆。淺尋墜典。茂建宏猷。追上世之登閔。講鴻儀於希闕。天壇祕牒。檢玉以升中。汾曲隆睢。瘞繒而報厚。申明絕業。祇答上靈。矧復整仙輶。以時巡。款闕壇而順拜。鬱華之館。緬想於道真。藝祖之區。誕頒於侯度。宣恩羨溢。紀瑞殊尤。乃至真馭下臨。聖衷登格。珠官寶地。嚴螻獲之珍祠。琅簡雲章。薦麗鴻之丕構。並繫頌畫。交展緝儀。至於約鳥策之舊章。紬鴻都之祕記。搜遺冢壁。大備於討論。

增絢緹袖。動臻於良直。裁成大典。昭示方來。以至按瑞牒之著明。測祥源之鳥奕。上窮真系。慢集珍文。賁紫宙之奧符。紀翠媿之元命。再刊青簡。分祕殊庭。斯並發自訃謨。騰爲穆頌。鑲于琬琰。充入金匏。果膺揆路之求。荐正星階之位。咸事九德。掩臯陶之矢謨。不出十年。邁樂安之故事。民瞻式係。天眷日躋。凡該動植之流。盡被陶鎔之化。竊念某忝冥有素。優仕無聞。濫巾綿絕之司。筮乏華纓之列。飲冰受命。夙畏於簡書。越俎代庖。敢踰於官守。徒以幼屬垂鴻之運。長推延世之恩。進懼食浮。中疲智効。延年斟酌。寧有合於當時。潘岳拙艱。本無裨於巧宦。洎膺明命。出掌關征。策駑筋十駕之勞。勵鉛銛一割之用。求大夫之仁義。方冀飭躬。論文學之銅鹽。未能卒業。旋屬庭闈失養。怙恃纏悲。對風樹以長號。撫垓蘭而永想。九回結款。慨無嗣於弓裘。十死茹辛。幸未先於犬馬。逮喪除之云畢。復譏賦而是司。權貨殖之耗登。謹簿書之出納。雖復激印單惠。訂正舊章。犯慮裝懷。盡分於節目。展體率職。無潤於脂膏。期王事之有終。誓詩人之盡瘁。然念物情素定。固并介以難移。吏道寔繁。豈姿材之可學。甫終考績。粗免曠官。効方朔以上書。徒取恢諾之誚。慕子真而乘傳。更懷孤遠之慙。重念先君侍郎。早接遊從。豫聞風義。趨平津之閣。款睇有加。託趙氏之孤。緒言多在。遽遺淪裔。上惻鴻私。俾餘搆之未墮。實休光而是賴。而又質方違願。祿靡代耕。素衣已化於京塵。雪履將穿於車府。先疇遷貿。曾無平子之田。藁質支離。屢緩休文之帶。苟媒銜自逃於醜行。則再三奚決於蒙亨。伏望某官鄒律融春。傳川借潤。辨頑金之自躍。許蟠木之先容。特拯迷途。俯矜舊物。憫周

南之顧託。軫江左之流離。雖鱸鱠並逃。寧慮於漢。而牛羊無擇。何間於齊。仁激波儻化於海。淮自卯庶求於時夜。願著靡捐之効。少酬全度之恩。過此以還。未知攸措。

### 上江提刑

嬖庭佐治。臯陶爰作宥刑。周室移風。姬旦乃求中典。皆欲財成經制。不奉珍圖。闡熙洽之洪猷。賁清寧之景運。是以五刑之宅。期至於無刑。三刺之文。僉同於羣吏。聿垂懿範。昭著方來。而中代已還。淳風不競。作僕區之法。始自於諸侯。鑄刑鼎之書。浸興於叔世。重輕交失。抗敵乃多。無鈞金束矢之平。有絕澗游禽之刺。至乃秦脂凝密。窮十失於隆刑。漢網恢疎。約三章於愿法。颺流旣異。訟革靡常。逮夫王道下衰。憲綱增緝。前律後疏。漸紊於常經。倦令敵民。罕躋於鴻化。道無終否。聖乃嗣興。國家撫五代之遺黎。開九皇之真系。交張治具。燮定元基。刑屬三千。緬追於遐武。號居十二。永念於懿綱。適底劇之繁文。重齋居之移讞。湯羅屢祝。犯命而乃誅。堯屋載封。畫冠而知禁。然猶念綿區之至廣。愍昭憲之未孚。臨遣信臣。按行列郡。片言而折。許龔遂之便宜。露板以聞。用田仁之刺舉。導迎寬政。宣布洪恩。苟非冠績吏師。騰英朝美。攬轡負登清之志。奏刀揚書。騁之聲。則何以佐山甫之將明。副重華之欽卹。定國之持獄。自以不冤。宣尼之聽民。可使無訟。永言宸睭。是屬正人。恭惟某官。日域凝華。仙莖宅粹。六世冠冕。盛南國之道風。十紀羽儀。有西京之世德。英聲煥發。懿實流聞。早推射策之功。亟奉牽絲之寵。優游上列。蹈勵凝猷。御珍駕以駿奔。翔倉

垠而上擊。分麾使竹。允著於循良。掌籍道山。載加於紬繹。旋屬近臣。慰薦清問。疇咨定漢。絕於一王。歷周  
行於三署。問鬼神於前席。方慶受釐。儼車服於私庭。更旌稽古。寵章彌渥。嘉績荐疑。瞻言全楚之區。夙重  
輜軒之寄。賦輿錯出。法敵於誅求。貨殖懋遷。俗淪於盜窟。果頰刃地。出按簡書。揚惜懼之深仁。決攘爭之  
健訟。奉違仙闕。寅舉詔條。一成允極於盡心。五月旋聞於報政。以至星罕弛籥。霜隼霽威。文無推案之煩。  
詬絕投書之訴。民懷格耻。罷惡少之探丸。吏黜舞文。鞠圓扉之茂草。坐清周犴。欽輔禹孜。弼成議緩之功。  
實賴神明之化。頃者邊氓人保。遐障驚師。密連篁竹之酋。潛議荏蒲之聚。怙茲綿力。屢擾齊民。乃至虎節  
會軍。牙璋置守。出奇謀於堂上。視醜虜於目中。尙嘯餘妖。敢稽天討。而復親承深詔。躬督銳師。按炎徼之  
舊封。塞壺頭之險道。戈舡狎至。雀杏相望。羊祜輕裘。不廢總戎之事。馮唐尺籍。雅更持節之勞。塞旗未暇  
於窮追。具沐已聞於相吊。收鼓銅於駱越。浮寶無遺。駕灰乘於零陵。前茅載肅。克震梟牙之銳。式封鯨觀  
之誅。七旬咸格於藁街。五刃竝囊於師節。集成茂伐。皆屬全謀。果膺進律之恩。特舉疇庸之典。銘功隆碣。  
方震於天聲。列象哀烏。再光於郎位。便合速揚上笏。不迪清衷。豫密勿之鴻樞。注凝嚴之景眇。出參法從。  
陪翠帽之宸遊。入直周廬。佩紫荷之仙臺。然後庶奚作頌。佐稷陳謨。克揚英茂之文。欽奉都兪之對。永言  
茂躅。方啓亨衢。敢因慕義之辰。罄敝由衷之懇。切念某材非楚有。士愧燕奇。偶游泳於太和。遂寢尋於秀  
業。青衿學校。幼參方領之游。黃卷聖賢。長豫冠章之列。猥屬書同之運。不忘時術之功。外愧育材。中疲操



吻轅生抗辯。遏逃城旦之書。嚴幹談經。終謝太官之傳。勵精雖切。底滯居多。加以扣寂冥襟。希光俊域。漱九流之芳潤。攀三代之英蕤。得於緝縹之餘。致在緹油之末。問劉棻之奇字。靡憚咨詢。持丁虞之小文。方求潤飾。十日敢矜於特氣。三年偶遂於變儒。不意天難匪誑。靈根夙殞。陽橋陰梓。永悼於清暉。遠壑隆墀。再充於浩歎。憤百身而莫贖。濱九死以奚追。驟歷炎涼。偶存食息。撫心自惋。非游吉之亢宗。投袂失圖。僅馮生之齋志。矧今翹英命秀。跡弛興廉。筮多士於金華。濬洪源於璧水。場駒交墊。丘帛旅馳。雖天網大該。盡收於絕足。而義車亭午。莫照於幽盆。蓋舛運之所纏。致青雲而坐隔。播精寡効。空謝於支離。列地無成。自傷於泔澌。載念道將時背。才與願違。采榮而瑜未掩。瑕務進而尋將枉尺。執中黃之賤虎。志極固窮。貫梁甫之枯魚。感深遐慨。顧惟塞薄。深懼淪胥。此者。幸遇某官。恢誕素功。鎮寧雅俗。敷文華而飾吏。用敦厚以變風。比闕里之訓人。不忘吾黨。類何侯之按部。先見諸生。某是敢望履祈通。游藩俟進。示壺丘之天壤。雖有悖心。宗郭泰之龜龍。寧忘素志。儻或俯矜。曩品許覲。令儀念完。士之一言。采詩人之下體。陽秋借譽。俾陳蔡之及門。月旦評許。老韓而同傳。稍遂蒙亨之志。誓銘在吉之恩。過此以還。未知攸措。

代回呂相公

顯膺朝冊。入冠台司。定命前頒。至公肯慶。恭以某官。稟天正氣。蹈道至和。親逢聖真。翊贊皇極。九德咸事。六府交脩。亟辭衡鉉之崇。迭倚翰垣之重。辰階有竚。公袞實歸。建三入以調元。固萬樞而思乂。讓誠雖確。

褒制終行。卽鳴閣之便辰。煥槐庭之盛禮。良哉嗣唱。具爾均瞻。尙敦禮於朝風。且移書於宰屬。永言下綏。方庇洪鈞。慶論道之云初。佩敷言之彌緝。欣悚感緒。并猥于茲。

回宮師呂相公

荐拜囊封。懇歸藩政。安車得請。懋册延褒。志遁成功。誼光逸老。伏惟某官行爲民表。器適時中。歷事三朝。勤勞一德。公槐弼務。聯周宰之懿猷。仙菊侑餐。訂漢台之難老。嚮總鉉旒之重。聊藉翰垣之行。日竚公歸。共熙天載。而素懷知止。確奏引年。激世教之競浮。重宸襟之嘉挹。特申冲請。用獎宗工。冠品官朝。燕居輔。揮金娛日。匪直二疏之榮。束帶會朝。仍亞三公之著。永言茂躅。足煥常均。某夙庇埏鎔。欽懷耆艾。第結冥鴻之慕。莫奉赤松之游。猥辱謙懷。先貽榮問。仰緒風而增悅。銜至誨以忘劬。瞻愧歡翹。萬一無喻。

回大名李相公

見聚珍本  
卷五十五

回夏樞密

光奉制恩。復聯機政。僉俞惟允。欣慰斯符。伏惟某官基德溫恭。經謀隱濟。聖期參遘。宥命實司。嚮憤諸戎之騷。自請中軍之總。由陝而右。盡護將屯。持旄以西。躬授方略。屬邊防之如律。旦宸眷以竚咨。亟走召車。俾歸使節。又天樞之祕劇。用遂前勞。賁朝册之光榮。蓋均舊物。尙聆謙執。未卽欽承。方露奏以讓還。并移書而敷述。矧惟定命。夙告治朝。幸廢冲懷。早祇蕃渥。感悚抃素。交戢于茲。

回狄侍郎謝轉官

茂膺方贊。外亞冬卿。賞典有光。朝言胥允。恭惟某官。參和熙采。安節踏中。世咨樹政之良。上倚告猷之穆。輟于法從。撫是价藩。徧愷悌於懷人。浹中和於儷曲。職勞騰報。增秩許留。尙蒙潤於靈波。足露華於賜冕。遽煩騰訊。敷列感懷。矧惟公爵之行。敢荷歡言之辱。姑欽謙假。冀永銘藏。

回李太尉

見聚珍本卷五十四

回王龍圖謝改職

奉承褒檢。改陟華聯。由漕最之比聞。實師興而有賴。罕通禁籍。就總雄藩。參我武之訓嚴。尉彼都之翹冶。方昭賢業。遽枉書辭。矧當熙采之辰。何損敷言之懿。載惟感緒。姑誌深悰。

夏太尉

總臨陝服。入守雍都。師錫所符。寵靈茲煥。恭以經略太尉。大猷遠業。文事武經。忠結本朝。功暴羣辟。向者。允侔畔逸。軍瑣謹嚴。首圖舊人。出制師節。會風塵之微擾。苦部領之素分。邊奏薦聞。容衷改制。亟換高牙之鎮。盡護西方之屯。幕府大開。屬僚參建。決千里之勝。聊假坐籌。便一切之宜。靡從中覆。望高羣帥。威憚殊隣。諒繫方叔之行。企賀營平之捷。某早膺台眷。欽覲恩章。歡素所并。費詞無喻。

回夏樞密

肅奉恩函。還參謀幄。露讓封而確請。稽寵冊以彌旬。中詔褒敦。薦紳聳竚。果緣宸眷。遂屈素懷。茂涓剛日之良。對越王休之盛。寶釘有爛。聿將麗服之華。閔馬斯材。併侑康侯之錫。折衝是賴。基宥云初。敢冀謙冲。曲詒誨翰。署行方箭。已抃於懋功。申誦書辭。益欽於悅禮。載言欣感。姑永銘藏。

回王舍人

被寵制函。聯榮禁掖。伏惟慶慰。恭以某官機神秀舉。器采詳華。自州士以丞髦。速朝綬而遶羽。含章襲美。遂暢於四支。大對危言。實均於千牘。允升清貫。茂對聖期。向以星省須才。槐庭給簡。旅咨宅俊。入代出言。曾桑蔭之未移。粲綸辭而已屬。奏篇上御。成命遂行。蹈四戶之凝嚴。分六曹之平決。尙方染緌。聿頒安吉之衣。武郡封泥。式布溫純之檢。方欽詔德。猥辱移書。獲窺揆藻之工。兼幸判花之接。茲爲欣仰。併戢襟悰。

回安州范侍郎謝上

肅奉璽章。言馳旌馭。合符惟謹。坐閣云初。流美化以在人。雍太和而視履。華樞舊望。聊均左使之勞。細札寬恩。更厚南公之幸。敢圖謙裕。遠錫誨言。咀辭味之腴豐。泳情瀾之霑渥。此爲佩戴。永誌誠悰。素籥蕭辰。黃堂暇景。益遵願實。肯副民瞻。

回杜樞密

光膺制命。升贊樞庭。伏惟慶慰。恭以某官識略宏深。忠謀鯁亮。休有老成之德。荐階華近之聯。朝夕告猷。

濟天人之名學。紳綏倚重。蔚柱石之良材。果被僉兪。入居宥密。方露固辭之請。且敦難進之風。矧邊瑣少勤。帷籌虛竚。得賢爲賴。崇讓匪宜。諒外迫於至公。必難諧於素尙。敢期謙挹。亦示誨言。欽俟拜嘉。始符翹祝。

### 回夏宣徽

光膺茂制。改建高牙。伏惟慶慰。恭以某官亮節純深。嘉謀隱濟。比煩西略。荐筦中樞。參盟作礪之山。增重敲雲之鼎。方乃上還劇柄。懇避成功。緣石席之重遠。遂翰垣之光撫。寵深易地。任切殿邦。尙聞需奏之勤。未卽齋壇之拜。并流餘誨。具述冲懷。顧成命之旣行。匪善辭之能已。竚交恩節。用慰翹衿。感戢于茲。名言罔喻。

### 回杜樞密

肅奉制函。進聯機省。協于上德。佐乃訂謨。方安節以辭隆。久稽恩而竚報。亟紆敦詔。罔遂謙懷。式涓休令之辰。茂對延登之典。便蕃三接。密勿萬樞。惟賢路之有光。固公言而交慶。尙流榮翰。敷致感辭。仰欽圖舊之良。參服降階之懿。永言悚抃。第戢襟靈。

### 回鄭樞密

顯膺中詔。參幹內樞。伏惟慶慰。恭以某官業總天常。道躋民極。育卿材而有蔚。序皇器以斯華。政緝九畿。

利鈞六筭。休有不績。簡于上心。果陞諫掖之嚴。入佐天機之重。紳綏動色。慶嘉遇之大來。帷幄疇咨。本朝言之師錫。側聆謙執。未卽寵光。伏省戶以固辭。眷宰僚而示誨。竊商眷倚。必有敦褒。望回初節之甘。速對茂恩之緝。欣銘企登。併萃于茲。

回宋尙書

見聚珍本卷五十二

上皇子賀封建

光奉冊書。肇躋藩社。伏惟慶慰。恭以壽國公太尉狗齊異稟。岐嶷早成。席海潤之洪禧。擁日躋之休閒。先親有典。僉議亟揚。屬公府以上圖。詔治朝而備物。壹茅分土。居承列聖之華。開府秉髦。聊示中權之寵。維城斯叶。洊震云初。某幸服邇僚。歡聆渥典。欽矧介圭之謁。益昭綿臧之遐。抃慶所叢。文陳罔喻。

回資政李侍郎

見聚珍本卷五十六

回晏樞密

奉被制愈冠司機省。露騰需奏。確布謙懷。留渙冊以淹辰。企羣情而戢抃。果聆溫詔。終屈搗情。三接便蕃。趣俟斯猷之告。萬樞凝遠。式絜同底之和。欽覲寵華。方深慶豫。荐辱書辭之祝。仰銜德柄之勤。歡感茲并。敷陳罔既。

回韓侍郎

東鈞舊德。維枳輔邦。嚮緣共治之宜。遂倚于宣之重。下車未幾。班詔式勤。泱嘉頌之歡流。藹太和而煬攝。猥詒芳翰。敷衍謙懷。欽言雋之永長。服潤波之霑洽。載惟感緒。姑戢煩悰。披晤方賒。瞻斬參極。

回程左丞

見聚珍本卷五十六

回夏太尉謝男授提刑

治應最條。寵加使節。士論欽歎。臺札布聞。惟雋路之翰飛。本親庭之愛教。克家用裕。襲謹不衰。方欽駢牡之華。兼覲良箕之盛。猥紆緒翰。周述謙懷。窺覲喻之有條。弟昭銘而無斃。自餘景嚮。曷罄名言。

涇州王密學

被褒制檢。帖職機廷。聿獎成勞。寔華近綴。易藩宜之劇部。藉方略於中權。愴我大威。被于戎落。方欣信賞。猥示芳銜。欽倚辨之在辰。枉敷辭而敘感。弟銜謙意。永誌深悰。

夏宣徽

榮奉制恩。進聯徽省。恭惟慶慰。伏以某官大猷體遠。盛業謨明。以文武是憲之資。更安危所注之重。叛羌阻命。謀師倚成。籌制前坐。式遏西略。屬邦嚴薄伐。帝錄久勞。申擇禁廷之嚴。往增使府之重。戎軒務劇。聊疇南仲之勤。胡落數殫。企露營平之捷。王綰誕布。朝轍肯歡。某早庇末光。欽聆茂渥。忝署付行之請。阻伸慶謁之儀。距躍于茲。名言曷罄。

李太傅惠先令公碑文

圖昭先烈。仰達奏封。詔大手以舒文。咨健毫而潤石。義均峴首。名煥京阡。裝搦至精。布傳彌廣。偕沁波而不腐。慶貂葉以滋華。謂接曩游。亦詒副本。申復披文之妙。周知濟美之勤。感戢所叢。名言罔喻。

回轉運龐待制謝轉官

職勞有狀。滿歲當遷。真拜郎闈。卽褒使府。允穆紳綏之論。踵增簪橐之華。況自陝奧區。雄邊列戍。令糧大廣。擊穀尙勤。諒茲進等之階。聊啓懋功之漸。遽煩敦喻。益見多儀。銜挹所深。銘藏曷已。



# 景文宋公集卷第一百十九

啟狀

體量雜端

右某啓。伏承祇飭飛輶。已臨北道。少留使節。參整事經。方炎旻暘雨之交。且行府文書之總。雖煩省閱。無爽宜調。百吏望風。斯人翹首。願安道粹。仰對宸咨。竚獲瞻陪。尤深欣企。

賀曾參政

光膺制命。進貳台司。伏惟慶慰。伏以某官識照幾神。體含彥聖。所立不倚。我思無邪。早勸講於金華。晚代言於玉署。思式方夏。實尹王京。德涵化源。裁定民極。久儲上帝之賚。果躋三事之榮。百工傳聞。一□□嘆。神介于福。固正直之是歸。君庸作歌。信明良之胥契。竚光熙綽。遂正上公。某方剖州符。阻從賓序。乃情叢抃。臨翰難文。

回王太傅謝高陽關部署

見案珍本卷五十五

回李舍人謝知制誥

見案珍本卷五十三

代肯舍人謝啓

見案珍本卷五十五

代鄭公謝叅政狀

祇荷褒綸。擢陪台席。亟露陳於讓奏。枉垂報於敦言。趣拜寵靈。交深榮腆。切念某本緣儒服。驟旅朝綏。寔持從橐之華。深蹈禁門之複。蔑齋最狀。少報上仁。方虞且儆之訶。復忝敷求之錫。諫曹茂秩。政弼崇聯。雖薄訴以冒聞。猥批章而蒙諭。寵非其次。將忍終身之慙。服不值庸。更畏十人之指。此蓋某官封殖夙加。題評素定。因叩叩之訪逮。亮斷斷之顯憑。助育譚才。贊行賞典。敢不益操深志。仰叩大猷。載驅駑緩之姿。或禦負乘之寇。冀紆誚議。少答恩勤。感灼叅懷。名言罔叙。

回宗室使相賀叅政狀

肅膺褒制。升贊宰司。祇荷寵靈。交深感腆。切念某謏材曲學。慙慮煩襟。興于梓族之餘。玷乃殊科之選。荐塵榮次。取愧英游。幸遭山藪之藏。弗責斗箕之實。獲紓罪戾。寔易歲華。不謂台序之員。宸私誤獎。諫曹上列。政弼崇聯。尋昧死以自陳。冀回恩而改擇。曲煩聖喻。終廢危悚。已冒服於官成。方震慙於心術。敢圖宗哲。先枉書辭。絢禮意之謀勤。助邦猷之僉錫。庶緣外獎。少道多言。佩戢于茲。文陳罔既。

代回宗正狀

叨荷易咨。入聯台采。揆謏材之不稱。淹寵策以自陳。願寢誤恩。少安公議。而詔音垂喻。人乏須承。已冒服於寵章。方慙震於心術。敢圖宗哲。助穆邦猷。列芳牘以鋪芬。借餘光而收飭。庶緣外獎。更激懦衷。榮感叅

懷書言罔叙。

代回皇族狀

近蒙恩制。入服台聯。嘗啓讓以報聞。勉協恭而冒處。慮塵至化。方惕危悚。敢謂宗英。首詒書指。借褒言而煥發。助公論之僉宜。榮感于茲。文陳罔既。

代謝前兩地狀

諫曹上列。宰政崇聯。併荷寵靈。不勝感懼。切念某。藹才曲學。恣慮煩襟。興于悴族之餘。玷厥殊科之選。荐塵榮次。取愧英游。書命掖垣。了無裨於國采。慎辭鑿著。始有惕於官箴。幸遭山藪之藏。弗責斗箕之實。獲紓罪戾。寢易歲時。不謂台序乏員。宸心慎舉。首頒成命。猥及孤生。尋味死以自陳。冀資賢而改擇。曲煩聖諭。終廢危誠。此蓋某官助穆公言。序熙朝粹。因爲容之素定。致延渥以繁臻。然而三事陪榮。萬機竚訪。協承樞極。非庸妄之所堪。參佩韋弦。或箴規之自勉。益圖勤止。用副恩斯。

代謝外任兩制狀

肅膺褒制。外贊宰司。祇荷寵靈。交深感悸。某本緣儒服。寢齒朝纓。頃特從囊之華。架蹈禁門之複。曾無最狀。可報上恩。不謂台序乏員。宸私誤獎。改諍曹之茂秩。躋政弼之崇聯。省已甚明。控朝希免。曲煩聖諭。終廢危悚。尋冒服於官成。徒震慙於心術。曷圖謙槩。前墜慶辭。曲敦征彙之情。陰禦煩言之誦。永惟勗愛。敢

息銘藏。清覲末期。遙懷匪罄。興言感遇。抑假夙期。尙丐良箴。以終前貺。自餘感戢。罔旣文陳。

代回兩地狀

叨聯宰政。尋布威惊。雖趣附於星郵。或未通於鈴史。敢謂某官。曲敦夙契。前墜書辭。助恢則哲之猷。陰禦多言之畏。波餘所逮。夕惕差安。屬私抱之已敷。且費詞之難再。姑藏褒激。庸識獎成。

代求見書見聚珍本卷五十

上潘郢州求見書見聚珍本卷五十

賈相公生日

宗工挺生。名世胥會。肇休辰於秋律。震佳應於崧神。恭惟某官。百志昭明。九德惇大。以經術稽古。用文律緯天。載誕甫期。祝延增跂。射蓬在戶。已符經禮之占。芬菊稱觴。共薦期頤之筆。永輔王室。常冠臣鄰。某遠宿官常。阻陪賓慶。詹祈所萃。崖略罔宣。

留守相公

遠守价藩。坐遠材館。洪鈞播物。久依陶育之餘。假節乘鄣。仍在訓齊之末。揆至和之馮厚。擁諸福以便蕃。某官挺世自名。與聖胥會。輸至忠於王室。建不續於宰司。謀謨上前。鼓舞天下。留宮杜鑰。聊均三事之獨賢。備冊贊書。方企九功之圖舊。朱暉順屆。典謁方遙。伏冀上對倚毗。慎調寢饋。

回夏宜徵

祗膺獎冊。出總中權。視傳席之崇階。冠徽庭之茂秩。龍靈優緝。中外僉宜。恭惟某官。精力移忠。壯猷經武。網繆累聖。參幹萬樞。屬者戎候尙虞。簡書徵警。逐羌廐而護塞。移戊校以屯邊。暫輟機臣。往頒師律。自天而下。聊示亞夫之行。先計以開。式竚營平之奏。眷求惟允。欣賴方深。敢冀哀謙。遽煩占牘。欽啓行之爲盛。願懋賞以斯隆。感慶叢懷。名言罔喻。

回韓侍郎謝加職

茂膺褒命。進貼崇資。伏惟慶慰。恭惟某官。誠本忠純。器包閎遠。參幹機衡之重。荐倚藩垣之行。靜壹政條。妥安民極。上心爲簡。耆範有光。亟升規殿之華。移總使符之劇。河海之波并潤。適寄老成。股肱之郡召還。竚階丞弼。方深舞歎。遽枉緘封。味謙意之冲勞。聳輿情之欽假。永言欣戢。倍越等夷。

回楊州盛右丞

進肅臺機。外觀藩政。本緣樞宥之劇。重爲愆艾之煩。逮此均勞。允昭同體。武經文緯。聊資作憲之華。袴頌。繡歌抑有報成之舊。詎期鈞念。遐況芳音。敷感會之餘言。寫謙冲之深旨。荐循雅論。切眞勞悰。茂氣方升。寬條適。願安和粹。仰契眷懷。

賀都尉王樞密

光奉制音。入聯樞禁。伏惟慶慰。恭以某官忠由世濟。寵與時偕。地聯右戚之華。業總中軍之盛。出藩倡治。趨節來朝。屬邊燧之少勤。藉籌帷之中覆。亟僉舊德。參預繁機。自命之揚廷。藹羣倫而動色。尙聆徹奏。固執勞謙。停嘉冊以彌辰。墜芳銜而露悃。矧惟虛席。已竚告猷。幸回崇讓之高。時副欽鄰之望。自餘欣感。併此懷銘。

代回晏樞密讓

光膺制命。聯總機廷。伏惟慶慰。恭以某官器采宏通。謀猷隱濟。函天光於泰定。服聖旦於親逢。治被寵靈。徧階華劇。屬以邊書騰警。樞省須才。聿圖舊人。升幹中務。文經武律。參揉庶邦之和。晝訪夕思。佐決萬機之重。敷求惟允。僉論攸歸。敢謂謙沖。特詒誨問。尙稽朝渙。顯露讓函。況成命之已行。諒素懷之無遂。矧聆延拜。併釋歡翹。

代上兩府讓狀

樞帷決采。宸宇僉疇。過聽枵疎。豫參機要。恩靈踰次。震悸裝懷。切念某學術匪優。仕塗茲臚。久塵禁職。獲奉帝暉。姑效螢爝之餘。罔裨金玉之度。驗于已效。奚所取材。不圖咨岳之求。俾貳本兵之重。內循諸已。竇竦於多言。上累而邦。敢安於誤寵。伏望某官憫其知止。惠以有終。助推能哲之慈。追能惟行之命。儻從至讓。是免疾顛。悃幅既叢。文陳奚喻。

代回樞密王太傅

顯奉制恩。正司樞務。伏惟慶慰。恭以某官。烝彝世烈。盟府茂勳。參財坐幄之猷。惠底垂橐之化。四夷來享。賴先計以周知。三接同餐。服嘉謀之開合。成勞灼叙。異數進加。蓋積歲以宜遷。矧師言之率籲。方欽藩獎。遽覩善辭。諒謙槩之有光。顧王言之既綽。幸遵眷倚。時荷褒升。欽祝感慙。萃集誠府。

回張副樞讓

見案珍本  
卷五十五

回夏宣徽

輟務中機。憺威西畧。抗戎旂而信邁。按邊瑣以申嚴。臨幹不庭。盡護諸將。師興多務。軍次參勞。恭惟夙暮之間。昭介寤興之祉。猥流鈞翰。粉飾謙儀。欽悅禮以敦風。第藏心而戢感。留屯訓武。當守倚成。行聞月捷。之傳。歸總天樞之祕。瞻懷企祝。一二靡宣。





# 景文宋公集卷第一百二十

啟狀

上河東轉運

上都摻別。俄更上下之弦。勞府事叢。罕奉沈浮之訊。承使時而署政。且馳遽以貽書。占授悉周。研覃有味。矧奉將明命。經略奧區。錯上賦以慎財。邦資晉糴。橫大河而縱棹。人記虞巡。諒茲乘傳之行。啓是富民之拜。願遵冲攝。用副眷求。感鏤傾祈。度越倫等。

渭州戴屯田

芬椒服譽。素景於朝髦。談樹宿官。阻申於私見。自辟書之高選。監近輔以陪京。固有隔於等威。矧敢交於記奏。斯者。詎謂倅理郎中。毀方求合。稱物以謙。因門子之賓興。謂胄筵之僚屬。特煩下教。罔愛優評。九河之潤沾餘。頓祛鄙倍。兩喜之言溢美。奚所克堪。願窮褚以珍藏。爲它年之恩紹。秋辰適啓。時訓是遵。遡仙表以在遙。伏空函而奚狀。

河南資政

護將王柘。淹卹祠園。幸及便時。已終藏事。自客轅之暫稅。煩使介之繼來。申遣英僚。就爲供具。醪牽紛屬。

果餌嗣霑。嘉賜不停。行人改觀。雖重本朝之常體。亦緣舊物以致懷。揆遇匪常。撫衿奚報。而還衡所迫。詣府莫諧。擁朝節以亟趨。俵台光而茲耿。望遵冲衛。增又繁祺。早正鴻鈞。大庇葵品。紳綏之願。日月以勞。

梁相公

藩侯職冗。庸蜀地卑。誠有恨於官儀。難數通於私問。然結戀公府。譬萬類之在鈞。而布武賓階。乏兩朝之飛肉。孤懷坐墜。芳歲謾遷。恭以大觀文相公學士。道合至和。德包咸事。光輔丕后。茂熙庶工。已成輔相之宜。遂去功名之地。再更巨鎮。聊倡四方。惟克簡於上心。無不在於王室。願總諸福。普尉羣瞻。矧舊物之未捐。荷所天之全覆。其爲禱係。自萬故常。

代回樞密王太傅

需奏報聞。詔音敦勸。已揆惟良之旦。式光往踐之規。善舉在茲。僉言允稷。伏況某官謀經王體。武訓師和。著慎將之威名。擁康侯之蕃錫。內簽宥命。時叙繁機。未滿歲以爲真。本稽賞典。惟其人而後備。式寵臣鄰。榮誨首詒。謙誠增慙。願寵靈而伊始。積欣感以何言。

江南轉運郎中

久伏民廩。近還閩籍。多難幽憂之後。學殖寢荒。平時英俊之游。書牋殆廢。載懷高誼。實耿離悰。轉運郎中。望秀材林。業偕賢運。亟樹風於官次。洽飪聽於聰謀。久資郎署之賢。外駕使軺之傳。千艘銜尾。大集於中。

邦二節追鋒。行階於上笏。崢嶸歲晏。壹鬱人遐。願履常休。用紆遙款。

知郡國博見聚珍本  
卷五十三

魏府太傅

夙以下材。久浮詔祿。嚮福基之甚庫。滯郎署而罔遷。頃以綿章。上庠使蔭。困簿書之猥。幾寘殿科。稟符檄之規。偶逃敗事。訖于終課。復此還臺。免三考之去幽。有二天而戴賜。恭惟知府太傅。道孚亮采。聲揉列邦。均陝伯之東西。闡儀克壯。裂星街之南北。戎索是疆。暫倚重於假藩。佇入膺於夢賚。羣倫注聽。介福大來。願拱著以方初。邈遡風而增欵。神馳在遠。思札罔宣。

薛叅政生日持禮

三階布象。下儲名世之賢。六矢在門。聿記炳靈之旦。恭惟叅政侍郎。順咨是采。罔伏斯謀。負敲鼎以和梅。坐巖廊而厚棟。歲周慶育。月叶清和。共延祝於壽祺。益進階於皇揆。有少微禮。其列別封。

陳州胡侍郎問候

淮陽近輔。素倚於吏師。河曲餘波。久蒙於京室。逃仰褰帷之化。善移值誦之風。節宣有宜。戢穀云嚮。崢嶸九重之圖舊。參四近以宣猷。揖晤未間。傾瞻何極。

攀遠侍郎狀

克涓令日。夙艤行艫。順楚泆以揚舲。慧淮雲而引旆。祖壺係出。朝絨愴違。某比屬絲桐。阻陪錢禮。銜恩惟舊。銷志無從。願安遵渚之行。彌保慎齋之訓。永惟愧戀。罔及文陳。

代鄭公回夏尙書

見聚珍本卷五十二

回狀元監丞

比自苦葢投艱。郊屨鏗蹟。絕聞代事。荐易歲筭。祥紀汔終。迷魂來復。早者亦承狀元監丞大孝。奄鍾偏罰。歸伏倚廬。內抑摧哀。顧服調養。某適當病力。罔及聞知。洎得行路之傳。已當踰月之外。匍匐莫展。慙震何言。月初秀才范君過訪蓬華。伏蒙特墜於誨。曲亮疴殘。始罄述於孝思。終惻發而收齒。溝中木在。詎稱於繁文。河上病同。但均於哀歎。永言心照。足厚民風。切聆鷓鴣。在勤羞膳無爽。順變爲大。惟疾其憂。千萬支持。以副深祝。

太尉

近闕私憂。甫寧病體。久去外朝之著。罕脩執訊之儀。跡係民廩。神馳義府。恭惟太尉。續宣金石。忠貫天淵。總離衛以誰何。訓善經而肅給。百祥助順。彌厚於福基。三接蕃恩。永隆於邦翰。孤平無似。挺鑄攸依。

座主侍郎書

見聚珍本卷五十一

代與李舍人書

見聚珍本卷五十一

上許州呂相公書

見案珍本卷五  
許康詩之前

代張問謝解

玷斯士之髦。宜從人廢。畧茂材之等。輒以名聞。撫才表以自驚。刻情涯而罔竄。竊以斂材之重。歷代尤難。漢則令計吏而常偕。優其續食。唐則具鄉飲而申送。侑以少牢。一再之適。貢有差。造秀之序。升咸允。若夫王在之邑。天下爲樞。本英雄之所躔。視郡國而爲首。乙公車之牘。動或三千。盛橋門之觀。居然萬計。國家不承聖職。善述先猷。炳乎人文。重我王國。乃至慎咨朝彥。謹司馬之辨材。臨敕貢條。俾新書而從事。必先所試。冀得其真。或內舉之致嫌。許別頭而練實。洪惟典制。高出古先。諒匪行比師儒。譽推鄉曲。敏以求於方策。遂際天人。默而好於深沈。周知統畧。則何以言詩後素。用賦升堂。一縱一橫。折理而歸於正。勿并勿猥。射策而著于篇。中誠矩以不私。膺錫朋而爲盛。若某者。稟生疏闊。累世羈平。幼陶郁郁之風。進服青青之佩。杏花菖葉。早去先疇。鐵擿韋編。顛懷典學。曩緣方物之選。獲參鄉老之書。再試宗司。率見呵於非是。覆求佔畢。徒貽謂於諱窮。加以多難。間纏病悵。無賴罷歸故里。頗同馮衍之掃關。循陟南陔。姑奉詩人之潔膳。奚其爲政。是亦素心。頃聆深詔於四方。內迫偏親之一懼。臨博而企。未能忘懷。再鼓必衰。猶期決勝。是用齋函鄉郵。連襪國游。會執事之避親。當至公之第可。毫錐若綴。銀紵如雲。仰異試之謹嚴。苦措辭之澁訥。逮終削柿。遽迫銜山。已忘之步。與行自知將歸。旣債之軍。語勇曷足論功。方竢報聞。卽謀藏密。敢言

斷斷之技。亦借濟濟之英。擢自下流。致之上列。伏况瞿圃僅存之士。莫匪雅材。中興第二之流。綽存清議。遽茲忝冒。愈集震慙。此蓋某官簧鼓斯文。朱丹至治。樂嘉魚之與其。劬乃進賢。軫函人之恐傷。茲焉藏疾。因三物賓興之際。恢四科進擢之規。水鑑之妍醜洞分。鐵灰之低昂無舛。遂令庸懦亦齒題評。敢不景止前脩。務時往載。九變貫而知選。架遡本元。一飛鳴而及辰。寢借寥廓。庶伸尺寸。上答獎成。

安撫雜端

暫違省闕。臨撫邊鄙。持節戒嚴。駐車問俗。導下情之壅鬱。宣上意之丁寧。易嘆爲歡。化勞而抃。顧屬韃之列帥。方負弩以趨風。欣企所叢。名言罔喻。

回并代部署孟都使

見聚珍本卷五十二

賀廣信軍武六宅

寵正使名。茂光戎轄。守符未改。邊瑣增雄。某官英槩自高。沈謀克際。敵上所愾。鬪勇於餘。積閱有歲月之淹。薦賢交章奏之密。果從聖東。進服恩褒。列帥慰以相歡。中軍倚而增重。攝符無狀。卽席是資。竊抃餘音。回符久禱。

回提刑

光膺茂渥。貳案祥刑。差命便時。卽親治職。某官守兼文武。識照幾微。雖從上食之優。式結帝宸之顧。大河

而北。庶獄號繁。允光命擇之嚴。自寄澄清之本。得人爲盛。先令有孚。惟此屬州。克依餘庇。載言欣躍。曷罄文陳。

判府尙書啓

表海報成。坐躋樂國。申折分理。進守留京。幕府旣開。彼都何幸。恭惟尙書明謨熙綽。俊德惇元。荐幹機樞。彌奮忠力。而自均國勞任。揚天至和。靈龜在忠。喻馬忘累。雖復勉班春而振乏。大庇物於屢豐。出乃緒餘。同人憂樂。賞圖尤異。聊襲冕以露華。地直鬱葱。果錫□□□。惟秦宇之先定。非外物之屢遷。今茲偃藩。  
原本  
下佚。





# 景文宋公集卷第一百二十一

啟狀

上晏太尉

見聚珍本卷五十四

回臺直李屯田

見聚珍本卷五十五

提刑轉運制置到任

近祇詔檢已署藩條。參省恩榮。舉增慙仄。伏念某福基庫下。心術慙煩。曩以丁辰。無勞而冒祿。頃因多病。未老而逢衰。雖忝皂衣之聯。久露左魚之請。天衷開可。朝議誰差。及此守邦。居同藏疾。然甫訟外牒。猥值劇州。國府遞更。本爲都之一會。農商雜處。率放利於三游。處以拙艱。慮于墮斃。所賴化條明備。使範布間。振以宏綱。攝其漏目。漸翼循良之勉。罔煩鑄讓之科。企竦於茲。名言罕既。

壽州到任謝兩地

見聚珍本卷五十五

兩制

近祇恩檢。已署郡條。涖俗匪能。循榮集悖。伏念某器非適用。材不瘳人。筋力之強。早爲病奪。緹油所學。遂與年侵。荷漢橐以無裨。乞阮塵而自試。嚮緣蒙可。獲此庇身。曾是劇藩。號爲難治。銅鹽轉餉。歲溢於商緡。

薪粲論輸。日交於吏案。楚僖俗錯。符攝務煩。內惟泥遠之姿。必震墮官之咎。所賴至公當路。明詔在寬。審盧縛之異宜。俾韋弦而參企。漸圖有政。庶服攸箴。擁符榮於一方。隔紳綏之三揖。永言系戀。恨以翰飛。

回李團練二首

見聚珍本  
卷五十五

陳州楊相公

紆壽春之紉。次宛丘之郊。綠材閣之未行。擁原籥之舊感。卽趨府上。獲侍台光。聞郤縠之談。彌臻義府。規方叔之政。交樹壯猷。乃知右輔之安。式有長城之寄。且復眷存羈齒。崇比上賓。拜嘉授粲。以不遑。始至如歸之絕擬。萬夫歆艷。一介光榮。迫此簡書之期。遂悵風波之阻。乃情知嚮。曷日敢忘。矧以虛從橐之聯。守左符之遠。孤根易仆。墜雨可矜。惟祈卓馬之亟還。入冠乾樞而作輔。大坏兼造。虜蹟攸依。叢禱于中。訥言安喻。

回棊撥發

見聚珍本  
卷五十五

回廬州張學士

棲毫從橐。引絨近藩。本緣藏疾之仁。靡課班春之效。獲茲臥閣。居惡空餐。方企風華。願修鄰好。敢謂某官。追書林之舊。欣牙壤之交。疾走行郵。辱垂芳問。故情雅眷。甫依東壁之餘。美政歡謠。益仗南風之競。褒存所至。銘款忘勞。時簫向衰。官箴有限。望安介福。庸副遐心。

常州知大卿見聚珍本卷五十五

郢州知郡比部

各領州符。同違陸載。我疆差近。君御少留。復緣庭鯉之歡。頗熟星鳥之采。終然共治。俄爾遂行。限北渚以銷魂。悵南雲之礙日。潛商驛候。當啓齋鈴。惟敏政之有初。諒蕃祺之交勞。江關歲晏。金玉人遐。結戀孔多。陳言茲拙。

回泗州知州見聚珍本卷五十六

與轉運兵部

光奉寵詔。外總行臺。除目四騰。公言參允。恭惟某官。含章暢美。游聖殆幾。自結清衷。早諧華仕。垂紳綬袂。久已寘行。觸脾投觚。舉皆游刃。嚮緣四牡之選。式撫三吳之疆。民克用和。使還有指。未溫魯席。遽飭漢輶。掩三淮之右區。趣萬倉之西漕。轡無停攬。遂經登汰之謀。貨有餘貲。並調盈虛之筭。先聲云泊。羣望自歸。某早締雅游。今叨屬部。敢恃私於恩舊。方稟誨於化條。欽偃歡愉。叢并心極。

回廬州張學士

治壤聯疆。行書交舍。雖嘗修單訊。而比辱報辭。屈尊府之稜威。厚雅游之褒眷。永言隣睦。有激世風。某官素槩冲猷。懿謀嘉話。樹聲藩服。流美臺閩。求福不回。雖軫潛郎之嘆。保身且哲。迺臻大雅之宜。今比燕居。

諒蕃戩穀。屹帝暉之接晝。慶耆範之光朝。瓜溜所分。蓬扶云託。瞻懷之素。崖略匪宜。

回張著作

久塵侍臺。懇乞州魚。得請中宸。爲邦善地。宿苦筋骸之疹。頓蒙稍廩之豐。藏疾于茲。銘恩何極。敢謂某官。愛忘其鄙。褒溢于言。因奮藻之患多。遂扶衰而引重。欽膺交照。輒用中藏。或挽或推。迥敦於風節。將安將樂。有激於頽陵。官次坐糜。駕言宵阻。勉圖良食。無重遐心。

上集賢相公

阻侍台華。稍淹時管。列邦地冗。罔敢通書。羈齒心危。未嘗寧舍。本和鈞之曲賜。及藏疾之寬科。貸以所窮。詭其收報。離縱跼翻。諒無彈射之虞。荏苒孤根。或動句萌之望。然念朴愚云舊。樹立匪它。明有自知。越思蓋鮮。士無不肯。免嫉良難。追悞昨非。幾成夕惕。淮壩繁洪。楚俗剽輕。雖勉頌條。未知寡悔。所賴博陽在位。邁陰德以方遐。宣父爲師。主斯文而未弃。踵門雖遠。馳悃知歸。

韓資政

嚮緣多病。懇乞爲邦。制許一麾。事皆三府。會尸祿之譏。寢暴且得。請之文具存。因獲左符。猥叨劇地。蚩氓輕剽。囂牒叢紛。摧櫓之心甚危。渠能操決。轉粟之蹤未定。居畏平鑄。邇敵台藩。闕脩詎舍。迄茲少息。始用追慙。重念早以屏翰。厚蒙比數。巖廊脫屣。嘗趨丙魏之風。儒館援毫。竊記吁俞之論。今茲列壤。均泱餘波。

何圖舊物之微。重荷所天之覆。永惟瞻賴。拙布言詞。驟及歲陰。諒安時祉。益遵調護。上副營求。

回昭譚知府司勳

頓首中宸。乞麾閔郡。上仁兼愛。微欲見從。留籍雲意之華。俾守州來之劇。下車班詔。案籍觀風。乃知雅官之游。因占僑鄉之貫。每欽臺彥。輒試里居。敢謂某官。顧星署之聯。灑月毫之訊。褻謙過分。道舊兼常。窮側里以敷辭。訂疏麻而凝馥。永惟銜寫。曷寄聲言。矧萬里之名沙。本一都之作會。已聆異等。問疇褒章。齋疾慎持。禱懷參劇。

回廬州慎龍圖

偃息大藩。妥綏善俗。化行已日。福集有基。謁歡袴於斯人。潤靈河於比壤。方茲景行。將列感懷。敢圖宣布之閑。曲示諄勤之誨。多文博我。早欣冊府之聯。微福事君。今疇簡書之卹。佩音有裕。敷禱奚殫。尙苦歛炎。顧持齋疾。

回亳州韓資政

嚮奉單函。獲通盛府。羈懷薄訴。訥語無華。緣大庇之有初。非報章之宜及。敢圖鈞抱。尙眷鯁儒。謂左竹之隣。禮均背命。且洪河之浸。福有并蒙。屈此雄嚴。裁爲訊教。曲達久轉。驟回陽管之春。跼羽重蘇。併解虛弓之怯。永銜存撫。還疇埏和。

柳轉運

就膺恩檢。移領行臺。署事有初。移文交告。徧屬城而竦震。謫公路以欣愉。恭惟某官。擢穎士林。揚芬世烈。早連吏課。飭服朝猷。峨豸中臺之端。危言已屢。潛郎華省之舍。見效旣彰。淹久外遷。便蕃劇選。然而長淮夾右。故楚參聯。利總南方之強。漕爲天下之最。尙煩按節。聊駐褰帷。方論煩使之勞。入對清光之邇。某曩披令采。今庇餘光。企詠瞻依。益倍常等。

回制置林郎中

改領外臺。總經南漕。東求至遘。調度寔繁。騰制日以四馳。泱公言而同允。側聆行府。將出屬藩。追郎舍之締游。接朝綏而最舊。負簡清道。幸識騶呼之華。執板造庭。方稟教條之謹。敢期謙損。先墜滕封。推禮意於降階。損使威之異等。捧窺窮幅。腆駭叢衿。顧邇望於末光。冀面敷於感緒。自餘欣躍。曷寄言聲。

回陳州楊相公

仰企台躔。密瞻義府。緣參承於下執。時通列於單函。位隔等威。禮無報復。某官弗矜元輔。厚禮諸生。特遵宜答之常。俾作焉依之地。富鄰華燭。均蔀屋之餘輝。暄律熙春。動枯株之生意。永言銜款。罔及喻名。三輔奧雄。四隣欽眷。竊祈順攝。用介蕃釐。孤冗之情。懇勤茲切。

回曾學士

召試複門。升華書殿。邸音騰示。士類欽歡。恭惟某官。凝宵天倪。叢芳世烈。弗從舊食。自策俊科。允矣丁辰。久而埋照。盤桓歲晏。飮詠菁莪之風。偃蹇郎潛。終耻鑲耶之請。嚮由庠胄。參講藩房。綠碣館之上游。趣蘭臺之賜禮。揆辭有蔚。第賦尤高。亟蒙武帳之嗟。遂直東廊之奧。一辭進對。叩漆屐之焜煌。三祓直居。盛太官之供擬。聿爲彰俊。方比頌賢。遽辱圓封。鋪陳亨會。甚文且敏。初無加點之煩。將樂而安。更揖相先之懿。符魚官冗。刀筆務嬰。欣腆交中。文詩拙喻。

上兩地

見聚珍本  
卷五十四





# 景文宋公集卷第一百二十二

啟狀

回呂學士

茂膺褒檢。進拜華曹。詔目傳頌。公言欣允。國家不承列聖。大集祕書。積爲丘山。未判朱紫。金匱幽藏之舊。羽陵紛蠹之餘。帙第舛并。題名放失。嚮頒臺禮。申委時髦。悉探九流。彙分四部。羣條參列。積歲覃思。標明七略之凡。整比百家之猥。欽惟俊選。備罄誠明。紬績有勞。擁牙籤而窮景。討論既具。煥芸牒以蒸青。迨此奏篇。果聆第賞。改員省署。被獎王縉。企商賈之允諧。方頌賢而交慶。邊詒啓幅。敷敍榮期。三復漓華。但仰斯言之選。一函修報。莫知吾黨之裁。姑戢眷私。永敦風誼。乃情歡嚮。萬一靡宣。

回府判魯端公

尸祿蒙訶。請藩自試。許兼邇職。俾屏劇州。荷山藪之見容。專刀筆而爲效。歷懷顛俊。罔敢通書。誠以列郡中臺。居有重輕之別。寒灰秋帶。決非氣焰之求。何迺哲人。迥敦至獎。輟贊籌之餘景。絢點翰之彝儀。支梧頽波。尉安危蹟。迷魂黯黯。頓如招些之還。未路佺佺。更仰餘之及。載言銜竦。拙布端倪。

回王大卿

祗屏劇州。迥遙治閣。拙汗書筠之訊。長懷卿月之華。緹籥更時。甫田均帳。此者。敢圖蒼哲。遐祝絨滕。一介奉將。八行周喻。仍聞易地。將及交符。來暮去思。容切二邦之仰。道冲神勞。固叢百福之宜。胥歎異疆。奚階接履。尙希良食。式對亨期。附遺布懷。牽文寡述。

回廣德比部

懷章之戍。弭檝過州。特緣郎省之同。得奉賓葦之接。主儀不腆。水宿難淹。耿此騷離。惋爲悵企。不圖雅眷。迥篤深情。中道剡緘。因風流問。誦詠椒蘭之馥。併紆蕭葛之忠。尙審使時。方趨治所。益強攝衛。垂副瞻言。

回亳州韓郎中

見聚珍本卷五十四

回呂贊善

開榮恩檢。通守奧藩。惟京輔之宣風。重吏師之畫諾。選能斯在。視政云初。願惟不腆之邦。肯慶有鄰之辛。萬馳思緒。遽枉芳音。荷永好之芳椒。動恂悰之悅栢。第銘禮況。曷罄言聲。

回廬州張學士

亭瓜聯軫。廐駟銜羈。每欽治等之高。兼切隣光之庇。心焉景行。日以飛馳。敢圖仙室之惇儒。參願邦麾之病守。書筠灑妙。齋釀分甘。第三復以忘勞。實九回而紆悒。春遠茂暢。神社紛那。善治寢居。仰符眷渥。

上楊太尉

見聚珍本卷五十四

回廬州慎龍圖

捨舟弊邑。馳傳樂郊。冒涉初炎。保寧玉體。顧我邦之密邇。繫師節之糾提。特辱詒書。聿崇修睦。坐廢符邱。阻屬囊鞬。尙聆追薦之勤。望勉加餐之愛。瞻懷感服。滅裂匪宜。

回穎州鮑學士

改藩近輔。便道弊州。屬玉體未寧。犀舟延進。道山之舊。殊阻於銜杯。地主之儀。靡皇於出宿。方茲慙悵。遽枉音騰。承便嘉時。已總仁政。首念鄰睦。遠走使人。且喻勿藥之和。彌釋采蕭之戀。恭惟清穎奇士。儒林文人。還定流庸。簡略苛細。報成可待。覺五月之猶賒。均潤有餘。況九里之非遠。載惟瞻庇。竊用翹忻。慎夏持生。乃情深祝。

回提刑李都官

光膺朝柬。欽按刑章。總三淮之列邦。擁一封之飛傳。茂涓令日。騰署使移。屬守瞻風。吏股皆拚。敢圖提振之重。尙記平曩之游。前墜膝封。曲敦獎眷。釋尋于再。銘慙相參。矧以承平之辰。詳讞尤重。覈爰書之設。認糾庶獄之叢。紛威節所臨。善氣交應。自顧疋殘之質。冒居藩劇之州。政也無良。智有不逮。始託二天之庇。苟逃三黜之幽。傾俸前驅。想見頎表。乃情欣向。間不容言。

回知南京俞給事

見聚珍本卷五十五

上新轉運張郎中

見案珍本  
卷五十四

回廬州慎龍圖

欽咨日御。肅展藩儀。啓大府之雄嚴。副南公之歡踊。泰然樂職。式是爲邦。曾坐席之未溫。遽占書而垂喻。報成五月。矧觀齊魯之能。修睦四鄰。前服陽秋之懿。疆分有守。踵見無從。姑服眷私。內銘膺府。益持齋疾。以副情翹。

回李中允

抱疚蚤衰。乞州自效。向雖開允。乃值劇煩。簿最囂敦。簡書填諉。分爲俗狀。絕睨英塵。某官以傑出之才。膺試可之召。旦程奏牘。暮直道山。耿賢路之光華。竦仕塗之歆豔。發舒感遇。騰播牋移。已施臺省之英。兼顧藩翰之宥。鼓詞華鬱。約禮渠勤。顧推一飯之先。優借百函之貺。重惟退墮。久去凝嚴。三費蒙喩。已忘討論之舊。九言知選。姑降紉繹之精。欽祝翰飛。益據盛業。餘光所臬。吾黨焉依。感竦欣銜。滅裂非敘。

上僕射相公

光膺朝制。兼總天樞。伏惟慶慰。竊以三公之尊。古無不統。五代多故。職乃有歸。別咨邇臣。以本兵柄。部分諸將。直出於禁中。參決奇兵。不關於公府。承流寢失。革弊在權。惟時宗工。克對明命。某官世基厚德。天界大猷。熙載之勞。則歌於六府三事。寵任之美。則詩於崧高烝民。協濟聖功。不冠皇極。然德有垂倣。連無常

安遼種寒盟。光禽盜塞。保障四鄙。未使窮迫。調發千金。不無煩費。上意尤注。時柄難分。果屈上公。臨判中務。擇清明之便日。布焜煌之冊書。百辟歡聞。多方拚愜。方且坐料脆敵。陰伐詭謀。案邊吏之鎖甚精。轉關中之漕相繼。漢皇萬里。決無不見之明。曲逆六奇。遂倚先幾之勝。奮庸有待。訂美無倫。某適綰州章。方遙謁舍。詔文布下。私慶叢衿。

### 上樞密相公

光膺制命。兼秩台司。伏惟慶慰。恭以某官。奧學幾神。孤風拂世。便蕃懋寵。密勿洪機。介多福以不回。諷昌言而無擇。自西氛締惡。列戍雄邊。六月出師之勞。千金調食之急。守皆餘力。民罔咎辭。暴於外朝。實我不績。屬并公府之領。遂視宰司之崇。朱閣傳趨。墨麻誕告。疇庸所奮。示筌宰之一心。付任有歸。注安危之兩意。詔文申下。士議并歡。某夙齒陶埏。側聞贊授。魚書有恨。鳧藻無從。卑情不任。

### 上集賢相公

欽膺茂冊。兼領鴻樞。伏惟慶慰。竊以台宰所司。文武參憲。號無不統。烏得有分。況二垂宿師。三接論道。幃制勝。櫛俎折衝。果出吁兪。併茲眷委。伏惟某官。至誠天挺。清節世咨。輔政六年。均邦一體。大猷懿德。暴中外以徧知。確懇冲言。讓功名而已屢。終不得謝。倚而代工。復涓外日之良。合總中機之密。除音四達。歡議交騰。方將變伐詭謀。增修王度。足兵謹備。靖西土之釋騷。按節撫和。取匈奴之要領。民瞻叢仰。丕績佇

升某祗佩左符。阻陪慶謁。挺鎔所泊。距躍兼常。

陳州到任謝兩地

見聚珍本卷五十六

回潁州鮑學士

泝漕之滯。假塗通謁。講鄰邦之好。厚修地主之儀。宴豆屬厭。行囊捆載。不皇淹久。遽愴騷離。前及便時。已署州事。重以晨雞夜犬。近接於餘音。富燭貧光。再依於雅貺。積爲感賴。可旣名言。嚴律向深。寬修多裕。願加頤實。參介福基。

到任上兩制

見聚珍本卷五十四

回通判韓中允

上文南闕。奉對西清。擢次甲科。顯通閨序。代家鄉俊。參詔於朝。猷仕牒思階。例關於郡。刺詔除行下。公議歎嗟。緣感會以敷陳。徧儒先而厚謝。奔惟孤蹟。見謂曩游。嘗枉音滕。茂將彝禮。會夏秋病力。牽屬思遲。文難倩人。書乖宜答。久悵慙於闕筆。俄遷次而易藩。首念峻寮。將聆畫諾。巾車未稅。行李已來。載窺累幅之華。益服占辭之敏。承侍家府。尙須戍期。調奉燕安。福祿榮衍。惟長人之庸懦。忝近輔之輿腴。兩鬢紛蓬。一心摧櫓。日祈夙駕。垂諗善經。欽企感藏。鹵莽非敘。

上程左丞

比膺成命。入守近藩。願表蒙榮。忤餘集抃。伏念某性疎乏媚。材拙少施。早誤朝咨。偶塵法從。稟生多病。移狀亟言。間緣蜚語之興。遂獲出麾之便。而淮肥郡劇。獄務事叢。日困鞅賢。坐需諉譴。天誘私望。詔俾內遷。還江海之遐身。訂丘山之大賜。然結根苒苒。已嘗一枝之危。而引吭嚙嚙。敢有再鳴之伺。危心漸釋。鈞庇有基。此蓋某官景式彝倫。邁種陰德。激波迎涸。穿隙逗輝。尙令羈蹇之人。復窺安妥之地。敢忘頌祝。還奉耆明。伏謁未辰。吮毫奚斂。

上許州孫龍圖

解符下蔡。換節宛丘。便道無□。卽官云恪。祇循思任。併集榮慙。伏念某學匪逮優。情而近介。向叨法從。亟避親嫌。多病自陳。言皆有狀。不材遭詆。上頗見哀。顧淮楚之劇州。假圭魚之寵刺。甫更年舍。方經殿科。遽煩綠詔之追。入屏黃圖之邇。跼波而奮。價焰重燃。天實誘衷。人得支壞。此蓋某官念嘗僚之舊。傾先否之期。協導僉疇。采收羈債。伏況前瞻邵父。具有教條。北面齊侯。又依鄰庇。叢茲多幸。免恤後艱。修謁尙賒。扞辭奚狀。

回延州通判馬太傅見聚珍本卷五十三

回陳書記見聚珍本卷五十五

回杭州通判劉都官

阻奉雅游。漫踰華歲。符魚有守。風馬非鄰。私書闕修。情暄茲極。敢圖茂眷。迥篤久要。粲一紙之丁寧。見千里之眉目。神麻非匹。右袂永藏。清覲未辰。至和增攝。

回亳州韓資政

六枳聯藩。三能<sub>見</sub>在望。頃嘗奏記。俄沐報章。冒檄烝膏。然灰發燎。鬱爲叢感。方冀嗣緘。不謂某官坐閣之餘。隱几流問。敷陳殺幅。疾走齋兵。下致雌黃之堂。垂賁支離之翰。滿埃濯鱗。可質於褒言。弃埴頑金。終依於巨冶。敢論比壤。自是所天。願遵頤食之宜。參副維巖之禱。況于羈冗。尤切翹依。

上宣徽王太尉

見聚珍本  
卷五十四



景文宋公集卷第一百二十三

啟狀

回壽州張侍中

見聚珍本卷五十五

上兩地謝赴闕

見聚珍本卷五十五

上蔡州夏太尉

見聚珍本卷五十四

梓州杜學士

自領州魚阻參朝。緹灰凋歲風馬殊疆。徒延脰於緒音。闕修儀於尺訊。敢圖英哲。申記故常。謂五日之趨。每陪於指帶。且一麾之出。偕幸於班春。但良晤之莫諧。實遙懷之均悵。況聞報政。將逮交符。竚還左城之參。益重西清之眷。載循感企。萬不一宣。

上昭文呂相公

專總萬樞。靡嗇冲用。間緣疾作。久以告居。高手係馳。清衷存喻。別詔薰場之啓。參迓繁禧。切勅黃門之嚴。不通讓奏。邇臣旅候。大事走咨。洪惟本朝。可謂殊禮。相公方且懇辭柄任。將就養頤。遁其成功。屈我不社。然斯人善祝。宜無愧辭。內天棄和。康不須日。况宣尼吾禱之久。博陽陰德之遐。所苦至微。向憚不已。望速

臻於勝念。姑勉奉於謨謀。早視政機。垂快羣願。永冠三槐之路。均延二老之齡。某外滯守塵。阻參冢幸。載惟至悃。拙布多文。

上京東運使陳司勳

見聚珍本卷五十三

上壽州張侍郎

見聚珍本卷五十六

回李太傅惠御製挽詞石刻

見聚珍本卷五十四

上永興太尉

見聚珍本卷五十四

上知府諫議

官伏攸箴。地祿惟屏。每懷耆德之懿。闊治私書之勤。內耿勞悰。漫踰芳歲。恭惟某官。遠猷時並。清節世咨。輟自凝嚴。總臨都奧。茂經民紀。偃息所以。藩君勤喻。上恩宣布。由乎樂職。人和歸美。天祿固膺。矧乃史企。惇言朝思。雋老第恐。進絳之駛。召還規地之華。願保寤興。適符瞻嚮。

回夏太尉

見聚珍本卷五十四

同前

輟務天臺。懋恩將闔。裂京榮之近壤。來建中軍。繼關隴之上游。別開盛府。恭聆善旦。參布寬條。甫光注賴之殊。允契休嘉之集。蠢茲裔種。孤我朝恩。雖上德包荒。議貸先零之罪。而善經防患。聊咨細柳之屯。佇即

敍於戎疆。永折衝於廟筭。嘉庸所底。休運來同。某早荷品題。今遙趨伏。敢期台造。先枉教音。均察父之慈憐。重孤生之感槩。庶緣舊物。終託洪鈞。銜篆之叢。名言罔既。

上呂相公

修覲王朝。政麾侯服。聳槐庭之舊德。人慶具瞻。殿星昴之全封。地均夾輔。遽飭元戎之御。間開尊府之儀。振導天聲。威懷斗俗。逮此春祺之洽。允同邦體之休。然以四嶽炳靈。世叢茂伐。三階疑象。神奇昌符。雖道韻之益冲。顧化鈞之焉往。諒茲息偃。行復彌綸。某早服辭垣。久塵賓閣。玷齒牙之餘論。訂松栢之晚凋。尚緣禁直之勤。或草剛辰之贊。茲焉素祝。無喻丹愚。

上夏太尉

見聚珍本  
卷五十四

上呂相公

稱媿元戎。肅開大府。使時樹政。爲國偃藩。竦列辟之具瞻。宜百祥之順報。將躔台采。兼臨南北之街。周化邵風。更並東西之陝。願符丕眷。保御至和。益光蒙福之餘。還又熙庸之載。某蹟縻官守。心寄門闌。濯濯戎韃。莫陪於左屬。濛濛零雨。企詠於東歸。祈嚮所叢。文陳非既。

上西洛宋資政

茂將中詔。出總留符。趣周道以少勤。冒陬春之餘凜。便時府上。宣美化條。綿深息以內充。嚙繁祺而昭介。

矧茲奧洛實號離都。蘭錡誰何素謹千門之衛。杏陵充奉類多三選之繁。居守所咨倚成尤重。願答維巖之望。益孚瞻闕之祥。某早服恩徽。坐搖心極。限省闈之常局。隔藩枳之餘陰。斬懇叢并。索言安止。

上呂相公

易地偃藩。秉圭肆覲。冠華儀於星落。慰羣望於槐朝。錫馬書蕃。分麾夕引。便剛辰而襲吉。卽大府以宣風。冲氣內馮。繁釐順嚮。恭惟某官。謀合國蔡。績藹天旂。翊媿后之萬機。叶商衡之德保。茲攜槩。遁我成功。終迫咨兪。再倡屏翰。胡街漢瑣。竝繫鎮御之方。鉉路師壇。參照龍光之盛。方均瞻。賴忽枉封。因感會之餘言。借褒存之曲禮。敢緣至意。益獎懇衷。願追零雨之歌。還復洪鈞之賜。藏心有素。搦翰匪宣。

益州轉運明學士

使軺西撫。載馭離騷。書舍右傳。首煩辭誨。布諄勤於言味。寫棗馥於清條。隱几孰窺。題衿滋感。惟岷都之地沃。本漢斧之任雄。流馬轉財。舉調盈虛之節。明緡下諭。允追宣布之風。增御太和。上符至眷。盍簪未日。搦翰奚云。

回轉運

邊達明晤。逾歇歲芳。顧支離抱疚之餘。加濫訥措辭之短。怠馮參訊。尤結悃勞。恭惟黃圖夾右之區。赤藩刺舉之重。澄清所寄。自均八使之雄。調度攸資。居足千金之仰。仰聆最目。方冠吏師。欽竚追鋒之還。進侍

承明之祕。秋煒肅布。毛澤順成。善膺福祿之蕃。式尉騷牢之素。

上呂相公

待罪禁局。攝官選部。才隨用乏。日與勤俱。遯瞻坐府之尊。頗僭奏記之禮。永惟僚戀。徒戢精微。恭以某官道格明良。感孚樞極。暢經謀於宰路。申著蕭規。挹高讓於邦風。再光周屏。蹈中和而弗跲。臆哉殺以攸宜。惟是寰封。均於潤福。介圭來覲。固無信次之勞。富石具瞻。且有僉同之舊。但虞息偃。難廢延登。冬律戒寒。歲芳凋節。益儲茂淑。人對昌期。上刺末從。臨風增企。

錢大監

見聚珍本卷五十三

上魏府任諫議

通籍中臺。晞風北道。歲無我與。坐慨於逾陰。庇有君餘。弗忘於歸賴。嚮者。敢謂某官。茂將禮意。流錫書音。因子舍之于行。訪郎閣而墜貺。褒評引重。迥同月旦之更。幽處增輝。頓若陽秋之暴。願銘膺府。庸誌恩憐。欽聞趨節之還。前啓在銘之賜。望符眷屬。慎齋粹和。

回外任賀冬

天晷迎長。歲儀參亞。候魯氛於十耀。冠周曆於三微。恭惟某官。業擅儒先。喻高師采。露誠明而撫仕。樹風績以宣方。陽序昭臨。靈釐臻嚮。寧圖謙槩。先示慶辭。敢緣垂祝之褒。遠奉俾臧之壽。永言欣慙。叢鏤丹衷。

回通判學士

英游云闊。年所薦華。屬間歲以病多。苦臨文而思拙。闕於辭遠。寢以慢成。終仰景山之高。均嘆甫田之壹。茲者。敢謂某官。寄通有素。道舊實勤。因鈴史之奏都。隱几囊而占問。愛褒參極。孰復忘劬。盛賜久之。寢識蒲俎之味。冒霜近止。決無松鬣之凋。冀佩玉音。昭銘蓬曲。右文在旦。籲俊爲先。永念髣髴。首膺皇器。願騶然於生養。副須矣於朋簪。欽祝所并。選言非述。

回知郡主客

見聚珍本卷五十三

回邠州夏館使

見聚珍本卷五十三

代人謝改京官

祇膺褒擢。伏積震遑。竊念某系出單平。才惟常短。自褫巾於嘉會。繼泐牒於大邦。家難中嬰。氣機久耗。嚮屬羣舒之境。慎圖權茗之豐。偶玷舉知。往專左職。月凡歲要。顧商筭之有條。州攝臺符。幸地求之如律。攸司言狀。保牘中程。不圖啓擬之辰。超預制除之目。況書簽佐局。省戶隸名。雖改宿官之常。要是開榮之序。靜言優獎。仰本先容。此蓋某官助泚養材。因雲霈潤。念佹佹之味。久困迷津。俾種種之衰。漸希來譽。得肩髦義。進冒寵私。敢忘士節之甘。庸累汝評之愛。

回曹琮太尉

見聚珍本卷五十四

回陳泊殿院謝官

被獎恩書。聯榮憲采。珥華簪於朝右。式登周行。操白簡於殿中。尤資汲直。矧辱嘗僚之舊。素欽展體之賢。會此甄囊。方深抃愜。敢圖謙尚。特枉文陳。露明好於私悰。屈臺威於公範。英辭有未。勞府知銘。餘俟踵門。更期敷枉。

上徐州扈諫議

伏蒲展覲。剖竹求藩。輟君靈之敷言。緣使符之樂職。下車有謚。已日其孚。徧和氣於東人。浹餘波於上國。坐堂乘暇。憑几止辭。奔宮雉之宿官。附客魚而流問。仰銜謙槩。申佩言章。願符愷悌之謠。增舍神明之祉。吏師是式。惇簡竚光。趨伏末期。文陳叵逮。

賀冬

寶典迎長。歡儀亞歲。本軒筳而鳳應。參漢曆以珠聯。某官六德映辰。九言貫道。紀丕庸於王府。憲嘉靖於友邦。望與日升。福偕時億。願契朋陽之復。早瞻裨袞之歸。訓有宿官。禮賒薦慶。欣祈所嚮。一二罔宣。

回外任郎官

見聚珍本  
卷五十五





# 景文宋公集卷第一百二十四

## 啟狀

上青州相公

材任四隣。勳包九序。由先朝之感會。佐下武之續承。和江鼎以旣平。坐左槐而實相。胡公練達。貫萬事於中庸。陳平變和。成四夷之鎮撫。曩者長君信黜。真廟顧成。巨慝竊權。羣邪間覺。絳惡氛而貫日。煽僞象於滔天。某官接梟翼以鸞翔。截河流而濟貫。發於至榮。則金石爲開。厭其未萌。則匕著自失。或投畀豺虎。或暴以秋陽。援白日而再中。遏尾閭之將泄。暨湯而有一德。式契尹躬。爲堯而去四凶。逐光虞典。永言忠壯。蓋絕等夷。問復內樞之臣。蜚語爲變。託此城社。構爲鯨鯢。駭機潛張。異議放肆。某官躡足定計。膝席建言。殲封豕之怒牙。羸狼羊之藩角。脅從罔治。反側之子自安。開陳其端。震電之刑爲措。袁安之府。不忍錮人。邠吉之庭。未嘗按吏。坐清亂象。迎召太和。至於擇典。以震國容。納誨以輔君德。二精陽燎。再侍上帝之郊。三適造庭。兩較羣髦之譽。百穀長懋。三光仰澄。邊境無忿鷙之師。海隅躋仁壽之域。故以垂光南簡。傳信後昆。若乃正色端朝。詳言處事。不吐不茹。柅羣動於始騷。有猷有爲。鍵多門之敗政。作帝元輔。爲天孝侯。並昭著於本朝。匪妄宣於曲筆。一昨上穹見戒。靖館挺災。本託寓於何言。啟側身之至德。某官繫國休戚。

爲時慘舒。亟引咎以自陳。願避賢而寒責。遜誠確守。惟辟重違。聊能機衡。用均勞逸。進退之際。下蔑間言。榮悴所交。上無二色。全齊巨鎮。維梓先疇。有多□以名鄉。實高陽之署里。揮金而娛逸老。釃酒以見故人。當代之榮。自我奚讓。竊詳前代。非無鉅公。蓋齷齪者遺。諛於具員。容容者本。圖於邀福。徒跣謝罪。良味於知幾。惶懼可憐。亦顛於臨摯。徐防坐災而切免。石慶視事於安歸。功名難全。希曠如此。寧若某官。奮格天之業。避其成功。罄靖國之謀。訖無纖隙。履重剛而不跲。訂大蔡而前知。冠乎三階。順經躔於軒老。不答十策。全大體於漢庭。終始弗渝。古今絕擬。伏望益儲道妙。進荷春祺。逝几几之碩膚。暢冥冥於何慕。安石同樂。既踐冶城之言。赤松與游。遂抗留侯之志。俾懦夫之有立。何祇悔之可虞。某早託鈞陶。阻陪車乘。瑞圭出國。曾賦崧高之八章。參桂非珍。猶是藥籠之一物。佩台憐而有素。書感臆以無慙。

回外任賀正

歲舍履端。春塗肇始。淇椒花而爲壽。振金鐸以宣和。恭惟某官。雅量淵澄。清機穎發。居洽朝綏之譽。出揚使隰之華。適啓康年。載蕃休祉。謙儉有裕。慶問見存。愧佩所條。兼陳奚悉。

回余舍人謝知制誥

見聚珍本卷五十三

回京西呂轉運

榮膺中詔。出總外臺。伏惟歡慰。恭以漢有刺部之權。唐專輸漕之職。合爲使任。必簡朝言。惟儒苑之峻髦。

擁郎曹之清望。歷茲繁寄。正謂觀能。況關輔上腴。提封甚遠。賦租錯出。轉積無留。竚緣朱轆之還。行被青藩之召。方將剡牘。遽荷流音。感頌交深。底裏奚究。

柳侍讀

見聚珍本卷五十三

回并州明龍圖謝改諫議

見聚珍本卷五十四

上陳州張相公攀違

得請宸旒。出藩京輔。卽乾台之大任。領齋鉞之中權。以恩均勞。使日趨治。乘安流而順派。昌炎序之方隆。善御粹冲。式符瞻賴。某阻陪行。罔訴離矜。愧戀所并。文陳無喻。

回成德軍魯待制謝上

違交戟之嚴。擁左符之寄。使時著政。已日乃孚。眷師壁之所屯。控邊關之尤極。暫煩臥治。欽覲報成。何卽席以未安。已占辭而流問。圖書對峙。比踈接武之游。膠漆投堅。姑荷同心之契。欣慙駢集。款鏤奚忘。

回潞州郭觀察謝上

見聚珍本卷五十四

回河東柳按察

見聚珍本卷五十四

上外任兩府賀正

曆謹三朝。邦熙百禮。舜職舉授時之典。周官和佐治之常。伏惟某官。碩望冠時。忠規映國。暫均勞於樞鼎。

方夾輔於藩維。願乘歲祚之蕃。還變階符之重。某早銜恩紀。甫限官箴。睇尊府以馳誠。阻歎觴之介壽。永言瞻頌。拙喻端倪。

代回夏相公

被命漢廷。于宣并部。抗戎旂而信邁。按邊瑣以申嚴。坐府有初。占書猥及。方修謝懇。遽覲殊恩。台符帥節之華。共當注意。留鑰太阿之重。彌賴同寅。誕告以還。僉言惟允。矧茲舊物。夙在洪鈞。已欽夾輔之隆。冀趣還朝之寵。尙期幕節。獲覩元功。傾祝于斯。一二非述。

回彭王二舍人謝知制誥

見聚珍本卷五十三

代回彭舍人

近審光奉恩章。進升禁職。伏惟歡慶。竊以乾文彪列。上憲於掖垣。王命慎思。下嚴於簡冊。卓爲盛選。要值難才。恭惟某官。旦暮亨期。珪璋令問。書林袖簡。早欽宿業之勤。仕路牽絲。久鬱潛郎之望。向還使節。入侍螭吻。適茲籲俊之辰。宜被非常之寵。遂諧僉美。分掌命書。方且丹青聖文。鼓舞王化。視淮南之詔。固本於純深。奮東皇之辭。一歸乎灑噩。自茲器任。叵測冥升。詎意衰殘。尙繫存記。推之謙柄。況以長牋。姑謹銘藏。罔殫文述。

代回王舍人

向審恩章。進陞辭省。慶儀未展。私抃已深。恭以某官早智夙成。清徽獨映。本遵辰而發策。久効智以牽絲。敦詩無邪。蹈道難進。縹囊細簡。恣閱書林之嚴。夷玉河圖。自是皇居之寶。果膺試札。入服禁垣。易染葭之珍袍。署判花之曩式。方且帝猷以之粉澤。贊命以之純深。雲漢天章。金相玉振。士焉爲盛。增四戶之凝嚴。文果在茲。進三王之灑醴。擢材之美。悅栢所均。嚴緊明哲之懷。尙顧衰殘之質。飛文見貺。約禮彌勤。願謹銘藏。永隆風契。

上知郡比部

祇守王官。貿更天吏。寓辭雙鯉。罕逢遠客之歸。晞采哀鳥。邈在太微之後。緝曲蓬於心極。庇嘉樹之培封。頃以慈寧誤恩。經筵承乏。無勞報國。有祿浮人。收可棄之臆脰。玷惟塗之丹膺。夙宵內忖。志限已踰。敢謂某官挺操徂□。□褒魯衰。占英辭而濬發。敕行李以奉將。祇誦選言。載求深旨。喜不及寢。表善教於師門。恩與其□。成育才於詩教。恨遙趨伏。祈保寤興。北首孔懷。中乾罔斂。

上寇給事復官

茂膺明制。式敍華資。伏惟慶慰。恭以某官識際幾神。謀經信采。光華茲遘。力命允偕。宣三德以有家。暢四支而含美。頃自忤圖懷決。俾又墊昏。屹巨防以新謀。塞長筊而底績。清衷攸簡。慶賫遂行。屬神燎之冠雲。包中區而洒澤。曰咨上綴。式是近藩。首申綠詔之溫詞。復引黃闈之舊物。不失正於進退。愈見履基。樂相

說於君臣更符邦□方均悅栢傾竚追鋒。

代到任謝兩地

龍筦祕曹魯瞻善部併塵東寄增腆情顏竊念某一介拘儒三朝誤寵盡忠無補所食皆浮緣傷齒以見收玷講筵之叅勸春秋暮止內識於遠非筋力茶然頻煩於漢告間露乞身之奏冀諧歸老之求當宁示慈秉鈞爲地廢其始願寵以崇資進喉舌之官聯領股肱之使寄資金充裕因許其過家賜車在庭更慙於稽古此蓋某官全有邦之大體假前席之餘言務穆彝倫罔捐故老伏況左符所治先壤連疇單車就行中宿而至家爲儒里無煩崔篆之班春日稟餐錢足佐廉頗之強飯因茲善養漸及退歸罔謹中外之言實賴挺陶之賜過茲而往未識所圖。

回趙舍人

告勞星掖將命州塵當出祖於河梁阻紱違於刺字緬惟共治已協宣和某官才裕氣純志恬履潔靡真懷於出處方樂職於東南引郡紱以爲榮雖從已欲坐棠陰而決訟行及政成甫此歛炎諒加頤護禱虔瞻切無喻悃誠。

回外任賀諫議

見聚珍本卷五十三

# 景文宋公集卷第一百二十五

啟狀

謝大名王相公

光膺帝制。兼秩台司。聯茂公槐。叶維邦枳。斯民之望。允尉於巖巖。上帝之心。方咨於采采。亟聆還賞。務欲敦風。然而襲卜其依。明縉素定。熊羆崇讓。雖形吁異之言。箕尾垂精。終應營求之賚。拜嘉在旦。有位相歡。何辱搗冲。曲貽誨翰。荷坏陶而最舊。篆肝膈以無忘。

鎮府謝諸官相賀啓

近自閑州。俾臨劇部。既護諸將。并提六州。載循懦怯之人。不稱藩宣之寄。軍中頭白。固已自慙。馬上髀消。若何爲報。敢期英峻。馳錫題函。以籠署之深沉。膏更法從。雖鴈門之踰遠。猶借褒言。嘉惠載隆。勞膺永戢。官常有次。蓋簪末期。時億美祥。日躋榮寵。

狀元學士

屯蹇所鍾。支離無幾。比緣家難。自屏氓屨。託于密之藏。榮塗兩絕。罹薦瘥之困。生意日銷。兀罔辨於昭費。嗒如忘於吾我。城闕之事。都罔聞知。竿牘所交。裁施嫺黨。寧無英茂之眷。固有斬嚮之心。奈何區霧殘骸。

零丁末路。伏苦怆景。霜露交摧。搦管臨文。馬烏迭舛。雖勉塵於記室。或致悞於空函。貽誚士倫。曷磨言玷。此者。恭承狀元大著學士。肅膺召節。升直書林。敷試藻以第篇。掩諸公而出右。內舒感會。旁占題函。率隆禮之曩規。述尙賢之盛遇。本施貴近。罔及疋癘。何言泛梗之微。辱墜乃金之間。圓封引發。五內震慙。伏況斷斷譴材。變變危息。卿曹舊屬。隔品朝聞。學序震官。絕窺仙室。仍茲削跡。乃是廢人。已隔賀悰。重紆訊幅。諒以竹林賢巷。併牒而開榮。遂俾星壁辰髦。降階而伸禮。仰銜愛借。徒誓珍藏。必若獲終升穀之期。再與芬蘭之益。緩詆訶於贖髮。結庇賴於叢雲。納之下陳。斯爲素蘊。幽憂甫爾。崖略匪宣。

代外任賀入兩地

比塵台勢。尋布威惊。雖趣附於星郵。或未通於鈐史。敢圖恩映。前墜書辭。助恢則哲之猷。爲禦多言之侮。波餘所逮。夕惕差安。屬私抱之已敷。且費詞之難再。姑藏爽激。庸謝獎成。

回賀改待制

近沐宸恩。入充禁職。寵緣時集。愧與榮參。猥瞻雲構之崇。驟識天光之邇。重循至幸。甫畏曠僚。敢期益著之游。前致勤斯之問。推先仕路。孚協朝言。第啣悅栢之情。茲締曲蓬之感。自餘欽誦。罔旣敷宣。

呂相公攀遠

肅趨命節。還冠乾台。戒執馭以駛馳。副刻書之進拜。炎暉甫盛。行道少勤。惟帝賚之夙符。擁民瞻之介祉。



芳槐樹左。竝存蕭相之規。零雨東來。肯慰周人之望。矧脩甄贊。仰副宸俞。某祇守官箴。阻伸廷禮。永言欣愧。參集悃悃。

授待制謝兩府

見聚珍本卷五十六

回賀改待制

近蒙褒命。進服禁聯。祇荷寵榮。交深臆懼。竊念某志雖典學。資適逢辰。拱著治朝。竄名祕館。專記言於右史。仍參播於縣官。淺智有涯。畏汲深而乏綆。長年多病。賴藏疾以如山。詎意清衷。垂收宥質。因憐孤拙之效。特升華近之班。拂豹省之清塵。旋參法從。企鳳阿之層構。寔造仙游。內揆春庸。慮興缺望。敢謂某官樂聞朝渙。助穆邦猷。紛鋪題誘之辭。外禦浮囂之議。餘光所逮。危悃差安。永惟謙柄之勞。但戢心蓬之感。

外任兩地賀正

王朔履新。國章和布。滿椒霞而集慶。踞罇虎以陳儀。恭惟某官功映臣鄰。德含天粹。入告有猷之盛。間宜爲憲之宜。茂氣至臻。允繫於夾輔。明神攸勞。彌介於善祥。昭叶壽祺。還膺亮采。某式勤官守。阻望台華。欣祝內并。題名罔喻。

回盛右丞

近憑小紙。冒列思悰。計行舍以未遙。枉詒書之垂問。永惟恩紀。伏誦誨言。噢咻褒存。一出少原之舊。支離

黯系參慰東山之懷承福履之茂綏副官師之勦嚮併茲欣服罔喻名言春筦寢餘夏□茲啓願繇存於道味永光弼於王塗趨伏未展瞻馳借極

梅侍讀問候

見聚珍本卷五十三

回江郎中

睽風茲久參訊良踈近緣子舍之行厚枉書筠之問意兼辭篤感與愧并欽惟靈測之封慎憚潛郎之俊歲成疇報宸獎惟蕃願遵明晦之宜交集康寧之祉竝游未日結想何言

回王龍圖

肅奉褒恩已伸慶禮竊惟奎文交綯雲構肇營胥宇中天之嚴參侔冊府訪逮西清之奧益召俊僚譽選耆髦茂光禁直恭惟某官含章文苑潔矩什塗本難進以處躬介不回而取福縣官食給荐彰煩使之能省署箠過茲軫潛郎之歎請問論事造辟蒙知果因疇俊之辰昭式類能之舉進借嚴助諒無侍橐之勞榮過東丘親見出圖之盛方深舞詠猥閱函封忘淹恤之爲嗟樂鸞儒而扞感餘言垂逮冲意彌惇戢勞府以永藏搖厲曆而曷敘

賀大名王相公

見聚珍本卷五十二

賀安撫夏太尉

易建高牙。總臨西服。簡緣皇揆。美泱朝言。恭以某官爵竝天人。才兼文武。不回不跲。則克保於身。有猷有爲。則用又厥辟。發自至慮。奮爲嘉庸。六府勸而可歌。九鼎隱而增重。比緣醜虜。未卽靈誅。敢謀風塵。輕動疆場。亟經煩武。荐及扞城。大兵久屯。諸將難一。洪惟睿筭。思革舊章。特包全陝之區。悉受中軍之節。入居都會。參建屬僚。一切從宜。百全制勝。陳平盡護。漢后倚而差強。充國旣行。罕羌聞而自潰。不建殘慙。指景成擒。某夙佩鈞憐。欣聞遶東。從軍甚樂。已隔後車之行。作誦美勤。願附清風之末。瞻顯詠抃。併萃乃誠。

賀資政侍郎

肅奉褒恩。榮兼祕職。序進春官之亞。移撫价藩之雄。寵集朝僉。誼諧公論。恭惟某官器亟道甫。識貫民彝。裁總萬樞。懋經一德。屬告勞於基命。聊倡化於大邦。未幾班條。亟聞異等。果茲叢渥。爰示簡心。華幄宣溫之嚴。斗宮喉舌之貳。黃圖啓輔。紫縣聯圻。諒緣景福之蒙。滋趣贊書之拜。求言慶悃。曷喻費詞。

盛右丞問候

見聚珍本  
卷五十六

回澶州王相公

跡局禁聯。地遙材館。每懷恩紀之舊。罕通記幅之私。怒焉乃心。歲聿云暮。恭惟某官天挺懿德。邦咨大猷。暫輟樞機。纒臨都會。眷茲北道。台輔所以具瞻。沔彼大河。京邑由乎蒙福。諒緣倚注。克保休嘉。益光維屏之勳。還奉疇庸之訪。此爲祈嚮。罔喻文陳。

回楊舍人

見案珍本  
卷五十六

謝兩地兩制問候

稟氣素弱。爲客寒所乘。薄於腠膚。伏在床枕。藉輶交選。區霧不分。謹湯劑以迭攻。啜淖糜而自救。泱此旬日。粗獲寤興。伏蒙某官屢墜誨言。并降親筆。惻其羸瘵。勗以護將。荷陰德之敷施。撫危軀而三百。伏況朝符行下。假式甚優。曲成便養之私。厚作延殘之地。迷魂初復。耗力未完。須任□右之趨。迺罄翹材之謝。愧悰感緒。萬靡一宣。

代回呂舍人

見案珍本  
卷五十六

回岱舍人

寵膺制綵。入直書垣。借賀者以踵門。獲稽如而內謁。丁辰逢吉。抃吾黨之寵嘉。以聖得賢。愜至公之頌歎。矧叅曩照。胥接邇班。觀瑞羽以上搏。躍春蠶而中極。敢圖冲尚。專徇彝儀。謂揚糝以居先。紆墜書而厚謝。詞條披秀。墨藪騰芬。駭炙輶之不窮。竊循衿而有述。且西臺祕地。東里俊僚。言成世謨。意如上出。筆端暫下。則震若風雷。文彩一騰。則倬爲雲漢。諒匪薄三古之淞襲。貫萬物之本元。美充於中。行飭於外。譔注之勞。已積疇咨之命。惟行。乃今值才。誠爲妙選。徧聆羣議。誰不爲然。尙敷感遇之繁。蓋本勞謙之懿。永惟銘戢。拙寫端倪。

回呂舍人見聚珍本卷五十六

鄭州王相公問候見聚珍本卷五十四

河陽夏侍中見聚珍本卷五十五

代鄭公回樞密侍郎

祇膺敦勸。入對寵靈。廢克讓之素懷。總惟幾之祕務。蒼明茲賴。中外相歡。恭惟某官。節貫淄磷。業昭久大。褒參宰旅。惟阿衡之致君。間嗇道冲。專仲尼之慎疾。太和保御。介福叢滋。師錫于帝。而不謀圖。任惟入而最舊。冠躋樞禁。敷闡內猷。綱紀所歸。下式瞻於風采。老成來復。國方寄於典刑。辱況書辭。增銜謙柄。慶右賢之有始。矧咨長以焉依。抃悚參并。文陳罔及。

代鄭公回張侍中

光膺帝制。出冠侯藩。伏惟慶慰。恭以某官。道格允元。業宣寅亮。綢繆二后。師長百僚。封誓著於河山。至誠開於金石。入專樞近。備罄謨明。阿尹之勤勞王家。庭堅之邁種民德。功成釐積。禮重均勞。果倡牧於多方。爰就封於近甸。方符僉論。忽枉書辭。承敦牢讓之風。尚鬱疇庸之典。冀遵朝旨。時奉寵靈。欽祝感藏。併萃清府。



宋景文公詩文典雅而奧博。剗削而峻拔。北宋諸公中別自成家。論者或謂好爲艱澀奇險。未必然。本集或稱百卷。或稱百五十卷。蓋集非一種。而各本今皆亡。近時聞清國亦從大典中採掇。釐成六十二卷。知其非完篇也。余偶獲宋槧零本稱百五十卷者。所憾僅僅數卷。不過觀本集原式。第以宋人舊帙存世甚罕。今印出以實叢書函中。文化七年庚午陽月二十二日。天瀑山人識。

